

Martaexl Sul

1

Yisu Zidu Ddei Porpor

¹ Yisu Zidu ddei porpor mel jiasibbor biar dae mel nga a. Yisu mel Yalboxrlahar giedae ca, halae Daxlweixl giedae ca.^a

² Yalboxrlahar nael Yirsar leil xiu,
Yirsar nael Yargel leil xiu,
Yargel nael Yoxrdaxl nei Yoxrdaxl ddei arzzi-nimar leil xiu.

³ Yoxrdaxl ddei cirmu Tamar nael Yoxrdaxl dax Farlexlsi nei Xilla leil xiu.

Farlexlsi nael Xisiluixr leil xiu,
Xisiluixr nael Yallaxr leil xiu,

⁴ Yallaxr nael Yalmirnaxrdaxr leil xiu,
Yalmirnaxrdaxr nael Naxrsuixl leil xiu,

Naxrsuixl nael Sarmer leil xiu. ⁵ Sarmer ddei maerssor Lahexr nael Bo'asi leil xiu.

Bo'asi ddei maerssor Luxldaexr nael Exrbeixldaexr leil xiu.
Exrbeixldaexr nael Yixi leil xiu,

⁶ Yixi nael zzirmar Daxlweixl leil xiu.

^a**1:1** Yalboxrlahar nei Daxlweixl mel Yoxrtaexl su ddei porpor; yaa nnel yarzi middux. Cuaxlsixljil Sul 12–25 Yalboxrlahar leil biar dae. Sarmur'aer Sul Vaexr Beil Ber 16–31 nei Sarmur'aer Sul Vaexr Maele Ber Daxlweixl leil biar dae.

Daxlweixl ddei maerssor Baxrsixlba nael Sorloxmexr leil xiu.
Baxrsixlba mel Wuliyal ddei maerssor bei goxr a.

⁷ Sorloxmexr nael Loxrbo'a leil xiu,
Loxrbo'a nael Yalbiryal leil xiu,
Yalbiryal nael Yalsar leil xiu,
⁸ Yalsar nael Yuesafar leil xiu,
Yuesafar nael Yuelaxr leil xiu,
Yuelaxr nael Wusiyar leil xiu,
⁹ Wusiyar nael Yuetar leil xiu,
Yuetar nael Yalhasi leil xiu,
Yalhasi nael Xisijia leil xiu,
¹⁰ Xisijia nael Marnaxrsi leil xiu,
Marnaxrsi nael Yalmae leil xiu,
Yalmae nael Yuesiyal leil xiu.

¹¹ Yoxrtaexl su ca mel leil ddoddo-nrddo Babirluixr mermi gga ggaxr
mal halleix,

Yuesiyal nael Yegenixryar nei yar ddei arzzi-nimar leil xiu.

¹² Yoxrtaexl ca mel leil Babirluixr ggaxr mal ho a,

Yegenixryar nael Sarlatixr leil xiu,
Sarlatixr nael Sorloxbaboxr leil xiu,

¹³ Sorloxbaboxr nael Yalbiryul leil xiu,

Yalbiryul nael Yirlixlyaljil leil xiu,
Yirlixlyaljil nael Yalsor leil xiu,

¹⁴ Yalsor nael Sardu leil xiu,

Sardu nael Yalji leil xiu,
Yalji nael Yirluxl leil xiu,

¹⁵ Yirluxl nael Yirlixlyalsar leil xiu,

Yirlixlyalsar nael Mardaxl leil xiu,

Mardaxl nael Yargel leil xiu,

¹⁶ Yargel nael Yuesaexl leil xiu. Yuesaexl mel Marlixlyal capor ddei nga a.

Marlixlyal nael Yisu leil xiu. Yisu mel dder Zidu^b ddei nga a.

¹⁷ Eine nga a, Yalboxrlahar cirdae a Daxlweixl dax ci a maelmaer a mel ceili coxr zza; Daxlweixl dax hal coxr cirdae a Yoxrtaexl ca mel leil Babirluixr ggaxr mal hal coxr zzeze ci a yoxl ceili coxr zza; Yoxrtaexl ca mel leil Babirluixr ggaxr mal cirdae a Zidu dax ci a mel yoxl ceili coxr zza.

Yisu Zidu Leil Xiu Teixl Lei

¹⁸ Yisu Zidu leil arsae xiu teixl lei mel jiasibbor biar dae. Yisu yarma Marlixlyal leil mel Yuesaexl meixl ho a. Yaa halae zzi dax naer nr goxr seir, Arbosobo ddei Xiu ddei dder Marlixlyal leil aniuxniar lol a. ¹⁹ Nael yar capor Yuesaexl ddei mel nixmox seir Arbosobo ddei ddar mel dax bei mae dae su ar ddei a. Yel daxmeix yar leil seixlda lol nia-nr-zzir a dder arjjiuljjiu arla yar leil nr li bei niazzir.

²⁰ Yar eil mel leil xiar doxr dae a qie, Seirpor ddei tisir^c mel yar yixrmeixka a yar leil mia lol a bbeix: “Daxlweixl giedae ca Yuesaexl, Marlixlyal aniuxniar a mel Arbosobo ddei Xiu ddei yar leil niar lol arddeir a. Yel ni yar leil bbeix gel lei a zoxrzixr nr ssa. ²¹ Yar ssor ar

^b**1:16** *Zidu* Zidu ddei yils mel dder Arbosobo ca ar ddei leil tiur teixl lei a, cassor-worssor leil jiuxl lei. Xilaxl ddar nael “Zidu” ae; Xiboxrlaexr ddar nael “Mirsaxlyal” ae. Yils ciryoxr a nga.

^c**1:20** *tisir* Tisir mel ca nr nga; yaa xiu ar mel a. Yaa merlabbor zei lei a Arbosobo ddei ddar ca leil bbeix gger su. Yaa Arbosobo leil lei zi, visser.

ddox xiu nia. Yar mel cassor-worssor mel zuixl bei a yaa leil jiuxl teixl lei su ddei nga a. Yel ni yar leil Yisu^d mi gger nia.”

²² Eil mel eine nga a mel dder Seirpor xiezi^e leil bbeix lol goxr mel yarzi loxr a. ²³ Yar bbeix:

“Capor dax naer nr goxr seir ssormaer ar ddei a mel
aniuxniar a ssor ar ddox xiu nia,
yel ca mel yar leil Yirmarneixllixl ae nia.”^f

Yirmarneixllixl ddei yilsi mel dder “Arbosobo niul dax cirgo a hher
dae.”

²⁴ Giedae Yuesaexl yixr zucur a dder Seirpor ddei tisir mel yar leil miardal dae mel sael a bei a; yar ssormaer ddei leil bbeix si lei a. ²⁵ Nael aniux ddox xiu nr teixl lei seir a, yar yar maerssor dax nr naer. Aniux ddox leil xiu teixl lei ho a, Yuesaexl yar leil Yisu mi gger.

2

Gie I Su Yisu Leil I Lei

¹ Halleix mel Silixl mi ca hal ddei Yoxrtaexl mermi ddei zzirmar bei dae.⁹ Yisu leil Yoxrtaexl mermi Boxrlixlhexr kax gga xiu teixl lei ho a, gie

^d**1:21** *Yisu* Yisu ddei yilsi mel dder “Arbosobo ca mel leil jiuxl.”

^e**1:22** *xiezi* Xiezi mel ca lar nga. Yaa Arbosobo ddei ddar mel ca leil biar gger. Halae arddolcar a arsaer lerler nga var ca leil bbeix gger zaxr.

^f**1:23** Yirsaexlyal Sul 7:14 leil vaexr dae.

⁹**2:1** Yisu leil xiu teixl lei halcar, Loxrmar goxrjia su mel Yoxrtaexl su mel leil guaxr. Loxrmar goxrjia zzirmar vaervaer ddei Silixl te leil Yoxrtaexl mermi ddei zzirmar yelye bei lol. Silixl mel Yoxrtaexl su nr nga.

i var su nnel sael a mel dofa piar a gga cirdae a Yiluxlsaler zzi gga lei a bbeix: ² “Yoxrtaexl su ddei zzirmar ddox leil xiu teixl lei ho a zzarmar? Anix hal ddox arddolmaex hher dae? Ngua yar ddei gie^h taex ddux lei ggie mia a, yar leil oldde texl lei.” ³ Silixl zzirmar mel ddar eil mel leil bbejjiur a dder nixmox ddei zza-nr-so, Yiluxlsaler zzi gga ca mel lei zza-nr-so. ⁴ Yar dder Arbosobo leil zi su vaervaerpor mel leil nei Arbosobo ddei sulsaxlsu maelmaerjia leil ae si lei a, yaa lei biex a bbeix: “Zidu leil mel arddolmaex xiu teixl lei nia?” ⁵ Yaa ddarkoxl a bbeix: “Yoxrtaexl mermi Boxrlixlhexr kax gga xiu teixl lei nia.” Halleix xiezi mel vaexr dae a bbeix:

⁶ “Yoxrdaxl mermi Boxrlixlhexr kax,
ni dax halmaex gga vaervaerpor ar ddei ddux lei a,
ngo ddei cassor-worssor Yirsaexllixl suⁱ mel leil guaxr,
yaa ddei yaloxlmo sael a nga,
yel Yoxrdaxl mermi gga Boxrlixlhexr kax ddei mel arsaebeilei
middux,”^j

eine bbeix a.

⁷ Silixl zzirmar ddei dder arjiuljjiu arla gie i var su mel leil ae si lei a, yaa leil zabbar seilseir a gie taex arddolcar a ddux lei biex. ⁸ Giedae dder

Yar Yirsexr giedae ca. Cuaxlsixljil Sul 25:19-34 leil Yirsexr arseir a biar dae.

^h2:2 *gie* Gie eil taex mel kebal mel le-nr-sel. Gie eil taex leil mia a mel dder Yoxrtaexl su ddei zzirmar ddei xiu teixl lei ho a saexl ddo.

ⁱ2:6 *Yirsaexllixl su* Yirsaexllixl su mel dder Yoxrtaexl su nga a. Yaa mel Yargel giedae ca.

^j2:6 Ddar eil qier Mirjia Sul 5:2 leil vaexr goxr a.

yaa leil zi a, Boxrlxlhexr kax gga ssi lol a bbeix: “Nia zabbar seilseir a aniuksor ddox leil zo ssi, zo wo a dder ngo leil bbeix gger a, ngo lei yar leil oldde textl ssi.”⁹ Yaa zzirmar ddei ddar mel noni ho a dder ssi a. Yaa dofa piar a gga mia goxr gie taex yoxl yaa xilmeir ssi dae a, yaa leil aniuks ddox hher ggie hier mal ci a dder xi ggaxrne nor dae a.¹⁰ Yaa gie hal taex leil mia a ggese zildu a.¹¹ Yaa xi giex gga ddir a aniuks ddox leil nei yarma Marlixlyal leil mia a dder aniuks ddox leil oldde textl, halae naxrcixlcixlmo hal ddei ddaexr kae a, piu sae, ssurxia nei moxlyoxl^k mel vei teixl lei a, yar leil gger.¹² Giedae yaa yixrmeixka a Arbosobo yaa leil Silixl zzirmar dax halmaex jjixr nr ddo bbeix gger a, yaa dder kebal jjiimo ar zex ssi a, yaa armael ddei mermi jjixr a.

Aezixr Goxrjia Pa Mal

¹³ Yaa ssi ho a, Yuesaexl mel yixrmeixka a Seirpor ddei tisir yar leil mia lol a bbeix: “Silixl zzirmar mel aniuks ddox leil zo a yar leil bei zil gger niazzir, yel ni ha du la a, yaa nr mollor leil hier dae a Aezixr Goxrjia pa mal a halmaex hher dae, hherdder ngo zeixleixr ni leil miardal zzeze hher ci.”¹⁴ Yel Yuesaexl hal cir xixlmei dder yaa nr mollor leil hier dae a, Aezixr Goxrjia pa mal a.¹⁵ Halmaex hher dae a, Silixl zzirmar si zzeze hher ci a. Eil ddei mel hherdder Seirpor xiezi leil bbeix lol goxr ddar mel yarzi loxr a. Xiezi bbeix goxr a bbeix:

^k**2:11** *ssurxia nei moxlyoxl*/ Ssurxia nei moxlyoxl mel sixzdei ddei taxrvixrka bei teixl lei. Ssurxia mel hexzzi sael a doxllabox lei bei cexr yarzi ner xiu. Moxlyoxl mel ggecir leil meilabox naxcir bei cexr, ggecir ddei leil ner xiu lol, ca sima ggecir leil lei mei gex cexr, ggecir ddei xiaxr nr var.

“Ngo ngo ssor leil bbeix gger a yar Aezixr Goxrjia ddux lei a,”^l
eine bbeix a.

Silixl Zzirmar Ddei Caporssor Leil Seixl

¹⁶ Giedae Silixl te gie i var su mel yar leil fur a saexl a dder sirzzi zildu a. Yel gie i var su mel yar leil bbeix gger nixixl ddei leil zox dae a, yar ca leil miardal teixl a Boxrlxlhexr kax nei naer ggie cirmaex-hanga ha nr koxl nei nr koxl nr loxr seir caporssor maelmaerjjia leil seixl pixl jjia gger a. ¹⁷ Hherdder Yilixlmir xiezi bbeix goxr ddar mel yarzi loxr a. Yar bbeix goxr a bbeix:

¹⁸ “Lamar zzi gga mel xialil-xialor aenge ggie bbejjiur dae.
Lajiexr^m ddei ssormine mel nr zza a,
yel yar yaa leil aenge gger dae,
yar leil quex dae lei quex vu nr ssi,”ⁿ

eine bbeix a.

Aezixr Goxrjia Nr Hher Jjixr Lei

¹⁹ Silixl zzirmar te si ho a, Yuesaexl Aezixr goxrjia hher dae a yixrmeixka a, Seirpor ddei tisir yar leil mia lol a bbeix: ²⁰ “Aniux ddox leil seixl niazzir su mel si ho a. Ha du la a, yaa nr mollor leil hier dae a Yirsaexllixl goxrjia jjixr ddo a.” ²¹ Yuesaexl dder ha du lei a, yaa nr mollor leil hier dae a Yirsaexllixl goxrjia jjixr a. ²² Nael yar bbejjiur a bbeix, Yalzilar mel yarbbor Silixl ddei dirtu Yoxrtaexl mermi ddei zzirmar bei dae a zzor, yar dder Yoxrtaexl mermi jjixr nr bel a. Yar yoxl yixrmeixka a Seirpor yar leil Yoxrtaexl mermi ssi nr ddo bbeix gger a.

^l**2:15** Ddar eil qier Hexrxi'a Sul 11:1 leil vaexr goxr a.

^m**2:18** *Lajiexr* Cuaxlsixljil Sul 29 nei 35 Lajiexr leil biar dae.

ⁿ**2:18** Ddar eil qier Yilixlmir Sul 31:15 leil vaexr goxr a.

Yel yaa dder Jialixllixl mermi dax ssi a, ²³ Naxrsalexl kax gga ssi ci a, halmaex hher dae a. Eil ddei mel dder xiezi bbeix goxr ddar mel yarzi loxr a. Xiezi bbeix goxr a bbeix:

“Yar mel Naxrsalexl su ca a,”

eine bbeix a.

3

Sexlsir Gger Su Yuehal Arbosobo Ddei Ddar Ca Leil Biar Gger

¹Giedae sexlsir gger su ar ddei ddux lei a, Yuehal mi. Yar Yoxrtaexl mermi mipaerbbae gga hher dae a Arbosobo ddei ddar ca leil biar gger doxr dae a bbeix: ²“Arbosobo ca mel leil yar ddei goxr gga ddir lol a yar ddei cassor-worssor bei lol du a;^o yel nia nr seir mel zeixleixr bei nr ddo, seirseir bei nia.” ³Ca eil ddei mel dder xiezi Yirsaexlyal bbeix goxr ddei nga a. Yar bbeix:

“Ca ar ddei a mipaerbbae gga ae dae a bbeix:

‘Seirpor ssilabox jjiumo zex giexl zaxr nia,
yar jjiumo zex ggu zzar zaxr nia.’ ”^p

^o**3:2** *Arbosobo ca mel leil yar ddei goxr gga ddir lol a yar ddei cassor-worssor bei lol du a* Xilaxl ddar bbeix: “Merhhexr ddei goxr ddei lei ci ddo jiur a lo.” Merhhexr ddei goxr mel dder Arbosobo ddei goxr. Yar ddei goxr merlabbor middurbbor lei zza dae. Yar ddei goxr lei a yilsi mel dder yar yar leil ddarzzi su mel leil guaxr lei a. Yar yaa ddei zzirmar bei lei a.

^p**3:3** Ddar eil qier Yirsaexlyal Sul 40:3 leil vaexr goxr a. Halcar zzirmar mel kebal mermi ssi a mel cassor-worssor mel yar leil i du a, jjiumo bei

⁴ Yuehal veixr dae pia mel loxltoxr me bei teixl lei, maelsael nael sur zzi bei teixl lei, zzorlabox nael zaxbiul nei bbiurvi yir zzor. ⁵ Halcar dder Yoxrtaexl mermi Yiluxlsaler zzi gga su ca nei Yoxrtaexl mermi kebal cirmaex-hanga su ca, halae Yuedaxl lazzarmo qier leil hher dae su ca mel lei Yuehal dax halmaex ssi a, ⁶ yaa yar dax armael zuixl zza cexrssexl a Yuehal leil yaa leil Yuedaxl lazzarmo gga sexlsir⁹ gger lol. ⁷ Yuehal mel Farlixlsaexl ca nei Sardugie ca^s cirke lei lei a, yar leil

zaxr nia, ggu zzar zaxr nia. Arbosobo ca mel ddei zzirmar bei lei niazzir dae a. Yel cassor-worssor mel nixmox zzar bei har zaxr dae a Arbosobo dax bei mae nia.

⁹**3:6** *sex/sir* Ca mel sexlsir a mel, yaa armael zuixl zza cexrssexl a, Arbosobo yaa leil ssoxrsuxl lol. Yisu si ho a, ca mel halae Yisu leil ddarzzi cexrssexl, yar dax bei mae dae. Ca mel sexlsir a mel, ajjix sser a sexlsir. Cirmelmel a nael leixrhher ddei ajjix dex du lei a oldde leil dox deix gger. Cirmelmel nael ajjix gga niuxl gger.

^s**3:7** *Farlixlsaexl ca nei Sardugie ca* Farlixlsaexl ca nei Sardugie ca mel Yoxrtaexl su ddei vaervaerpor a. Yaa mel dder Yoxrtaexl su mel leil Arbosobo leil arsaе zi, arsaе noni, arsaе bbeix zae gger mulggersu mel nga a. Farlixlsaexl ca mel zabbar seilseir a Arbosobo Ddei Sul ber zza, nael yaa hal mel sael a nr bei ssi. Yaa Yoxrtaexl su mel leil mul gger a yaa armael ddei leiddur mel dax zabbar seilseir a bei mae doxr dae nia bbeix. Sardugie ca mel Moxrxi ddei Lixlfaxr mel leil lar noni; xiezi ddei sul mel leil nr guaxr. Yaa Farlixlsaexl ca mel ddei leiddur mel dax bei nr mae. Yaa ca mel gol du xixl lei var ddar-nr-zzi; tisir nei neir zza lei ddar-nr-zzi. Farlixlsaexl ca nei Sardugie ca mel arddolcar a Arbosobo arsaеbeilei middurbbor ca maelmaerjjia leil ser lei nia saexl. Yel yaa Yuehal dax lei a yar leil sexlsir gger lol a dder Arbosobo yaa leil faxr nr

sexlsir gger lei lol mia a. Yel yar dder yaa leil bbeix: “Sae sael a yarzi duxr, eil mel nia! Arbosobo cirleixr dder nia leil serpaxl lei du a; yel nia pato ddo zzir lei zzir nr ssa.⁸ Nael nia nr seir mel zeixleixr bei nr ddo, seirseir bei nia, saer zzei mel saer naxrcixl niar sael a nga. Eine nga mel ca mel dder ni yarzi Arbosobo ddei ddar no saexl a.⁹ Nia nixmox zzar xiar ji dae a bbeix: ‘Yalboxrlahar ca hal ddei mel niul ddei porpor a. Yel Arbosobo niul leil serpaxl nr var,’ eine bbeix nr ddo. Ngo nia leil bbeix gger, Arbosobo legelbbe eil zzu gga Yalboxrlahar ddei giedae ca cirke ddux lei lol cexr.^{t 10} Eilboxl goxlcór ddei sixzzei zzei leil bir gex dae ho a. Ha saer naxrcixl niar nr var saer zzei mel dder taexl zeilei a, adoxl gga piar ji gger nia.^{u 11} Nia nr seir mel zeixleixr nr bei, seirseir bei a, ngo ajjix sser a nia leil sexlsir gger. Nael ngo giedae lei ddei mel Arbosobo ddei Xiu nei adoxl sser a nia leil sexlsir gger nia. Yar mel bir ngo leil hormo vaer leixl, ngo yar leil qixnex lei ti gger nr piar.¹² Yar yaxrcaxl vei dae a, ggieddei gga so saer nei bexlze bbe kae. So saer mel nael se du lei a so ji ggjie ji dae, bexlze mel nael cirse-cirsil lei adoxl bbiu ggjie cu pixl gger.”^v

var a zzir dae. Vaervaerpor eil mel Arbosobo leil i nr du a, yel Yuehal mel yaa leil hie.

^t**3:9** Yuehal ddar eil gier bbeix a mel Yoxrtaexl su mel Yalboxrlahar giedae ca a bbeixarnar, nael Yoxrtaexl su mel leil yaa Arbosobo ddei ddar no-nr-ni a mel Merhhexr ddei goxr gga ddir nr cexr saexl lol.

^u**3:10** Yuehal bir dae a bbeix dae eil ddei mel dder Arbosobo yar ddei ddar nr no su mel leil serpaxl nia bbeix arddeir a.

^v**3:12** Yuehal bbeix dae ca eil ddei mel dder Zidu nga a. Yuehal bir dae a bbeix dae yilsi ddei mel dder Zidu Arbosobo leil ddarzzi su mel leil nei Arbosobo leil ddar-nr-zzi su mel leil bbe kae gger nia. Arbosobo dax mae dae su mel leil nael merlabbor ddeix lol; Arbosobo dax nr mae su mel leil nael dixlyuxl gga zeilei lol.

Yuehal Yisu Leil Sexlsir Gger

¹³ Eine goxr ho a, Yisu mel Jialixllixl mermi cirdae a Yuedaxl lazzarmo dax ssi ci a, Yuehal leil yar leil sexlsir gger lol. ¹⁴ Nael Yuehal yar leil bbiur gex dae a bbeix: “Ngo leil lei ni sexlsir gger mibbe, ni giel arsae halae ngo dax lei leir?” ¹⁵ Yisu ddarkoxl a bbeix: “Nr zzi. Ni eine bei a mel Arbosobo xiar dae mel dax bei mae dae a. Ni dder eine bei ddo a.” Yel Yuehal dder yar leil ddarkoxl a. ¹⁶ Yisu sexlsir ho a ajjix ddei gga ha du lei a qie, neixleixrsael merlabbor ddei dder yar leil ggapu gger a. Yar dder Arbosobo ddei Xiu ddei dderbel sael a bbiu ze lei mia a. Yel yar leil nor deix dae a. ¹⁷ Yoxl merlabbor bbeix dae qiurte ar ddei a bbeix: “Ni mel ngo ddei Ssorzil-ssorya a. Ni ngo leil ggesse lol,” eine bbeix a.

4

Yisu Leil Sixr I

¹ Giedae, Arbosobo neir zzirmar^w te leil Yisu leil sixr i lol a, Arbosobo ddei Xiu ddei Yisu leil mipaerbbae gga ssi lol a. ² Yar merxixl-merni lei azo ardoxr nr zzor^x licei ni nga a dder meixr zildu a. ³ Sixr i su te lei a yar leil bbeix: “Ni Arbosobo ddei Ssor nga arddeirnga a, legelbbe eil taex leil bbeix a, aba loxr lol ssi lar.” ⁴ Yisu ddarkoxl a bbeix: “Arbosobo Ddei

^w**4:1** *neir zzirmar* Arddol-cirsil halleix neir zzirmar te mel tisir ar ddei a. Yar kebal tisir ar mel leil hier dae a Arbosobo leil dir a, Arbosobo dder yar leil faxr a. Yar yarzi gexrddo loxr a. Yar Arbosobo leil nei cassor-worssor leil vuxryixr. Neir zzirmar te leil Sardaxl ae. Martaexl Sul 13:38-40 nei Qirsixlluxl Sul 12 Sardaxl te leil biar dae.

^x**4:2** *merxixl-merni lei azo ardoxr nr zzor* Yoxrtaexl su mel yarzi sael Arbosobo dax ddar biar niazzir halae yar ddei ddar zabbar seilseir noni niazzir a, azo lei nr zzor.

Sul ber leil vaexr dae a bbeix: ‘Ca mel gol dae a mel zzorlabox leil lar koxl dae nr nga, Arbosobo bbeix teixl lei ddar cirqier-hanga leil koxl dae arddeir a.’^y ⁵ Neir zzirmar te yoxl yar leil hier dae a Yiluxlsaler zzi gga ssi a, yar leil Arbosobo leil zi ggie xi ollele leil ngier dae lol a. ⁶ Yar leil bbeix: “Ni Arbosobo ddei Ssor nga arddeirnga a, tiuxl zeii ddo a. Arbosobo Ddei Sul ber leil vaexr dae a bbeix:

‘Arbosobo yar ddei tisir mel leil miardal a yaa leixrhher ddei ni leil ddor gex dae var, ni ddei qihher ddei legelbbe leil zuax nr dae lol.’^z

⁷ Yisu yar leil bbeix: “Arbosobo Ddei Sul ber leil vaexr dae a bbeix: ‘Ni ddei Seirpor Arbosobo leil sixr i nr ddo.’^a ⁸ Neir zzirmar te yoxl yar leil hier dae a worga mu zzir ar ga leil ddeix a, mer woxrke goxrjia maelmaerjia nei cirza-hanga naxrcixlcixl mel yar leil i lol. ⁹ Halae yar leil bbeix: “Ni ngo leil cizixl gger dae a, ngo leil bbeix zae gger arddeirnga a, ngo eil mel maelmaerjia ni leil gger.” ¹⁰ Yisu ddarkoxl a bbeix: “Sardaxl ssal dae! Arbosobo Ddei Sul ber leil vaexr dae a bbeix: ‘Ni ddei Seirpor Arbosobo leil larni bbeix zae gger ddo visser ddo.’^b ¹¹ Yel neir zzirmar te Yisu dax nr hher ssi du si a; tisir mel dder Yisu leil visser lei a.

Yisu Jialixllixl Mermi Arbosobo Ddei Ddar Biar Gger Beil

¹² Yisu mel Yuehal leil ge du lei a bbejjiur a dder Jialixllixl mermi ssi a.

¹³ Giedae yoxl Naxrsalexl kax gga lei nr hher, Jiabaernoxxr kax gga ssi a,

^y**4:4** Ddar eil qier Semixljil Sul 8:3 leil vaexr goxr a.

^z**4:6** Ddar eil qier Sipi Sul 91:11-12 leil vaexr goxr a.

^a**4:7** Ddar eil qier Semixljil Sul 6:16 leil vaexr goxr a.

^b**4:10** Ddar eil qier Semixljil Sul 6:13 leil vaexr goxr a.

halmaex hher dae a. Halmaex mel neixvi dax naer dae, hherdder Xibulluixr mermi nei Naxrfuxrtalil mermi gga nga a. ¹⁴ Eil ddei mel hherdder xiezi Yirsaexlyal bbeix goxr mel yarzi loxr a. ¹⁵ Yar bbeix:

“Xibulluixr mermi, Naxrfuxrtalil mermi mel
neixvi qier leil nei Yuedaxl lazzarmo maelleil nga a.
Halmaex mel Yoxrtaexl su nr nga ca mel goxr ggje,
Jialixllixl mermi nga a.

¹⁶ Halmaex neixmarmar ggje goxr dae ca mel,
eilboxl bbobbolbbo mia a.
Si nixixl zza ca mel leil
bbobbolbbo zoxl gex dae a,”^c

eine bbeix a.

¹⁷ Hane cirdae mel Yisu Arbosobo ddei ddar ca leil biar gger beil a bbeix: “Arbosobo nia ddei zzirmar bei lei du a. Nia nr seir mel zeixleixr bei nr ddo a seirseir bei nia!”

Yisu Yar Dax Mae Dae Su Ca Tiur

¹⁸ Eine ar ni a, Yisu Jialixllixl mermi neixvi qier leil ssi dae a, Ximexr nei yar nimar Adaexrlixl yaa nr hieni leil mia a. Ximexr leil mel Birdaexr lei mi. Yaa mel ngolbelsu a. Yaa jiajia ngol bel ddei neixvi gga piar ji a ngol bel dae. ¹⁹ Yel Yisu yaa leil bbeix: “Nia ngo dax mae lei ddo a. Nia mel ca

^c**4:16** Ddar eil qier Yirsaexlyal Sul 9:1-2 leil vaexr goxr a. Yuehal Sul 1:1-13 leil lei bbobbolbbo ddei leil biar dae. Neixmarmar ggje goxr dae ca mel mel Arbosobo leil nr saexl su mel nga a. Bbobbolbbo ddei mel Yisu a. Yar ca mel leil Arbosobo leil saexl lol, yoxl ca mel leil cirse-cirsil yar dax goxr dae lol.

mel leil bel su a. Hherdder bbeix nia ca mel leil hier si lei a ngo dax mae lei lol,” eine bbeix a. ²⁰ Yaa dder qixrqixlqixr ngol bel ddei lei nr li yar dax mae a. ²¹ Yisu zeixleixr ssi a, yoxl Xibirtaexl ddei ssor Yargel nei Yuehal yaa nr hieni leil mia a. Yaa yarbbor Xibirtaexl dax cirgo a cuaxr ddei leil ngol bel naexrbe dae, Yisu yaa leil ae a, yar dax mae lei lol. ²² Yaa dder qixrqixlqixr cuaxr jiaxl lei nr li. Yarbbor dax lei nr hher, Yisu dax mae a.

Yisu Ca Mel Leil No Ggu Gger

²³ Yisu Jialixllixl mermi cirmaex-hanga ssi a, Yoxrtaexl su mel Arbosobo ddei sulzzaggie xi gga ca leil mul gger a Merhhexr ddei goxr seirseir mel biar gger, halae cassor-worssor ddei cirza-hanga no lei ggukor gger. ²⁴ Yar bei dae mel dder Xuexllixlyal mermi cirmaex-hanga biar jiax a. Halmaex gga ca mel dder neir xiex dae, caerfo dae, taba dae, nei ciryoxr-hanga no su maelmaerjia leil lei Yisu dax hier mal lei a, yar dder yaa leil ggukor gger a. ²⁵ Halcar mel Yisu dax mae ssi su ca cirke zza. Ca eil mel mel Jialixllixl mermi, Dirjiabolixl mermi, Yiluxlsaler zzi, Yoxrtaexl mermi nei Yuedaxl lazzarmo dofa piar dax hal mel gga lei.

5

Yisu Wordabbor Hher Dae A Ca Leil Mul Gger

¹ Yisu ca seirseil ar ke mia a dder worga leil ddeix a. Cux ze ho a, yar dax mae dae ca mel yar dax lei a. ² Yar dder yaa leil mul gger du lei a bbeix:

Arbosobo Ca Mel Leil Arsae Seir Lol Biar Gger

³ “Nixmox zzar Arbosobo leil lar koxl niazzir su ca mel Arbosobo yaa leil seir lol a;

yaa mel dder Merhhexr ddei goxr gga ca mel nga a.

⁴ Nixmox zzar cix su mel Arbosobo yaa leil seir lol a,
yaa nixmox ddei zzaso nia.

⁵ Nixmox zzar cirdoxr lei nr col su mel Arbosobo yaa leil seir lol a,
yaa middurbbor ddei li wo ddo.

⁶ Seirseir mel bei a Arbosobo dax baexbaexlbaex bei mae niazzir su
mel

Arbosobo yaa leil seir lol a, yaa nixmox lodda nia.^d

⁷ Ca leil zoxlnixr su mel Arbosobo yaa leil seir lol a,
Arbosobo yaa leil zoxlnixr.

⁸ Nixmox taex lorbba seir su mel Arbosobo yaa leil seir lol a,
yaa Arbosobo leil mia nia.

⁹ Ca leil toltor a bei lol su mel Arbosobo yaa leil seir lol a,
yaa leil mel dder Arbosobo ddei aniux a bbeix nia.

¹⁰ Arbosobo bbeix dae mel dax bei mae dae su mel, ca yaa leil bixr
var.

Nael Arbosobo yaa leil seir lol a, yaa mel Merhhexr ddei goxr gga
ca mel nga a.

¹¹ Ngo leil weix a ca mel nia leil hie vuxryixr, nia leil bixr, halae
cirza-hanga vuxryixrddo ddar mel bbeix a nia leil pix a, Arbosobo dder
nia leil seir lol a. ¹² Halleix ca mel lei xiezi mel leil eil mel sael a bixr goxr
a. Merhhexr gga nia leil naxrcixlcixlmo ar mel dol gger dae, yel nia
ggegge-sese a nga nia.”

^d**5:6** *Seirseir mel bei a Arbosobo dax baexbaexlbaex bei mae niazzir su
mel Arbosobo yaa leil seir lol a, yaa nixmox lodda nia* Xilaxl ddar bbeix:
“Botaddu lei nr zza yarzisael seir loxr lol niazzir ca eil mel, zzo meixr nei
ajjix sixl sael a nga. Arbosobo yaa leil seir lol a, yaa nixmox lodda nia.”

Cor Nei Bbolbbo Ddei Leil Biar

¹³ “Nia mel middurbbor cor mel sael a nga. Nael cor mel nr kar arddeirnga a, halae azo bei, arsae kar lol cexr seir bbeixleir? Cor mel nr kar a arddolmaex lei sser nr cexr a. Piar pixl a ca mel leil jjiux lol lalnga a.

¹⁴ Nia mel middurbbor ddei bbelele ddei sael a nga, hherdder bbeix zzi ar ddei a worga leil zi deix dae a mel kerzi dae nr cexr hal mel sael a nga.

¹⁵ Ca mel de doxl a bellerzzi woxrke dol ji nr nga a nei, de doxl deix labox ddei leil dol deix a, ca cirhhexr-lorbba leil bbele lol. ¹⁶ Ciryoxr a nga, nia daxmeix ca mel leil nia mel ngo dax mae dae su a saexl lol nia. Nia seirseir bei dae mel yaa leil mia lol a, yel yaa dder nia merhhexr gga Arbbor hherdder Arbosobo leil bbeix zae gger.”

Lixlfaxr Ddei Leil Biar

¹⁷ “Nia ngo lei a mel Lixlfaxr nei xiezi vaexr gger dae mel^e mier lol zzir nr ddo. Ngo mier lol nr nga a nei, maermaer-ssissi a bei lei arddeir a.

¹⁸ Ngo nia leil yarzi bbeix gger, mer nr mier seir, mi nr mier seir a mel, Lixlfaxr ddei mel cir dir cir bixr lei mier nr var, maelmaerjjia lei arsae bbeix dae mel dder arsae nga nia. ¹⁹ Yel arseir Arbosobo miardal dae ye zzir mel leil ar yoxr no-nr-ni, halae ca leil mul gger a no-nr-ni lol a mel, yar mel merhhexr gga ye zzir ddei nga a. Nael arseir Arbosobo miardal dae mel dax bei mae dae, halae ca leil mul gger a bei mae dae lol a mel, yar mel merhhexr gga vaer zzir ddei nga a. ²⁰ Ngo nia leil bbeix gger, nia seirseir bei a Arbosobo ddei sulsaxlsu nei Farlixlsaexl ca mel leil bei

^e**5:17** *Lixlfaxr nei xiezi vaexr gger dae mel* Lixlfaxr nei xiezi vaexr gger dae mel dder Yisu leil xiu nr teixl lei seir Arbosobo Yirsaexllixl su leil bbeix gger dae ddar mel nga a.

seir nr leixl a mel, nia dder cirse-cirsil merhhexr gga ddir nr cexr.”^f

Sirzzi Ddei Leil Biar

²¹ “Nia halcar ca leil miardal goxr mel bbejjiur a bbeix: ‘Ca seixl nr ddo; ca seixl a mel dder yar leil ser nia,’ eine bbeix a. ²² Nael ngo nia leil bbeix gger: ha arzzi-nimar leil sirzzi a lei dder yar leil ser nia. Ha arzzi-nimar leil ‘cexr-nr-ddo’ hie a mel yar leil dder Yoxrtaexl vaervaerpor azo lerler zzubbe su cir dax ser nia. Ha arzzi-nimar leil ‘medeil’ hie a mel yar dder dixlyuxl⁹ gga adoxl mel dax nr ssi goxr nr ddo. ²³ Yel ni Arbosobo leil zi ggie zilabox gger car a, ni ni ddei arzzi-nimar mel ni leil bota su zza holcir du lei arddeirnga a mel, ²⁴ ni dder Arbosobo leil ziddu mel zi ggie xilmeir dol dae a, hoba arzzi-nimar dax tor xixl jjixr ho a saelnei zi jjixr lei. ²⁵ Ni ca leil nr hoxr bei a, yar ni leil goxl ssi a, nia halae jjiumo car gga ssi dae seir, ni dder nialngasael ni leil goxl su ca dax tor xixl nia. Nr nga a yar ni leil casersu leil jia gger var. Casersu ddei dder cageggie guaxr su ddei leil jia gger, yar dder ni leil ge du lei var. ²⁶ Ngo ni leil yarzi bbeix gger: nr nga a mel, yaa ni leil faxr dae zzirbae ddei jia jjia gax-nr-zi a mel yaa ni leil arsae piur teixl lei var bbeixleir?”

Kerjjar Ddei Leil Biar

²⁷ “Nia halcar ca leil miardal goxr mel bbejjiur a bbeix: ‘Kerjjar nr ddo,’

^f**5:20** Arbosobo ddei sulsaxlsu nei Farlixlsaexl ca mel bbecir-bbeni zabbar seirseir a Arbosobo Ddei Sul zza doxr. Yoxrtaexl su zzir dae a Farlixlsaexl su mel nei Arbosobo ddei sulsaxlsu mel bir kebal ca mel leil seir. Yel yaa Yisu eine bbeix ggie bbejjiur a, yaa xiar lei xiar nr ci.

⁹**5:22** *dixlyuxl*/Dixlyuxl mel dder Arbosobo yar leil no-nr-ni su, yar leil dir su mel leil faxr ggie nga a. Halmaex gga mel cirse-cirsil lei adoxl bbiu dae. Ser teixl ho a nr seir su mel cirse-cirsil lei halmaex gga hher doxr dae nia.

eine bbeix a. ²⁸ Nael ngo nia leil bbeix gger: ha ssormaer leil mia a dder yar dax kerjjar niazzir a mel, yar ddei nixmox zzar mel dder ssormaer hal ddei dax kerjjar ho sael a nga a. ²⁹ Ni ddei meixddur yo bbor ni leil zuixl bei ssi lol a mel dder giexl teixl lei a piar pixl gger; ggecir ddei leil ciryoxr a pixl mel bir ca cirddeir-lorbba dixlyuxl gga ssi leil seir leixl. ³⁰ Ni ddei leixrhher yo bbor ni leil zuixl bei ssi lol a mel dder, taexl teixl lei a piar pixl gger; ggecir ddei leil ciryoxr a pixl mel bir ca cirddeir-lorbba dixlyuxl gga ssi leil seir leixl.”

Capor Maerssor Zzi Leil Nr Li Ddei Leil Biar

³¹ “Yoxl eine bbeix goxr a bbeix: ‘Capor mel armael maerssor leil nr li arddeirnga a mel, yar leil nr li sul ar zul vaexr gger nia,’^h eine bbeix a. ³² Nael ngo nia leil bbeix gger: maerssor ddei kebal ca dax ker-nr-jjar lei, capor ddei yar maerssor leil nr li a, ssormaer hal ddei dder capor zo box a. Eine nga mel yar dder kerjjar a; ssormaer leil bbeix su hal ddei lei kerjjar a.”

Bbeix Ddo Bbeix Nr Ddo Biar

³³ “Nia yoxlyoxl halcar ca leil miardal goxr mel bbejjiur a bbeix: ‘Seirpor dax azo lerler bei bel bbeix goxr a mel nr bei goxr nr ddo,’ⁱ eine bbeix a. ³⁴ Nael ngo nia leil bbeix gger: nia azo lei bei bel bbeix nr ddo. Merlabbor mel Arbosobo mer guaxr mi guaxr a cux ggie, yel nia merlabbor dor dae a ngo bei bel bbeix nr ddo. ³⁵ Middurbbor mel Arbosobo qihher toxl di, yel nia middurbbor dor dae a ngo bei bel bbeix nr ddo. Yiluxlsaler zzi ddei mel zzirmar vaer zzir ddei hher ggie, yel nia Yiluxlsaler zzi leil dor dae a lei ngo bei bel bbeix nr ddo. ³⁶ Nia olce ar ba leil neix lol bbeixsael piu lol nr var, yel nia yoxl armael ddei oldde taex leil dor dae a ngo bei

^h5:31 Ddar eil qier Semixljil Sul 24:1 leil vaexr goxr a.

ⁱ5:33 Ddar eil qier Lixlweixljil Sul 19:12 leil vaexr goxr a.

bel bbeix nr ddo. ³⁷ Nia ddar bbeix a mel, nga, mel dder nga bbeix; nr nga, mel dder nr nga bbeix; zeixleixr bbeix a mel dder nixmox neix su te^j nia leil bbeix teixl lei lol arddeir a.”

Bei Koxl Xixl Ddei Leil Biar

³⁸ “Nia halae halcar ca leil miardal goxr mel bbejjiur a bbeix: ‘Seir nael seir bei koxl xixl, nr seir nael nr seir bei koxl xixl,’^k eine bbeix a. ³⁹ Nael ngo nia leil bbeix gger: nia leil bei nr sir bei su mel dax dir nr ddo. Arseir ni leil qiaxrmeix yo piar a leil deil a, vael piar a jiujiu za xixl lei a yar leil deil lol. ⁴⁰ Arseir ni leil goxl a, ddoddo-nrddo ni ddei pia kukurzzar xiux su a, ni teixlsibbor xiux jiujiu yar leil vei si lol. ⁴¹ Arseir ni leil ddoddo-nrddo yar dax jjiumo cir golir ssi dax lol a, ni dder yar dax nr golir ssi dax. ⁴² Arseir ni dax azo li a, ni dder yar leil gger; arseir ni dax azo lerler cir a lei cir nr gger bei nr ddo.”

Nia Leil Vuxryixr Su Ca Mel Leil Perniar Nia Ddei Leil Biar

⁴³ “Nia halae yoxl halcar ca leil miardal goxr mel bbejjiur a bbeix: ‘Nia dax goxr naer dae su ca mel leil nael perniar, nia leil vuxryixr su mel leil nael vuxryixr,’^l eine bbeix a. ⁴⁴ Nael ngo nia leil bbeix gger: nia leil vuxryixr su mel leil perniar nia, nia leil bixr su ca mel leil Arbosobo dax ddar biar gger nia. ⁴⁵ Arbosobo mel merni taex ca seir mel leil lei zoxl dae lol, ca nr seir mel leil lei zoxl dae lol; yar dax bei mae su ca mel leil lei almer lei gger, yar dax bei nr mae su ca mel leil lei almer lei gger.

^j**5:37** *nixmox neix su te* Nixmox neix su te mel dder neir zzirmar te nga a.

^k**5:38** Xilaxl ddar bbeix: “meixddur nael meixddur koxl gger; ser nael ser koxl gger.” Yilsi mel dder seir nael seir bei koxl xixl, nr seir nael nr seir bei koxl xixl.

^l**5:43** Ddar eil qier Lixlweixljil Sul 19:18 leil vaexr goxr a.

Eine nga a mel nia dder merhhexr gga hher dae Arbbor ddei aniux bei cexr a. ⁴⁶ Nael nia nia leil perniar su mel leil lar perniar a mel, Arbosobo arddolcar a nia leil azo ar ddei gger ssa bbeixleir? Suixsesu mel lei yaa leil perniar su mel leil perniar zzarmar?^{m 47} Nia nia ddei arzzi-nimar leil lar zzasoso dae biex a mel, kebal ca leil azo ar ddei seir leixl bbeixleir? Yoxrtaexl su nr nga ca mel lei yar ddei arzzi-nimar leil lar zzasoso dae biex zzarmar?^{n 48} Yel nia seirceix-seirmaer nga nia, hherdder nia ddei merhhexr gga hher dae Arbbor seirceix-seirmaer mel sael a nga.”

6

Ca Leil Azo Lerler Gger Ddei Leil Biar

¹ “Nia ca meixsaer qier leil seirseir bei a, dexryixl yaa leil mia lol eine bei nr ddo lo. Eine nga a mel nia ddei merhhexr gga hher dae Arbbor^o nia leil azo ar ddei kuar gger ddu zza bbeixleir?

² Yel nia ca leil azo lerler gger a mel, ca seir bei laexl su mel sael a bei nr ddo. Yaa mel Yoxrtaexl su mel Arbosobo ddei sulzzaggie nei jjiumo car a gga azo lerler bei laexl dae a, baerlae mex dae a, dexryixl ca mel leil yaa leil kuar gger lol. Ngo nia leil yarzi bbeix gger: yaa mel yaa li niazzir mel li wo ho a. ³ Ni ca leil azo lerler gger car a, ni ddei leixrhher

^{m5:46} Suixsesu mel Yoxrtaexl su ca a. Yaa Loxrmar su leil beijjiu a, suix se. Yaa ca mel leil ddoddo-nrddo yarzi miur sax lol, yel kebal Yoxrtaexl su mel suixsesu leil vuxryixr. Yaa zzir dae a yaa nixmox yarzi neixl.

^{n5:47} Halcar Yoxrtaexl su nr nga ca mel Arbosobo leil ddar-nr-zzi a, Yoxrtaexl su zzir dae a armael bir yaa leil seir leixl.

^{o6:1} *merhhexr gga hher dae Arbbor* Merhhexr gga hher dae Arbbor mel dder Arbosobo nga a.

vael bbor a leil leixrhher yo bbor azo bei dae saexl lol nr ddo.^{p 4} Ni azo lerler gger a mel arjiuljjiu a gger lalssa. Ni ddei merhhexr gga hher dae Arbbor ni arjiuljjiu a gger ggie i dae a, yar ni leil gger koxl xixl var.”

Arbosobo Dax Ddar Biar Ddei Leil Biar

⁵ “Nia Arbosobo dax ddar biar a, ca seir bei laexl su mel sael a bei nr ddo. Yaa mel Yoxrtaexl su mel Arbosobo ddei sulzzaggie nei jjiumo dax ngier dae a, Arbosobo dax ddar biar meixr, yel dexryixl ca mel leil mia lol. Nael ngo nia leil yarzi bbeix gger: yaa mel yaa li niazzir mel li wo ho a. ⁶ Ni Arbosobo dax ddar biar car a mel, ake lavulzzar giex gga ddir a, alddur ggabil du lei a, arjiuljjiu arla merhhexr gga hher dae Arbbor dax ddar biar. Niabbor ni arjiuljjiu arla yar dax ddar biar dae ggie mia a, yar ni leil seir lol nia. ⁷ Nia Arbosobo dax ddar biar car a ddar yarzisael miur nr ddo. Arbosobo leil ddar-nr-zzi su ca mel zzir dae a hormo boxl nei biar box doxr a yar dder yaa biar dae ddar mel leil noni a. Nael nia yaa sael a bei nr ddo. ⁸ Nia Arbosobo dax nr qiuxr seir dder Arbosobo mel nia azo sser zoxr saexl ho a. Yel nia yaa sael a bei nr ddo.”

⁹ Yel nia Arbosobo dax ddar biar a mel eine biar nia:

“Ngua ddei Merhhexr gga hher dae seirceix-seirmaer Arbbor,
ca mel ni ddei mi ddei leil larnei i du.

¹⁰ Ni leil ca mel ddei zzirmar bei lei lol nia,
ni xiar dae mel merlabbor bei dae a, middurbbor lei hal mel sael
a nga lol nia.

¹¹ Eilni ngua zzorlabox mel ngua leil gger la.

^{p6:3} *ni ddei leixrhher vael bbor a leil leixrhher yo bbor azo bei dae saexl lol nr ddo.* Ddar eil qier ddei yilsi mel dder ni seirseir bei a kebal ca leil saexl lol nr ddo.

¹² Ngua, ngua leil nr seir bei su ca mel leil ssoxrsuxl a,
ni lei ngua nr seir bei dae mel ssoxrsuxl la.

¹³ Ni ngua leil sixr i var ddei dax tor pex-nr-dae lol,
ngua leil nixmox neix su leixrga gga jiuxl teixl la.

[Merlo milo hazza gga, arddolcar lei ni mel middux zzir ddei nga a;
halae quexrlixl maelmaerjjia cirse-cirsil lei ni ddei a,]^q”

eine biar nia.

¹⁴ “Nia ca leil yaa bei cox mel ssoxrsuxl a mel, nia ddei Merhhexr gga
hher dae Arbbor lei nia bei cox mel ssoxrsuxl. ¹⁵ Nael nia ca leil yaa bei
nr hoxr mel ssoxr-nr-suxl a mel, nia ddei merhhexr gga hher dae Arbbor
lei nia bei nr hoxr mel ssoxr-nr-suxl.”

Nr Zzor Nr Dda Ddei Leil Biar

¹⁶ “Nia almeixr nr zzor eine bei halcar, ca seir bei laexl su mel sael a
bei nr ddo.⁵ Yaa mel cirdoxr lei gge-nr-se sael a qiaxrmeix ddei lei yarzi i
sol, eine bei a, dexryixl ca mel leil yaa almeixr nr zzor i teixl lei lol. Nael
ngo nia leil bbeix gger: yaa mel yaa li niazzir mel li wo ho a. ¹⁷ Nael ni
almeixr nr zzor eine bei halcar lei, oldde bil qiaxrmeix cir nia. ¹⁸ Ca mel
leil ni almeixr nr zzor i nr teixl lei lol, niul mia nr xie Arbosobo ddei leil
lar mia lol. Merhhexr Arbbor i dae a ni arjjiuljjiu arla nr zzor eine bei

^q**6:13** *Merlo milo hazza gga, arddolcar lei ni mel middux zzir ddei nga a;
halae quexrlixl maelmaerjjia cirse-cirsil lei ni ddei a; Arbosobo Ddei Sul
cirberber gga mel ddar eil qier nr zza.*

⁵**6:16** Yoxrtaexl su zzir dae a ca seir mel casolssor leil beijjiu, halae
zoxlzoxl a Arbosobo dax ddar biar, yoxl cirdaedae a almeixr lei nr zzor
eine bei nia. Nael yaa eine bei a mel ca mel yaa leil kuar gger lol niazzir
lalnga, yel yaa bei nr hoxr.

dae a, yar ni leil seir lol var.”

Merlabbor Naxrcixlcixlmo Hal Mel Leil Biar

¹⁹ “Armael leil middurbbor zzaegu naxrcixlcixlmo hal mel zaxr gger nr ddo; middurbbor mel bberzzi zzor var, maelvi zzor var, zzaexpor lei ker lei var. ²⁰ Armael leil merlabbor naxrcixlcixlmo hal mel zaxr gger dae lalssa. Merlabbor mel bberzzi zzor nr var, maelvi zzor nr var, zzaexpor lei ker lei nr var. ²¹ Ni ddei naxrcixlcixl mel arddolmaex zza dae mel, ni nixmox ddei dder arddol xiar dae.

²² Meixddur ddei mel ni ggecir ddei de sael a nga. Ni meixddur seir a mel, cirgge-circir lei bbele sael a nga; ²³ ni meixddur yojiar a mel, cirgge-circir lei neixmar sael a nga. Ni ggecir ddei de ddei neixmar a mel neixmar gaxceix a.

²⁴ Ca mel seirpor nnel leil visser nr cexr. Yar eil ddei leil vuxryixr a zzae dder hal ddei leil perniar, eil ddei leil i du a zzae dder hal ddei leil i zeil. Nia Arbosobo leil visser a mel, zzirbae ddei leil meixr nr ddo.”

Zoxrzixr Nr Ssa Ddei Leil Biar

²⁵ “Yel ngo nia leil bbeix gger: nixixl goxr a mel, azo zzor, azo dda, azo veixr zoxrzixr nr ddo. Holbbaexl olga ddei bir zzorlabox mel leil perniar nr leixl a ngo? Ggecir ddei bir pia leil perniar nr leixl a ngo? ²⁶ Nia merlabbor bbiu dae ngax mel leil arleixr i, yaa dae lei nr dae, se lei nr se, dol ji ggie lei nr zza, nael nia ddei merhhexr gga hher dae Arbbor halae yaa leil zeil gol dae. Holbbaexl nia bir ngax mel leil perniar nr leixl a ngo? ²⁷ Nia eine zoxrzixr doxr a hanol ar ni gol wo ddo a ngo? ²⁸ Pia mel leil zoxrzixr a azo bei? Nia arleixr xiar: mipaerbbae gga vixlux yir mel arsae ner du lei, yaa miar lei nr bei, pia lei nr naexr. ²⁹ Nael ngo nia leil bbeix gger: halleix zzirmar Sorloxrmexr ddei pia mel hane naxrcixl bbeixarnar, yar veixr dae mel halae vixlux pex sael a nr zae. ³⁰ Arbosobo leil lalal a

ddarzzi su ca mel nia arleixr xiar, mipaerbbae gga silbbar mel eilni halae zza dae seir, arggeni dder adoxlbbeix gga piar ji gger a. Nael Arbosobo halae yaa leil eine bei zae gger, nia veixrlabox pia mel gielgiel nia leil nr gger arddollei? ³¹ Yel nia zoxrzixr a ‘azo zzor bbeixleir, azo dda bbeixleir, azo veixr bbeixleir’ eil zzu bbeix nr ddo. ³² Arbosobo leil ddar-nr-zzi su mel eil mel leil li niazzir. Nia eil mel sser zoxr mel nia ddei merhhexr gga hher dae Arbbor saexl a. ³³ Nia hoba Arbosobo ddei ddar noni nei yar dax bei mae dae, eine nga a mel nia sser zoxr mel hazza lei yar dder nia leil gger. ³⁴ Eilni cixddu mel eilni cix a dder ddo a. Arggeni mel arggeni zoxrzixr ddu zza, yel nia arggeni leil weix a zoxrzixr nr ddo.”

7

Ca Leil Bota Ddei Leil Biar

¹⁻² “Nia ca leil arsaе zoxlnixr mel, Arbosobo lei dder nia leil arsaе zoxlnixr. Nia ca leil arsaе bota mel, Arbosobo lei nia leil arsaе bota nia. Yel nia ca leil bota nr ddo, Arbosobo dder nia leil bo-nr-ta. ³ Ni arzzi-nimar ddei meixddur gga alcur baex leil mia, nael arsaе armael meixddur gga sixlox taex leil zzael nr mia leir? ⁴ Ni armael meixddur ddei gga lei sixlox zza mel, arzzi-nimar leil bbeix: ‘Ngo ni ddei meixddur ddei gga alcur baex vei pixl gger’ bbeix cexr a ngo? ⁵ Ca seir bei laexl su eil ddei ni! Armael ddei meixddur gga sixlox taex hoba vei pixl ho a saelnei yarzi i sei, arzzi-nimar ddei meixddur ddei gga alcur baex vei pixl gger cexr.

⁶ Arbosobo leil zilabox mel anol mel leil gger nr ddo. Nr nga a yaa pox xixl lei a nia leil si lel lei. Nia helvirsær naxrcixlcixl mel lei veixr leil piar gger nr ddo. Nr nga a yaa helvirsær taex leil jjiux gex dae a.”^t

^t7:6 Arbosobo leil zilabox mel nei helvirsær naxrcixlcixl mel hherdder

Qiuxr A Li Wo A

⁷⁻⁸ “Arseir Arbosobo leil qiuxr a mel, Arbosobo dder yar leil gger var; arseir Arbosobo leil zo a mel, Arbosobo dder yar leil zo wo lol var; arseir alddur deil a mel, Arbosobo dder yar leil ggapu gger var. Yel nia qiuxr a, yar dder nia leil gger; nia zo a, yar dder nia leil zo wo lol; nia alddur deil a, yar dder nia leil ggapu gger. ⁹ Nia arseir ssor zza a, yar ni dax aba li a, ni yar leil legelbbe gger lei a ngo? ¹⁰ Ngol li a nael, sae gger lei a ngo? ¹¹ Nia bei nr sir bei bbeixarnar, zzaegu naxrcixlcixl mel armael anix leil gger saexl, nia ddei merlabbor hher dae Arbbor gielgiel zzaegu naxrcixlcixl mel yar leil qiuxr su ca mel leil nr gger arddollei? ¹² Yel nia nixmox zzar zzir dae a arddolcar lei ca mel nia leil arsae bei lol niazzir mel, nia dder ca mel leil arsae bei nia. Nia eine bei a mel dder Lixlfaxr nei xiezi vaexr gger dae mel dax bei mae dae a.”

Alddur Zaex Nei Alddur Kuax Ddei Leil Biar

¹³⁻¹⁴ “Dixlyuxl gga ssi mal alddur hal peixl mel kuax, jjiumo zex lei vaer, ddir su ca lei miur. Yel nia cirse-cirsil gol dae ggie halmaex ssi mal alddur zaexlzaex hal peixl gga ddir nia; alddur hal peixl mel zaex, jjiumo zex lei ssi sol, zo wo su ca lei nganiul.”^u

Sixzzei Naxrcixl Nei Sixzzei Yojiar Ddei Leil Biar

Arbosobo ddei ddar mel nga a. Anol nei veixr mel nael Arbosobo leil ddarzzi nr yuex su mel nga a. Ddar eil qier ddei yilsu mel dder Arbosobo leil i nr du su ca mel leil Arbosobo ddei ddar biar gger nr ssa.

^u**7:13-14** Yilsu mel dder Arbosobo leil ddar-nr-zzi su ca mel nixixl goxr a, armael xiar dae mel sael a bei ssi a yarzi bei so, yel ca mel miur. Yaa dixlyuxl gga zei nia. Arbosobo leil ddarzzi su ca mel nael nixixl goxr a, Arbosobo dax bei mae dae a yarzi bei mae sol, yel ca mel nganiul. Yaa merlabbor ddeix nia.

¹⁵ “Nia xiezi yarjiar mel leil fadae nia lo. Yaa nia dax lei a, i dae a zzae ya mel sael a nga yarzi seir, nael yaa veimar yarzi wo mel leisel yarzi gexrddo. ¹⁶ Yaa miar bei dae mel leil i a, yel nia dder yaa arsaesael ar mel a i teixl lei ddo. Hherdder saer ddei leil i a saer zzei ddei leil i teixl lei ddo sael a nga. Ca mel alcur cili gga puxrto caex wo ddo a ngo? Alddaexr cili gga vuxrhuagol caex wo ddo a ngo? ¹⁷ Eine nga a saer zzei naxrcixl mel saer naxrcixl niar, saer zzei yojiar mel larnei saer yojiar niar. ¹⁸ Saer zzei naxrcixl mel saer yojiar niar teixl lei nr xie, saer zzei yojiar mel lei saer naxrcixl niar teixl lei nr xie.^v ¹⁹ Ha saer naxrcixl nr niar saer zzei mel dder taexl zeil lei a, adoxl gga piar ji gger lalssa a. ²⁰ Yel ca mel bei dae ddei leil i a dder yaa leil i teixl lei ddo.”

Ca Seir Bei Laexl Su Leil Biar

²¹ “Nael ha ngo leil ‘Seirpor, Seirpor’ ae su mel dder Merhhexr ddei goxr gga ddir cexr nr nga. Ngo ddei merhhexr Arbbor dax bei mae dae su mel saelnei Merhhexr ddei goxr gga ddir cexr. ²² Hal cir ni ci a mel,^w ca cirke a ngo leil bbeix: ‘Seirpor, Seirpor, ngua doxl nr nga ni ddei mi ddei bbeix dae a ni ddei ddar mel ca leil biar gger ssi goxr, ni ddei mi ddei bbeix dae a neir ggaxr goxr, ni ddei mi ddei bbeix dae a ddoddomo hal mel bei goxr a zzarmar?’ eine bbeix var. ²³ Nael ngo daxmeix yaa leil ddarkoxl a bbeix: ‘Ngo zeixleixr lei nia leil saexl nr seix, gexr lei gexr nr

^v**7:18** Saer naxrcixl mel nael Arbosobo dax bei mae su ca mel leil bbeix. Saer yojiar mel nael Arbosobo dax bei nr mae su ca mel leil bbeix.

^w**7:22** *Hal cir ni ci a mel*, Arbosobo Ddei Sul ber leil bbeix arddolcar a Yisu jjixr lei nia. Yar jjixr lei ho a, yar ca maelmaerjjia leil ser nia. Arbosobo dax bei mae su mel nael Yisu dax cirgo a hher. Arbosobo dax bei nr mae su mel nael Yisu dax bbe kae a, dixlyuxl gga zeil nia. Martaexl Sul 24 nei 25 halcar ci a arsaesael nga var biar dae.

saexl yarzi gexrddo bei su eil mel nia, halbbaer sael ssi!’ ”

Ca Jilixr Nei Medeil Mel Leil Biar

²⁴ “Yel ha ngo ddar bbeix dae mel noni a, bei ssi su mel, ca yarzi jilixr ar ddei lesel. Ca eil ddei xi zi a legelbbe leil zi deix. ²⁵ Yar ddei sixrjiuxr ddei mel legelbbe leil xi ax deix dae a, almer lei, vi pe, mersi jia a, xi ddei leil ddeix a lei xi ddei de zei nr var. ²⁶ Nael ha ngo ddar bbeix dae mel noni a nr bei ssi su ca mel, ca medeil ar ddei lesel. Ca eil ddei xi zi a sa leil zi deix, ²⁷ almer lei, vi pe, mersi jia a xi ddei leil ddeix a xi ddei dder de zei a. Halae yarzi sael larhor.

²⁸⁻²⁹ Yisu yaa leil biar gger dae eil mel mel Arbosobo ddei sulsaxelsu mel biar gger dae mel le-nr-sel; yar biar dae mel yarzi quexrlixl zza. Yel Yisu eil mel biar jjia a, ca maelmaerjjia lei yar biar dae eil mel leil yarzisael murgur.”

8

Yisu Nopae Su Leil Ggukor Gger

¹ Giedae Yisu worga leil zei lei a, ca cirke a yar dax mae dae. ² Nopae dae ca ar ddei a, yar xilmeir lei a puxr gex dae a bbeix: “Seirpor, ni ngo leil kor lol niazzir arddeirnga a, ngo leil kor lol var.” ³ Yisu leixrhher ddei ce teixl a yar leil ta ssi a bbeix: “Nga ddo, ni kor a!” Yel ca hal ddei cirleixr dder no-nr-pae, kor a.^x ⁴ Yisu yoxl yar leil bbeix: “Ngo ni leil kor

^x**8:3** Nopae su Yisu leil qie a yar leil ggukor gger lol, yar dder seibeix a. Arbosobo ddei Lixlfaxr leil bbeix 1) nopae su mel sei-nr-beix, 2) yaa Arbosobo leil zi ggie xi gga lei ddir nr ddo, 3) yaa lei Arbosobo leil zi ssi nr ddo, 4) ca mel nopae su leil ta a mel dder sei-nr-beix loxr a. Yel Yoxrtaexl su ca mel zzir dae a nopae su mel si dax hher naer nr ddo; yaa lei nopae su dax naer nr yuex, ta nr yuex. Nael Yisu nopae su leil ggukor

lol a mel ca leil bbeix gger nr ddo. Ni Moxrxi vaexr dae Lixlfaxr leil miardal dae mel dax zox dae a, Arbosobo leil zi su ddei dax ssi a, yar leil ni kor ho a saexl lol, halae ni yar leil zilabox gger a, yar leil Arbosobo leil seixl zi gger lol, yel ca mel leil ni kor ho a saexl lol.”

Yisu Meixr Cirxiu Guaxr Su Vaervaerpor Leil Visser Su Ddei Leil Ggukor Gger

⁵ Giedae Yisu Jiabaernoxt kax ddei gga ssi ci a, Loxrmar goxrjia su meixr cirxiu guaxr su vaervaerpor ar ddei a yar xilmeir lei a yar leil qiuxr a bbeix: ⁶ “Seirpor, ngo leil visser su ddei taba a, ake yixr dae a yar solzeixl zildu a.” ⁷ Yisu bbeix: “Ngo yar leil ggu gger ssi.” ⁸ Meixr cirxiu guaxr su vaervaerpor ddei ddarkoxl a bbeix: “Seirpor, ngo ni leil ngo ake gga ssi lol nr piar. Ni ddar ar qier bbeix lalssa, ngo leil visser su ddei dder kor var a. ⁹ Hherdder ngo ggaxrne vaervaerpor mel ngo leil miardal sael a; halae ngo ngo woxrke meixr mel leil miardal sael a. Ngo ca eil ddei leil ‘ni ssi’ bbeix a, ca eil ddei dder ssi a; ngo ca hal ddei leil ‘ni lei’ bbeix a, ca hal ddei dder lei a. Ngo ngo leil visser su ddei leil ‘eine bei ssi nia’ bbeix a, yar dder bei ssi a.” ¹⁰ Yisu ddar eil mel noni ho a yarzi murgur a, yar dax mae dae ca mel leil bbeix: “Ngo nia leil yarzi bbeix gger yar sael a ngo leil einezeixl ddarzzi su mel, ngo Yirsaexllixl ca mel gga lei zeixleixr lei mia nr goxr. ¹¹ Ngo yoxl nia leil bbeix gger, arddolcar a, ca cirke a, dofa piar a gga nei xifa piar a gga lei a, Yalboxrlahar, Yirsar, Yargel yaa dax cirgo a Merhhexr ddei goxr gga zzorci-ddami zzor nia. ¹² Nael Merhhexr ddei goxr gga ddir mibbe, hherdder Yirsaexllixl su ca mel leil zzae doxgoxleixr zalbbaer neixmar ggie^y ggaxr

gger a yar leil seibeix lol. Mixrsuxljil Sul 5:1-3 leil, Lixlweixljil Sul 13-14 leil, halae Semixljil sul 24:8 leil biar dae.

^y**8:12** *zalbbaer neixmar ggie* Zalbbaer neixmarmar ggie mel dder

teixl gger a, yaa ser ddei kexl gex dae a worcixl-worni aenge nia.”^z

¹³ Giedae Yisu meixr cirxiu guaxr su vaervaerpor ddei leil bbeix: “Jjixr ddo a! Ni ngo leil ddarzzi a, ni arsae xiar dae mel arsae nga nia.” Yar leil visser su ddei halcar malmal kor a.

Yisu Ca Mel Leil No Ggukor Gger

¹⁴ Yisu Birdaexr hhexr ake ssi ci a, Birdaexr yoxrmo mel safaex a yixr dae ggie mia a. ¹⁵ Yisu yar leixrhher ddei leil arleixr ta a, sa ddei dder nr faex a; yar dder ha du lei a Yisu leil visser. ¹⁶ Mercixl a, ca mel neir xiex dae ca cirke hier dae a Yisu dax hier mal lei, Yisu ddar ar qier bbeix lalnga dder neir zzu ggaxr teixl lei a; halae no su ca maelmaerjjia leil lei ggukor gger a. ¹⁷ Eil ddei mel dder xiezi Yirsaexlyal bbeix goxr mel yarzi loxr a; yar bbeix:

“Yar lei a mel niul ddei no mel ggukor gger lei.”^a

Yisu Dax Mae A Mel Goxr Sol Var

¹⁸ Yisu ca cirke a yar leil pex gex dae mia a, yar dax mae dae ca mel leil miardal a neixvi deixrgoxr ssi. ¹⁹ Arbosobo ddei sulsaxlsu ar ddei a yar dax lei a bbeix: “Sulmulsu, ni arddol ssi zzorbbeixlei, ngo ni dax mae nia.” ²⁰ Yisu yar leil ddarkoxl a bbeix: “Olddir lei suddu zza, ngax bbiu

dixlyuxl gga nga a.

^z**8:12** Yirsaexllixl su ca mel Arbosobo Ddei Sul ber zza ho a yaa zzir dae a yaa bir kebal ca mel leil lei Arbosobo leil saexl. Nael Loxrmar su eil ddei bir yaa leil ddarzzi. Arbosobo Yirsaexllixl su ca mel leil tiur a yar dax mae dae lol a, yaa zzir dae a arddolcar yaa arsaebeilei Arbosobo dax cirgo a hher cexr. Nael Yisu ddei yilsu mel yar leil ddarzzi su mel larnei Arbosobo dax cirgo a hher cexr.

^a**8:17** Ddar eil qier mel Yirsaexlyal Sul 53:4 leil vaexr goxr a.

dae mel leil cide zza, nael Ca Ddei Ssor^b oldde koxl ggie lei ar maex nr zza.”²¹ Yoxl Yisu dax mae dae su ar ddei a yar leil bbeix: “Seirpor, ngo leil hoba ake jjixr lol a ngabbor leil giexlhex jjixr lol.”²² Nael Yisu bbeix: “Ni ngo dax mae lei! Ca sima leil yaa ddei ca sima leil giexlhex ssi lol.”

Yisu Mersi Jia Nor Lol Bolaxl Ddaexr Nor Lol

²³ Yisu cuaxr leil ddeix a, yar dax mae dae ca mel lei ca dae.²⁴ Neixvi teixlleil neixleixrsael mersi daxlgaxl jia du lei a; ajjix ddei cuaxr jiaxl leil lei mil hex jiur a. Nael Yisu zzael yixrmeixljjiu dae a.²⁵ Yar dax mae dae ca mel yar leil ae zucur gger a bbeix: “Seirpor, ngua leil jiuxl la, ngua si niazzir dae a!”²⁶ Yisu bbeix: “Ngo leil lalal a ddarzzi su mel nia! Arsaenga a eine gexr leir?” Yel dder ha du lei a mersi nei ajjix ddei leil hie a, mersi ddei dder jia nor a; ajjix ddei lei le nor a.²⁷ Yaa yarzi murgur a zzicarzzi dax bbeix: “Ca eil ddei azo ca a leir? Mersi nei ajjix lei yar ddar no.”

Yisu Neir Xiex Dae Ca Nrnal Leil Ggukor Gger

²⁸ Giedae Yisu neixvi deixrgoxr Jiadaxlla mermi^c ssi ci a, neir xiex dae ca nrnal a lixrbbaex cili gga ddux lei a yar dax zzi a. Yaa hazzi wo, ca mel lei jjiumo hal zex leil ssi gel nr cexr.²⁹ Yaa ae dae bbeix: “Arbosobo ddei Ssor, ngua ni dax azo ar ddei guaxrzoxr? Arbosobo ngua leil faxr nixixl ddei nr ci seir, ni dder ngua dax lei a ngua leil goxr sol lol a ngo?”

^b**8:20** *Ca Ddei Ssor* Yisu “Ca Ddei Ssor” bbeix a mel yar armael leil bbeix arddeir a. Daxlyirlir Sul 7:13-14 leil “Ca Ddei Ssor” leil biar goxr a. “Ca Ddei Ssor” ddei mel dder Yirsaexllixl su ca mel ddei Zidu. Zidu mel dder yaa leil jiuxlsu ddei nga a. Yisu “Ca Ddei Ssor” bbeix a mel ca mel leil yar mel dder Zidu nga saexl lol.

^c**8:28** *Jiadaxlla mermi* Arbosobo Ddei Sul cirberber leil a Jiadaxlla mermi ddei leil Gelase mermi lei bbeix.

³⁰ Yaa dax hormolsael vi-nr-mir ggie mel veixr seirseil a ar cir loxl dae,
³¹ yel neir te dder Yisu leil qiuxr a bbeix: “Ni ngua leil ggaxr teixl gger
arddeirnga a, ngua leil veixr ggecir gga ddir lol ddo a!” ³² Yisu yaa leil
bbeix: “Ssi ddo a.” Neir zzu dder ddux lei a, veixr ggecir gga ddir a;
veixr cir dder neixleixrsael lagaxliddur gga beix zeil a; neixvi gga de zeil a,
niuxl zil a. ³³ Veixrloxlsu mel dder zzi gga pa xixl a, yaa mia nei neir xiex
dae ca mel pex dae mel ca mel leil bbeix gger, ³⁴ zzi gga ca maelmaerjjia
lei ddux lei a Yisu leil i lei. Yar leil mia a dder, yar leil qiuxr a, yaa mermi
gga nr hher lol.

9

Yisu Taba Dae Ca Ddei Leil Ggukor Gger

¹ Yisu cuaxr ddei leil ddeix a, neixvi bbe leil gger a, yar hher ggie ddei
gga jjixr ci a. ² Ca ar mel a, goxrzeix sser a taba dae ca ar ddei leil Yisu
xilmeir bbax mal lei a. Yisu mel ca eil mel yar leil yarzisael ddarzzi mia a
dder taba dae ca ddei leil bbeix: “Albor, ni gexr nr ssa, ni ddei zuixl mel
ssoxrsuxl ho a;” eine bbeix a. ³ Nael Arbosobo ddei sulsaexlsu nrnel sael
a nixmox zzar xiar ji dae a bbeix: “Ca eil te giel arsae Arbosobo lar bbeix
ddo ddar mel bbeix leir?” ⁴ Yel Yisu mel yaa arsae xiar dae saexl a dder
bbeix: “Nia arsae nixmox eine neix leir?” ⁵ Ngo ca leil bbeix: ‘Ni ddei zuixl
mel ssoxrsuxl ho a;’ bbaexl, bbeix so? Bbeixsael bbeix: ‘Ni ha du la a ssi
ddo a;’ bbaexl, bbeix so? ⁶ Nael ngo nia leil Ca Ddei Ssor ddei mel
middurbbor ca mel leil zuixl mel ssoxrsuxl quexrlixl zza, saexl lol nia. Yel
Yisu dder taba dae ca ddei leil bbeix: ‘Ha du lei a, ni ddei goxrzeix ddei
vei dae a ake jjixr ddo a!’ ” ⁷ Ca hal ddei dder ha du lei a ake jjixr a.
⁸ Arbosobo mel Yisu leil quexrlixl einezeixl zza lol a, ca mel mia a lei
yarzi gexr, yel dder Arbosobo leil bbeix zae gger.

Yisu Martaexl Leil Tiur

⁹ Yisu zeixleixr ssi a, suixsesu ca ar ddei mia a. Ca eil ddei leil Martaexl^d mi. Yar suix se ggie halmaex cux dae. Yisu yar leil bbeix: “Ngo dax mae lei,” bbeix a, yar dder ha du lei a Yisu dax mae a. ¹⁰ Yisu Martaexl hhexr ake almeixr zzor dae car, suixsesu nei kebal zuixl zza ca cirke lei lei a, Yisu nei yar dax mae dae su ca mel dax cirgo a almeixr zzor. ¹¹ Farlixlsaexl ca mel mia a dder, Yisu dax mae dae su ca mel leil bbeix: “Nia ddei sulmulsu ddei giel arsae suixsesu nei kebal zuixl zza ca mel dax cirgo a almeixr zzor leir?”^e ¹² Nael Yisu bbejjiur a dder bbeix: “Ggecir zzaso su ca mel no i nr ssa, no su mel lar i ssa. ¹³ Arbosobo Ddei Sul ber leil bbeix: ‘Nia ca leil perniar a mel, ngo bir nia ngo leil azo lerler seixl zi leil lei ggese.’^f Nia ddar eil qier arddolyox yilsi a xiar ssi ddo a. Ngo lei a mel armael zzir dae a seir ca mel leil zo lei nr nga, armael zuixl zza saexl su ca mel leil zo lei arddeir a.”^g

Nr Zzor Ddei Leil Biar

¹⁴ Giedae sexlsir gger su Yuehal dax mae dae su ca mel Yisu dax lei a yar leil biex a bbeix: “Ngua nei Farlixlsaexl su ca mel zzor lei nr zzor, nael arsaenga a ni dax mae dae su ca mel zzael zzor?”^h ¹⁵ Yisu yaa leil

^d**9:9** *Martaexl/Martaexl* leil “Lixlweixl” lei ae.

^e**9:11** Suixsesu nei kebal zuixl zza su mel zoxlzoxl a bei nr sir bei, Arbosobo Ddei Sul ber leil vaexr dae ddar mel dax hormolsael bei nr mae, yel Farlixlsaexl su ca mel yaa leil i nr du.

^f**9:13** Farlixlsaexl su ca cirmelmel a yarzi zabbar seilseir a Arbosobo leil zi doxr, nael yaa ca mel leil hormolsael per-nr-niar.

^g**9:13** Farlixlsaexl su ca cirmelmel a zzir dae a armael seir. Suixsesu nei zuixl zza su ca eil mel nael zzir dae a armael nr seir.

^h**9:14** Yoxrtaexl su mel yarzisael Arbosobo dax ddar biar niazzir, halae

ddarkoxl a bbeix: “Mixlyixrsixlⁱ ddei halae yar carbeix mel dax cirgo a hher dae seir car a, yaa arsae cix var bbeixleir? Nael nixixl ddei ci a mel, mixlyixrsixl ddei leil mel hier si du a. Halcar a ci a mel yaa dder zzor lei nr zzor.”

Puxрто Zzibbaer Yarsixl

¹⁶ Yisu yoxl bbeix: “Mae sixl co pia li leil naexrbe a mel, pia xiux si bbaer dax a, bbaer dae ddei gielgiel vaer dax lalnga, yel arseir lei mae sixl co pia ggiexrtaex leil naexrbe su nr zza. ¹⁷ Arseir lei zzibbaer sixl mel zzi bei teixl lei daexlzi li gga ji su nr zza. Nr nga a mel daexlzi ddei bbaer zil a mel zzibbaer ddei lei ssu teixl lei a; zzibbaer jilabox ddei lei xiaxr a. Nael zzibbaer sixl mel zzi bei teixl lei daexlzi sixl gga ji a mel, nr yoxr jjia lei li wo a.”^j

Yisu Ssormaer No Su Ar Ddei Leil Ggukor Gger

¹⁸ Yisu ddar eil mel biar dae car a, Yoxrtaexl su ddei Arbosobo ddei sulzzaggie guaxr su ar ddei lei a, yar leil oldde texl a bbeix: “Ngo ddei ssormaer ddox jiajia nr zza a. Ni yar ggecir ddei leil arleixr ta ssi a yar dder gol du xixl lei var.” ¹⁹ Yisu dder ha du lei a yar dax cirgo a ssi a. Yar dax mae dae su ca mel lei ssi a. ²⁰⁻²¹ Ssormaer eine ar ddei zza. Yar ggecirzza mel sael a sirnilni ddux miur, ceinir koxl nga a. Yisu jjiumo car

yar ddei ddar zabbar seilseir a noni niazzir a, zzo nr zzor.

ⁱ**9:15** *Mixlyixrsixl*/Mixlyixrsixl ddei mel dder Yisu nga a. Yar ddei carbeix mel nael Yisu dax mae dae su mel nga a.

^j**9:17** Pia ggiexrtaex nei daexlzi li mel mel dder Farlixlsaexl su ca mel mul gger dae mel nga a. Mae sixl nei zzibbaer sixl mel nael Yisu mul gger dae mel nga a. Yisu ddei yilsi mel dder bbeix ca mel Farlixlsaexl su ca mel mul gger dae mel leil noni halae yar mul gger dae mel leil lei noni eine bei nr ddo.

gga ssi gel lei a ssormaer eil ddei mel nixmox zzar “Ngo Yisu ddei pia qier leil arleixr ta a dder kor gaxzi var” eine xiar ji dae, yel yar dder Yisu giedae ssi ci a, yar ddei pia qier leil arleixr ta a.²² Yel Yisu za xixl lei a ssormaer ddei leil mia a dder bbeix: “Allor, gexr nr ssa, ni ngo leil ddarzzi a ni no ddei dder kor a.” Yel halcar cirdae a, ssormaer eil ddei no ddei dder kor gaxzi a.²³ Yisu Yoxrtaexl su ddei Arbosobo ddei sulzzaggie guaxr su hhexr ake ssi ci a, cirza-hanga mex dae nei ca mel bbixbbix-bbaxbbax me dae mia a dder bbeix:²⁴ “Nia ddux ddo a; ssormaerssor eil ddox nr si, yar yixrmeixljjiu dae arnar a.” Eine bbeix a, yaa dder yar leil vae.²⁵ Ca mel leil zalbbaer ggaxr teixl gger ho a, Yisu dder ddir a ssormaerssor ddox leixrhher ddei leil gga gex dae a, ssormaerssor ddox dder ha du lei a.²⁶ Yel yar bei dae eil mel mel cirmaex-hanga lei biar ci a.

Yisu Mia Nr Xie Ca Nei Ddar Te Nr Var Ca Leil Ggukor Gger

²⁷ Yisu yoxl zeixleixr ssi a, meix nr mia ca nnel a yar giedae mae dae a worcixl-worni ae dae a bbeix: “Daxlweixl giedae ca, ngua leil arleixr zoxlnixr la!”²⁸ Yisu ake ddir ci a, meix nr mia ca hal nnel dder Yisu dax lei a. Yel Yisu bbeix: “Nia ngo nia leil ggukor gger var ddarzzizzi?” Yaa bbeix: “Seirpor, ngua ddarzzi,” eine bbeix a.²⁹ Yisu dder yaa meixddur ddei leil ta a bbeix: “Nia ddarzzi a dder nia arsae xiar dae arsae nga lol ddo a!”³⁰ Yaa ddei meixddur ddei dder mia xie a. Nael Yisu yaa leil zabbar seirseir a miardal a bbeix: “Nia fadae nia, eil mel ca leil saexl lol nr ddo.”³¹ Nael yaa zzael ddux a dder eil zzu yaa dax halbbaer biar jiax a.

³² Yaa ddux car a, ca mel neir xiex dae a ddar te nr var ca ar ddei leil Yisu dax hier mal lei.³³ Yisu neir te ggaxr teixl gger a, ddar te nr var ca hal ddei dder te var a. Mia su ca mel lei yarzi murgur a bbeix: “Yil, Yirsaexllixl goxrjia gga zeixleixr lei eine mia nr seix.”³⁴ Farlixlsaexl ca

mel zzael bbeix: “Yar mel neir zzirmar^k te leil koxl dae a neir ggaxr arnar mei!”

Loxlmoxr Se Su Nganiul

³⁵ Yisu mel zzi nei kax cirddeir-hanga gga ssi a, Yoxrtaexl su mel Arbosobo ddei sulzzaggie gga ca leil mul gger a Merhhexr ddei goxr gga ddar seirseir mel biar gger, halae cirza-hanga no ggukor gger. ³⁶ Nael Yisu ca cirke mia a, yaa mel goxr sol, zoxlnixr ddo hherdder acixl ya mel leil loxl su nr zza sael a nga a, yel Yisu yaa leil perniar. ³⁷ Yar dder yar dax mae dae su ca mel leil bbeix: “Loxlmoxr selabox zzael miur, se su ca zzael nganiul. ³⁸ Yel nia loxlmoxr ddei Seirpor ddei leil qiuxr a wormusu mel leil yar ddei loxlmoxr mel se ssi lol.”^l

10

Yisu Yar Mul Teixl Lei Ca Ceinirmo Leil Zi Teixl

¹ Yisu dder yar dax mae dae ca ceinirmo leil ae si lei a, yaa leil neir ggaxr teixl xie, cirza-hanga no ggukor xie quexrlixl gger. ² Yar miardal dae ca eil ceinirmo mel dder, Ximexr Birdaexr, yar ddei nimar Adaexrlixl, halae Xibirtaexl ddei ssor Yargel nei Yargel ddei nimar Yuehal, ³ yoxl Feilixl nei Badoloxrmaer, Domar nei suixsesu Martaexl, Yallexlfei ddei ssor Yargel, halae Daxrtaexl nei ⁴ Loxrmr goxrjia leil dir su Ximexr, halae yoxl Yisu leil vurlelsu Jialuxl mermi su Yoxrdaxl lei ca dae.

^k**9:34** *neir zzirmar* Neir zzirmar mel dder Sardaxl te nga a.

^l**9:38** Loxlmoxr ddei Seirpor mel dder Arbosobo nga a. Loxlmoxr se su mel dder Yisu dax mae dae su ca mel nga a. Loxlmoxr mel dder Yisu leil nr saexl seir ca mel nga a. Bir dae a bbeix dae eil ddei ddei yilsi mel dder bbeix Yisu leil ddarzzi su mel Arbosobo leil qiuxr a, yel ca mel leil Yisu arseir a biar gger ssi lol.

⁵ Yisu ca eil ceinirmo leil miardal teixl a bbeix: “Yirsaexllixl su nr nga ca mel ddei mermi gga nia ssi nr ddo, Sarmarlixlyal su ca mel ddei kax gga lei nia ddir nr ddo. ⁶ Nia mel Yirsaexllixl su ngo dax nr mae dae ca mel dax ssi nia.” ⁷ Yel arddolmaex ssi ci zzorbbeixlei yaa leil: ‘Arbosobo ca mel leil yar ddei goxr gga ddir lol du a lo’ eine biar gger. ⁸ No su ca leil ggukor gger, si ho ca leil gol du xixl lei lol, nopae su leil kor lol, neir xiex dae mel leil neir ggaxr teixl gger. Arbosobo nia leil cirza-hanga meixl gger a mel, nia lei si leil bei meixl gger nia. ⁹⁻¹⁰ Miar bei su mel zzorlabox li wo mibbe, yel nia maelsael gga zzirbae ji nr ssa, jjiumo ssi a lei lixlba vei nr ssa, pia lael tei, qixnex lael tei nei zzargger lei vei nr ssa.

¹¹ Nia zzi arddol ddei gga ddir ci, kax arddol ddei gga ddir ci zzorbbeixlei, arseir nia leil hexl yuex a mel, nia dder ha hhexr dax hher, hherdder nia ssi zzeze hher ci. ¹² Nia yar dax ddir ci a mel yar leil zzasoso dae biex nia. ¹³ Nia eine bbeix a mel, yar nia leil hexl a dder cirhhexr-lorbba lei zzaso var; nael nia leil nr hexl a mel, nia bbeix dae ddar qier mel baexr a bbeix a. Yaa dder zzaso nr var. ¹⁴ Ha ca mel nia leil nr hexl nei nia ddei ddar nr no a mel nia dder hal hhexr dax bbeixsael zzi hal ddei gga hher nr ssa. Nia ssi car qihher ddei leil niaxl gex dae nilme mel to pixl nia.” ¹⁵ Ngo nia leil yarzi bbeix gger: Arbosobo ca leil ser lei hal cir ni ci a mel, Sordomar zzi gga nei Exrmoxrla zzi gga

^m**10:6** *Nia mel Yirsaexllixl su ngo dax nr mae dae ca mel dax ssi nia* Xilaxl ddar bbeix: “Yirsaexllixl su ca hhexr ddei ya mel ssi pixl a.” Yilsi ddei mel Yirsaexllixl goxrjia gga Arbosobo dax bei nr mae dae su Yoxrtaexl su ca mel leil bbeix arddeir a.

ⁿ**10:14** *Nia ssi car qihher ddei leil niaxl gex dae nilme lei to pixl nia.* Nilme mel to pixl, eine bei a mel ca mel leil Arbosobo yaa leil faxr nia saexl lol.

ca mel halae zzi hal ddei gga ca mel sael a lar-nr-hor!”^o

¹⁶ Yisu yoxl bbeix: “Ngo nia leil zi teixl a mel, ya mel veimar cili gga ddir sael a nga, yel nia sae sael jiuxr nia, nael dderbel sael a seirseir eine nga nia. ¹⁷ Ca mel mel nia leil Yoxrtaexl su ddei vaervaerpor cir leil jia gger, halae Yoxrtaexl su mel Arbosobo ddei sulzzaggie gga nia leil deil, yel nia ca mel leil fadae nia lo. ¹⁸ Nia ngo leil ddarzzi a, yoxl nia leil vaervaerpor nei zzirmar^p mel dax ssu dol gger. Eine nga a mel nia dder Yoxrtaexl su nr nga ca mel leil ngo mel arseir a biar gger cexr. ¹⁹ Nia leil ssu dol gger car, nia arsae bbeix nia, arddolyox ddar bbeix nia zoxrzixr nr ssa. Halcar ci a, arsae bbeix nia mel Arbosobo ddei Xiu ddei nia leil bbeix teixl lei lol var. ²⁰ Nia ddar bbeix car a mel, armael bbeix dae nr nga a nei, Arbosobo ddei Xiu^q ddei nia leil bbeix teixl lei lol arddeir a.”

²¹ “Arzzi-nimar mel lei arzzi-nimar leil vur lel, arbbor lei ssor leil vur lel, yaa zzicarzzi leil si lol; aniux mel lei arbbor ama dax dir, yaa leil bei zil gger lol. ²² Halae nia ngo leil ddarzzi a, ca mel nia leil vuxryixr. Nael nia zabbar seirseir a sser gex dae a, Arbosobo leil ddarzzi doxr dae a nia leil jiuxl wo ddo. ²³ Nia eilmaex gga hher dae a, ca mel nia leil bixr a mel, nia dder halmaex gga pa mal. Ngo nia leil yarzi bbeix gger, nia Yirsaexllixl goxrjia gga lei ssi jiax nr jjia seir, Ca Ddei Ssor dder jjixr lei du a.”

^o**10:15** Sordomar kax nei Exrmoxrla kax gga ca mel zuixl yarzi neixl. Arbosobo kax eil mel leil bei xiaxr gger a. Nael Yisu bbeix yar leil ddar-nr-zzi zuixl ddei bir yaa ddei zuixl ddei leil neixl. Cuaxlsixljil Sul 19:1-29 gga Sordomar kax nei Exrmoxrla kax leil biar dae.

^p**10:18** *goxrjia ddei vaervaerpor nei zzirmar* Halcar vaervaerpor nei zzirmar mel Yoxrtaexl su nr nga, Loxrmar goxrjia su a.

^q**10:20** *Arbosobo ddei Xiu* Xilaxl ddar bbeix: “Arbbor ddei Xiu” eine bbeix a. Merhhexr Arbbor ddei Xiu mel dder Arbosobo ddei Xiu nga a. Seirceix-seirmaer ddei Xiu lei bbeix.

²⁴ “Sulzzasu mel sulmulu leil saexl nr leixl, wormusu lei yar ddei seirpor leil ddo nr leixl. ²⁵ Yel sulzzasu mel sulmulu sael a nga, wormusu lei yar ddei seirpor sael a nga dder ddo a. Ca hhexr seirpor ddei leil lei si yar leil neir zzirmar Bixrsipur a bbeix mel, yar ake ca hhexr leil gielgiel bbeix vuxr-nr-yixr arddollei?”^s Yel nia ca mel ngo leil nr seir lei nia leil seir var zzir nr ssa.

²⁶ “Arddolcar mel kerzi dae maelmaerjjia lei bbeix teixl lei nia, halae cirza-hanga ca leil nr saexl lol mel lei maelmaerjjia ca leil saexl lol nia; yel nia yaa leil gexr nr ddo. ²⁷ Ngo nia leil neixmar ggie bbeix gger dae ddar mel lei nia bbele ggie bbeix teixl lei nia; nia bbejjiur ddar mel lei xipaebbor worcixl-worni bbeix teixl lei nia. ²⁸ Ggecir ddei leil seixl cexr arnar, xiu ddei leil seixl nr cexr, ca hal mel leil gexr nr ddo. Arbosobo mel xiu ddei nei ggecir ddei leil dixlyuxl gga piar ji gger var, yel yar leil gexr nia. ²⁹ Zzugal nnel mel zzirbae cir fei a vur wo ddo bbeixarnar, nael nia ddei merhhexr gga hher dae Arbbor bbeix nr goxr arddeirnga a mel, zzugal eil mel mel middur leil cir ddei lei de zei lei nr var.

³⁰ Hherdder nia olce hormo ba zza lei Arbosobo hhe goxr a. ³¹ Arbosobo zzir dae a nia bir zzugal cirke leil hormo perniar leixl, yel nia gexr nr ddo.”

³² “Ha ca meixsaer qier leil ngo leil saexl bbeix su ca mel, ngo ddei merhhexr Arbbor meixsaer qier leil lei ngo yar leil saexl bbeix; ³³ ha ca meixsaer qier leil ngo leil nr saexl bbeix su ca mel, ngo ddei merhhexr Arbbor meixsaer qier leil lei ngo yar leil nr saexl bbeix.”

^s**10:25** Sulzzasu nei wormusu mel mel Yisu dax mae dae su mel leil bbeix arddeir a. Sulmulu nei seirpor nael Yisu leil bbeix arddeir a. Yisu ddei yilsi mel dder ca mel yar leil bixr a mel arsaebeilei yar dax mae dae su mel leil lei bixr var.

³⁴⁻³⁶ “Ngo lei a mel,
ssor zzae arbbor dax dir,
ssormaer zzae ama dax dir,
cirmu zzae yoxrmo dax dir,
ca leil vuxryixr su ca mel dder armael ca hhexr nga a.^t”

Yel nia ngo lei a ca mel zzi dax toltor a nga zzir nr ddo, ngo lei a ca mel zzi dax toltor a nr nga, zzi dax zzideil.”

³⁷ “Armael ddei arbbor ama leil perniar a bir ngo leil perniar su ca mel ngo dax mae dae su ca bei nr piar; armael anix leil perniar a bir ngo leil perniar su ca mel lei ngo dax mae dae su ca bei nr piar. ³⁸ Ngo leil weix a armael ddei sixrzixljiaxl ddei bber nr yuex hherdder goxr sol mel goxr nr yuex a lei ngo dax mae dae su ca bei nr piar. ³⁹ Armael leil weix a gol dae ca mel, armael olga ddei pixl nia hherdder yar dixlyuxl gga zei nia; nael ngo leil weix a gol dae ca mel, olga zza var hherdder merlabbor ddeix a Arbosobo dax cirgo a hher nia.”

⁴⁰ “Arseir nia leil hexl a mel dder ngo leil hexl sael a nga; ngo leil hexl a mel dder ngo leil zi mal lei su hal ddei leil hexl sael a nga. ⁴¹ Arseir xiezi ar ddei leil hexl a mel, yar xiezi leil ggerlabox mel sael a li wo ddo; arseir ca seir ar ddei leil hexl a mel, yar ca seir ddei leil ggerlabox mel sael a li wo ddo. ⁴² Yel arseir ngo dax mae dae su mi-nr-ddux ar ddei leil ajjix cixl ar bei dda lol a mel, ngo nia leil yarzi bbeix gger, ngo seirseir mel ajjix gger su ddei leil nr gger arddollei?”

11

Yisu Nei Sexlsir Gger Su Yuehal

^t10:34-36 Yisu leil ddar-nr-zzi su mel yar leil ddarzzi su mel leil dir.

¹ Yisu yar dax mae dae su ca ceinirmo leil miardal teixl ho a dder halmaex nr hher a. Jialixllixl mermi kebal kax gga ssi a ca mel leil Arbosobo ddei ddar biar gger nei mul gger ssi.

² Yuehal leil ge ji dae car, yar Yisu Zidu bei dae eil mel bbejjiur a dder yar dax mae dae ca mel leil zi teixl a, ³ Yisu leil biex ssi lol a bbeix: “Arbosobo tiur a ca leil jiuxlsu ngua dax lei hal ddei mel dder ni nga nga? Bbeixsael ngua halae kebal ca leil xia dae nia seir?” eine bbeix lol.

⁴ Yisu yaa leil ddarkoxl a bbeix: “Nia bbejjiur wo, mia wo eil mel Yuehal leil bbeix gger jjixr. ⁵ Hherdder ca mia nr xie mel lei mia xie a; pirdael dae ca mel lei ssi var a; nopae dae mel lei kor a; nolbbar dae mel lei bbejjiur xie a; ca si ho mel lei gol du xixl lei a; casolssor mel lei ddar seirseir mel noni wo a.” ⁶ Azo pex dae zzorbbeixlei, ngo leil ddarzzi doxr su mel Arbosobo yaa leil seir lol.”

⁷ Yaa ssi jixr ho a Yisu dder Yuehal leil ca mel leil biar gger a bbeix: “Halleix nia mipaerbbae gga ssi a mel azo i ssi? Holbbaexl nia mersi jia a ha dae silmaelyor mel leil igax ssi a ngo? ⁸ Nia ddux a mel azo i ssi? Holbbaexl nia pia naxrcixl veixr su mel leil i ssi a ngo? Ca hal mel mel pia naxrcixl veixr dae a zzirmar hher ggie hher dae zzarmar? ⁹ Nia ddux a mel azo i ssi? Nr nga nia doxl xiezi leil i ssi zzarmar? Ngo nia leil bbeix gger: Yuehal bei dae mel bir kebal xiezi bei dae mel leil vaer leixl.

¹⁰ Arbosobo Ddei Sul ber leil vaexr dae a Arbosobo bbeix:

‘Ngo ca ar ddei leil miardal a,
ni xilmeir jjiumo bei zaxr ssi lol,’^v

eine bbeix dae ca ddei mel dder Yuehal nga a.

^u**11:5** Yirsaexlyal Sul 29:18-19; 35:5-6; 61:1 leil vaexr goxr a.

^v**11:10** Yirsaexlyal Sul 40:3 leil nei Marlazi Sul 3:1 leil vaexr goxr a.

¹¹ Ngo nia leil yarzi bbeix gger: middurbbor ca mel gga mel bir sexlsir gger su Yuehal leil vaer leixl su ar ddei nr zza. Nael Merhhexr ddei goxr gga mel, ca ye zzir ddei lei bir Yuehal gol dae seir car leil vaer leixl.

¹²⁻¹³ Xiezi vaexr dae sul mel nei Lixlfaxr maelmaerjjia Merhhexr ddei goxr ddei arsae lerler nga bbeix har zaxr a Yuehal dax zzezze bbeix ci a. Yel Yuehal ca mel leil mul gger du lei cirdae a eilleix zzezze lei, Merhhexr ddei goxr mel ho bei ho vaer; ca mel ho bei ho bbex dil niazzir.

¹⁴ Nia xiezi mel bbeix zaxr goxr mel leil ddarzzi yuex arddeirnga a, Yuehal mel dder lei nia bbeix dae Yirlixlyal mi hal ddei nga a. ¹⁵ Nia zabbar seilseir a noni dae nia.

¹⁶ Ngo eilleix ca mel leil arddolyox dax bir gger nia neil? Yaa mel dder zzaegu vur ggie zzijiul gga cux dae anix mel sael a nga. Yaa, yaa ddei gaxggor carbeix mel leil ae dae a bbeix:

¹⁷ ‘Nguia nia leil mexlur mex gger dae a,
nia huade nr tiuxl;
ngua nia leil aenge gger dae a,
nia ae-nr-nge.’

¹⁸ Hherdder bbeix Yuehal lei a, yar zzorciddo mel lei nr zzor, puxrto zzipbaer lei nr dda, ca mel dder bbeix yar leil neir xiex a. ¹⁹ Ca Ddei Ssor lei a, zzor lei zzor, dda lei dda zzae, ca mel yoxl bbeix ‘zzormeixr-ddasil nei zzipbaer ddayixrboxr ca ar ddei a; halae suixsesu nei zuixl zza su ca mel ddei gaxggor carbeix a,’ eine bbeix a. Ca mel Arbosobo bbeix dae mel dax bei mae dae a mel, arseir lei yar bbeix dae a mel hoxr saexl var.”

Arbosobo Leil Ddar-nr-zzi Su Leil Faxr

²⁰ Nael Yisu murgurgurmo ddoddomo bei goxr kax hal mel gga ca mel

halae huixr-nr-soxr a dder, yaa leil hie a bbeix: ²¹ “Gelaxuxl kax gga ca mel, nia zoxr a! Boxrsaexldaxl zzi gga ca mel, nia zoxr a! Ngo nia kax gga nei zzi gga murgurgurmo ddoddomo bei dae mel, Tuiloxr zzi nei Siduixl zzi^w gga bei arddeirnga a, halmaex gga ca mel arddol-cirsil dder zzir pia veixr dae a, kurlu gga cux dae a, huixrsoxr ho a.^x ²² Nael ngo nia leil bbeix gger: Arbosobo ca leil ser lei hal cir ni ci a mel, Tuiloxr zzi nei Siduixl zzi gga ca mel halae nia sael a lar-nr-hor! ²³ Jiabaernoxxr kax gga ca mel nia zzir dae a nia merlabbor ddeix a ngo? Nael Arbosobo nia leil dixlyuxl gga dder zei gger nia.^y Ngo nia dax halmaex gga murgurgurmo ddoddomo bei dae mel Sordomar zzi gga bei arddeirnga a, zzi hal ddei eilleix halae zza dae var seir. ²⁴ Nael ngo nia leil bbeix gger: Arbosobo ca leil ser lei hal cir ni ci a, Sordomar zzi gga ca mel halae nia sael a lar-nr-hor.”^z

Bei Le Su Yisu Dax Lei A Wornol Cexr

^w**11:21** *Tuiloxr zzi nei Siduixl zzi* Zzi eil nrel gga ca mel yarzi gexrddo bei nr sir bei. Yaa ddei zuixl mel leil Yirsaexlyal Sul 23, Yilixlmir Sul 25:22; 47:4, Yirsijiexr Sul 26–28, nei Amoxrsi Sul 1:9–19 gga biar dae.

^x**11:21** Halleix ca mel huixrsoxr niazzir a zzir pia veixr dae cexr, kurlu gga cux ji cexr.

^y**11:23** Gelaxuxl kax, Boxrsaexldaxl kax, nei Jiabaernoxxr kax eil mel mel Yoxrtaexl su ca ddei kax a. Kax eil mel gga ca mel Arbosobo Ddei Sul ber zza ho a; Yisu ddei ddar noni goxr a; Yisu azo lerler bei ggie lei mia goxr a. Yel yaa Yisu leil ddarzzi mibbe, halae huixrsoxr nia, nael yaa huixr-nr-soxr.

^z**11:24** Tuiloxr zzi, Siduixl zzi, nei Sordomar zzi eil mel mel Yoxrtaexl su ca ddei zzi nr nga. Yaa ddei zuixl yarzi neixl. Nael Yisu bbeix Yoxrtaexl su yar leil ddar-nr-zzi zuixl ddei bir kebal su ca ddei zuixl ddei leil neixl.

²⁵ Halcar a, Yisu bbeix: “Arbbor, merlo-milo ddei Seirpor, ngo ni leil nawo! Ni ngo ddei ddar mel, armael zzir dae a jilixr ca mel, ni yaa leil nr saexl lol, ni leil ddarzzi a aniuksor sael a ca hal mel leil lar saexl lol.

²⁶ Arbbor, ni eine bei a mel, ni armael dax nixmox lodda a. ²⁷ Cirza-hanga lei Ngabbor ngo leil jia gger arddeir a. Ngo arseir a mel Arbosobo lar saexl; Arbosobo arseir a mel ngo lar saexl, halae ngo ca leil Arbosobo arseir a saexl lol a saelnei yaa saexl var. ²⁸ Sulku su mel nei bei le su hazza ngo dax eilmaex lei ddo a. Ngo dder nia leil wornol lol. ²⁹⁻³⁰ Ngo mel nixmox nor, nr col. Ngo ddei lorleix ddei mel bil so halae bil la. Yel nia ngo dax cirgo a lorleix bil nei ngo dax bei zza, eine nga a mel nia ddei nixmox ddei zzaso var.”^a

12

Wornol Nixixl Cir Ni Leil Biar

¹ Hormo ardae nr goxr seir wornol nixixl eine ar ni a, Yisu mel so mi dax ssi gel. Yel yar dax mae dae ca mel dder almeixr meixr a, so ne ngaxl lel du lei a. ² Nael Farlixlsaexl ca mel mia a dder Yisu leil bbeix: “Ni dax mae dae su ca mel giel arsae wornol nixixl miar bei nr ddo cir ni miar bei leir?”

³ Nael Yisu yaa leil ddarkoxl a bbeix: “Daxlweixl^b nei yar dax mae dae

^a**11:29-30** Sulku su mel nei bei le su ca mel hherdder Farlixlsaexl su mel miardal dae ddar mel leil noni doxr ca mel nga a. Farlixlsaexl su mel miardal dae ddar mel yarzi sael miur a, yaa nixmox zzasol. Yisu ddei lorleix mel dder yar miardal dae ddar mel leil bbeix. Yisu ddei lorleix bil su hal mel nael dder Yisu miardal dae ddar mel leil noni su ca mel nga a; Yisu yaa leil beijjiu a yaa nixmox zzaso var.

^b**12:3** *Daxlweixl*/Daxlweixl mel dder Yirsaexllixl su ddei porpor. Yar mel

ca mel almeixr meixr a, yaa arsae lerler bei a mel, Arbosobo Ddei Sul ber leil vaexr deix dae. Nia eil mel leil zza goxr a zzarmar?^c ⁴ Moxrxi vaexr dae Lixlfaxr leil bbeix Arbosobo leil zi dae aba mel yaa zzor nr ddo, Arbosobo leil zi su mel lar zzor ddo. Nael Daxlweixl mel Arbosobo ddei xi gga ddir a, aba mel zzor, yoxl yar dax cirgo a ca mel leil zzor lol.^d ⁵ Halae yoxl Lixlfaxr leil vaexr dae a bbeix Arbosobo leil zi su mel wornol nixixl cir ni Arbosobo leil zi ggie xi gga, Arbosobo leil visser a, miar bei bbeixarnar, yaa halae zuixl nr zza. Eil mel lei nia zza goxr a zzarmar?⁶ Ngo nia leil bbeix gger: Eilmaex mel bir Arbosobo leil zi ggie xi ddei leil lei vaer leixl ca ar ddei zza.⁷⁻⁸ Ca Ddei Ssor mel wornol nixixl cir ni ddei Seirpor a. Arbosobo Ddei Sul ber leil vaexr dae a bbeix: ‘Nia ca leil zoxlnixr a mel ngo bir nia ngo leil zi leil ggese.’^e Nia ddar eil qier noni wo xie arddeirnga a dder, ngo dax mae dae su mel leil zuixl zza bbeix nr var a.”

⁹ Yisu halmaex nr hher a, Yoxrtaexl su mel Arbosobo ddei sulzzaggie gga ddir ci a. ¹⁰ Halmaex mel leixrhher ar bbor noddexr dae ca ar ddei zza. Farlixlsaexl su ca mel Yisu leil goxl niazzir a dder yar leil biex a bbeix: “Wornol nixixl cir ni ca leil no ggu gger ddo ddo?”

¹¹ Yisu bir dae a yaa leil ddarkoxl a bbeix: “Nia arseir ya ar ddei zza a, wornol nixixl cir ni bbeddur gga de ze i si a, holbbaexl gga deix nr xixl lei

Yirsaexllixl goxrjia ddei zzirmar yarzi middux ar ddei a.

^c**12:3** Sarmur'aer Sul Vaexr Beil Ber 21:1-6 leil biar dae.

^d**12:4** Arbosobo leil zi su mel wornol nixixl cirboxl-hanga lei Arbosobo leil zi dae aba mel lael box. Yel yaa xilmeir halboxl zi dae mel zzor ddo; kebal ca mel nael zzor nr ddo. Lixlweixljil Sul 24:5-9 leil biar dae.

Marker Sul 2:23-28 bbeix Arbosobo leil zi su vaer zzir ddei Daxlweixl leil aba gger a zzor lol. Eine nga a mel yar aba zzor a lei zuixl nr bei.

^e**12:7-8** Hexrxi'a Sul 6:6 leil vaexr dae.

a ngo? ¹² Ca mel mel bir ya leil hormo perniar leixl zzarmar? Yel wornol nixixl cir ni seirseir bei a mel bei ddo.”

¹³ Yisu dder leixrhher noddexr dae ca hal ddei leil: “Ni ddei leixrhher bbor cei teixl la,” eine bbeix a. Yar leixrhher bbor cei teixl lei a dder kor a; nr no dae halbbor dax ciryoxr a nga a. ¹⁴ Farlixsaexl ca mel dder ddux a, zzi dax Yisu leil arsae bei zil gger nia zzubbe ssi.

Arbosobo Tiur Teixl Lei A Yar Leil Visser Su

¹⁵ Yisu saexl a dder halmaex nr hher a; yar dax ca seirseil a ar ke mae dae. Yar mel ca mel gga no su maelmaerjjia leil ggukor gger a. ¹⁶ Yoxl yaa leil miardal a yar arseir a bbeix nr ddo eine bbeix. ¹⁷ Eil ddei mel dder xiezi Yirsaexlyal bbeix goxr mel yarzi loxr a. Yar bbeix:

¹⁸ “Ngo tiur har dae, ngo perniar dae, ngo leil visser su ddei,
yar bei dae mel ngo dax nixmox lodda;
ngo, ngo ddei Xiu ddei yar leil gger nia,
yar ngo mabbabba arla cassor-worssor mel leil ser yaa leil bbeix
gger ssi nia.

¹⁹ Yar si dax nr zex, bbialil-bbialor ddar nr biar,
zzijiul gga ca mel lei yar ddei qiurte ddei leil bbejjiur su nr zza.

²⁰ Yar ca naexlbix hal mel leil zoxlnixr
hherdder yar nixl biax dae bbixrmo mel leil ngaxl te nr gger;
bbiu zil niazzir dae de ddei lei mex zil nr gger hal mel sael a nga.
Yar bbaehhexhex mel bei doxr dae a, nr seir hal mel leil bei leixl
gaxzi gger.

²¹ Yel mer woxrke cassor-worssor hazza lei yar leil lei loxia nia.”^f

^f**12:21** Yirsaexlyal Sul 42:1-4 leil vaexr dae. Ddar eil mel mel Yisu leil biar dae arddeir a.

Yisu Nei Neir Zzirmar Bixrsipur Leil Biar

²² Giedae ca mel neir xiex dae a mia nr xie, ddar te nr var ca ar ddei leil Yisu dax halmaex hier mal lei a, Yisu dder yar leil ggukor gger a, ddar lei te var, mia lei mia xie a. ²³ Yel ca mel dder yarzi murgur a bbeix: “Yil! Ca eil ddei giel Daxlweixl ddei Ssor⁹ a zzar?”

²⁴ Nael Farlixlsaexl ca mel bbejiur a dder bbeix: “Yar mel neir zzirmar Bixrsipur^h te leil koxl dae a neir ggaxr arnar a mei!”

²⁵ Yisu yaa azo xiar ji dae saexl a dder yaa leil bbeix: “Ha goxrjia arddol ddei gga ca mel zzi dax zex bei tor nr ddo a mel, goxrjia ddei dder bei xiaxr gger var; ha zzi arddol ddei gga ca mel zzi dax zex bei tor nr ddo, ha ake cir hhexr a zzi dax zex bei tor nr ddo a lei xiaxr var.

²⁶ Sardaxl car Sardaxl ggaxr a mel dder zzicarzzi dax zex a. Eine nga a mel yar ddei goxr ddei arsae zza dae var seir bbeixleir? ²⁷ Ngo neir zzirmar Bixrsipur leil koxl dae a neir ggaxr arddeirnga a, halmel nia dax mae dae ca mel lei Bixrsipur leil koxl dae a neir ggaxr lalnga. Nael nia dax mae dae su mel Bixrsipur leil koxl dae nr nga a mel, ca mel dder nia bbeix dae mel nr hoxr saexl a. ²⁸ Nael ngo Arbosobo ddei Xiu ddei leil koxl dae a neir ggaxr a mel, ca mel Arbosobo ddei goxr gga ddir cexr hherdder Arbosobo ca ddei zzirmar bei lei zi ci a.”

²⁹ Yisu yoxl bir dae a bbeix: “Ca mel mel arsae yarzi sexr ca ar ddei ddei ake ddir a yar ddei zzaegu su ssi cexr? Nrbba dder yarzi ser ca eil

⁹**12:23** *Daxlweixl ddei Ssor* Yisu mel Daxlweixl ddei ssor nr nga; yar giedae ca ar nga. Yirsaexllixl su ca mel saexl, Daxlweixl giedae ca ar ddei a Zidu loxr nia. Halcar ca cirmelmel a zzir dae a Yisu mel Zidu, yel yaa dder “Daxlweixl ddei Ssor” eine ae arddeir a.

^h**12:24** *neir zzirmar Bixrsipur* Neir zzirmar te leil mel cirdaedae a nael Bixrsipur ae, cirdaedae a nael Sardaxl ae.

ddei leil hoba neixl gex du lei a sael yar ddei zzaegu su ssi a nga arnar a.

³⁰ Nael ngo dax cirgo a nr bei su ca mel, hherdder ngo leil dir su mel nga a; ca mel leil ngo dax nr lei lol su mel, hherdder ca mel leil ngo dax bbe kae gger su mel nga a.ⁱ ³¹ Yel ngo nia leil bbeix gger: ca mel zuixl bei nei si leil bbeix vuxryixr a lei, Arbosobo halae yaa leil ssoxrsuxl, nael ha Arbosobo ddei Xiu ddei leil bbeix vuxryixr a mel dder yar leil ssoxr-nr-suxl. ³² Ha ca mel Ca Ddei Ssor leil bbeix no, Arbosobo yaa leil ssoxrsuxl, nael ha Arbosobo ddei Xiu ddei leil bbeix no a mel, eilleix cirdae a cirse-cirsil zzezze lei ssoxr-nr-suxl.”

³³ Yisu yoxl bir dae a bbeix: “Saer ddei leil i a dder saer zzei zzei arsaesael nga i teixl lei ddo, yel saer zzei zzei naxrcixl a dder saer ddei lei naxrcixl; saer zzei zzei yojjar a dder saer ddei lei yojjar. ³⁴ Sae yarzi duxr eil mel nia! Nia nixmox zzar arsae xiar dae dder meir ddei gga arsae bbeix teixl lei. Yel nia nixmox neix su ca eil mel mel arsae ddar seirseir bbeix teixl lei xie bbeixleir? ³⁵ Ca seir mel nixmox ddei lei seir a mel dder seirseir bei teixl lei; ca nr seir mel nixmox ddei lei nr seir a mel dder nr seir bei teixl lei. ³⁶⁻³⁷ Yel ngo yoxl nia leil bbeix gger: Arbosobo ca leil ser lei hal cir ni ci a mel, ca mel bbeix goxr ddar mel leil zox dae a yaa leil ser nia. Yel nia leil ser a, nia bbeix goxr ddar mel leil zox dae a, nia zuixl zza bbeixsael zuixl nr zza dixl gger.”

Farlixsaexl Su Ca Mel Ddoddomo Qiuxr

³⁸ Eine goxr ho a, Arbosobo ddei sulsaexlsu nei Farlixsaexl su ca mel dder Yisu leil bbeix: “Sulmulsu, ni Arbosobo lar bei var ddoddomo ar ddei bei a ngua leil i lol la,” eine bbeix.

ⁱ**12:30** *ca mel leil ngo dax nr lei lol su mel, hherdder ca mel leil ngo dax bbe kae gger su mel nga a* Xilaxl ddar bbeix: “ngo dax cirgo a se nr pex su hal mel mel hherdder ngo leil bei bbeir gger su mel nga a,” eine bbeix.

³⁹ Yisu yaa leil ddarkoxl a bbeix: “Nia eilleix gol dae ca eil coxr mel yarzi nix neix, Arbosobo leil ddarzzi nr yuex, nia ngo leil ddoddomo ar ddei bei eine qiuxr. Nael Arbosobo xiezi Yuenaxr^j leil arsae lerler nga lol eil ddei leil cuxrteixl a mel, zeixleixr lei nia leil azo i lol ddu nr zza.

⁴⁰ Yuenaxr mel ngol xilbe gga so xixl so ni hher ji a; Ca Ddei Ssor lei middur zzar so xixl so ni hher ji nia. ⁴¹ Yuenaxr Nixrnixrwei zzi gga ca mel leil nr seir mel zeixleixr bei nr ddo bbeix a, yaa dder huixrsoxr a. Nia ardae i, eilmaex mel bir Yuenaxr leil vaer leixl ca ar ddei zza, nael eilleix ca mel yar ddei ddar mel ddar-nr-zzi. Yel Arbosobo ca leil ser lei hal cir ni ci a mel, Nixrnixrwei zzi gga ca mel lei eilleix ca eil coxr leil goxl lei nia. ⁴² Halae naxrfa piar a gga ssormaer zzirmar hal ddei, vimirmir ggie lei a, Sorloxrmexr zzirmar olnoldduddumo ddar biar ggie noni lei. Nia ardae i, eilmaex mel bir Sorloxrmexr zzirmar ddei leil vaer leixl ca ar ddei zza, nael eilleix ca mel yar ddei ddar nr no. Yel Arbosobo ca leil ser lei hal cir ni ci a mel, ssormaer zzirmar hal ddei lei eilleix ca eil coxr leil goxl lei nia.”

⁴³ Yisu yoxl bbeix: “Neir te ca ggecir leil ddux ho a dder, ajjix nr zza ggie ssicixl-ssige ssi dae, wornol ggie ar maex zo ssi, nael zo wo nr xie.

⁴⁴ Yel dder bbeix: ‘Ngo, ngo hher goxr ca hal ddei ggecir ddei leil hher jjixr lalnga a,’ eine bbeix. Yar dder ca hal ddei dax jjixr a. Nael ca hal ddei nixmox ddei seibeixbeix arla, xi xia dae ar giex gga zzirga six goxr mel sael a nga, maerssissi arla geso dol dae a. ⁴⁵ Yel neir te dder yoxl ssi a, bir armael leil lei wor vaer neir sir te hier si lei a, yar dax cirgo a ca hal ddei ggecir ddei gga hher dae a. Giedae ca hal ddei dder bir xilmeir leil lei goxr sol a. Eilleix nix neix ca eil coxr lei dder eil mel sael a nga nia.”

^j**12:39** *xiezi Yuenaxr* Yuenaxr arsae lerler nga mel Yuenaxr Sul leil biar dae.

Yisu Ddei Ake Ca Hhexr

⁴⁶ Yisu halae ca cir dax ddar biar dae seir, yarma nei yar nimar zalbbaer ngier dae a yar dax ddar biar lei a. ⁴⁷ Yel ca ar ddei a yar leil bbeix gger a bbeix: “Niama nei ni nimar zalbbaer ngier dae a, ni dax ddar biar lei a.”

⁴⁸ Yar zzael ca hal ddei leil ddarkoxl a bbeix: “Arseir ngama, arseir ngo ddei arzzi-nimar a neil?” ⁴⁹ Yar dder leixrhher ddei yar dax mae dae ca mel leil dor dae a bbeix: “Eil mel dder ngama, ngo ddei arzzi-nimar nga a. ⁵⁰ Ha ngo ddei Merhhexr Arbbor bbeix dae mel dax bei mae su ca mel mel dder ngama nei ngo ddei arzzi-nimar, arzzi-nimo nga a.”

13

Bir Dae A Silmo Xiu Su Ddei Leil Biar

¹ Hal cir ni, Yisu ake ddux lei a, neixvi qier leil cux dae. ² Ca seirseil ar cir a yar dax lei, yel yar dder cuaxr leil ddeix a cux dae a; ca mel nael neixvi qier leil ngier dae. ³ Yar dder bir dae a yaa leil cirza-hanga cirke biar gger a bbeix: “Ca ar ddei a silmo xiu ssi. ⁴ Nael yar xiu dae car, cirmelmel a nael luzzi ddei leil xiu deix dae a, ngax mel bbiu mal leil a ggux lel ji jjia a. ⁵ Cirmelmel a nael, legelbbe teixlleil mizzo nr neixl ggie xiu deix dae a, yarzi ner yoxryixl. ⁶ Nael yarji ho nr var a merni ddux lei a, lexl hie zzu gger a. ⁷ Cirmelmel a nael alcur cili gga xiu ji dae a, alcur mel ner teixl lei a, yar leil vix zil gger a. ⁸ Halae cirmelmel a nael nilhar naxrcixl gga xiu ji dae a, ner vaer a. Yel loxlmoxr saer cirxiu peix niar teixl lei lei zza, qiuxlcei peix niar teixl lei lei zza, socei peix niar teixl lei lei zza. ⁹ Nia zabbar seirseir a noni dae nia.”

¹⁰ Yisu dax mae dae ca mel lei a, yar leil biex a bbeix: “Ni ca mel dax ddar biar a, arsaenga a bir dae a biar?”

¹¹ Yisu yaa leil ddarkoxl a bbeix: “Merhhexr ddei goxr ddei leil biar dae halleix arseir lei nr saexl hal mel, eilleix nia leil saexl lol, nael kebal ca mel leil nr saexl lol. ¹² Ha noni wo xie su ca ddei leil mel zeixleixr biar gger dax nia, yar leil zzeilixl-zzeilor saexl dax lol nia; ha noni dil nr ddo su ca ddei leil mel, yar noni wo doxr lei su si nia.^k

¹³ ‘Ca hal mel mel mia lei mia nr xie,
bbe lei bbejjiur nr xie,
no lei noni wo nr xie.’

Yel ngo dder bir dae a yaa dax biar arddeir a. ¹⁴ Yaa eine nga a dder xiezi Yirsaexlyal bbeix dae mel yarzi loxr a. Yar bbeix:

‘Yaa bbe lei bbejjiur, nael noni wo nr xie,
mia lei mia, nael azo yilsi a nr saexl.

¹⁵ Cassor-worssor mel nixmox yarzi gex,
nolba ddaexrcir dae,
meixddur mix gex dae.

Nr nga a, yaa meixddur mia xie,
yaa nolba lei bbejjiur xie,
nixmox zzar lei saexl,
huixrsoxr a ngo yaa leil ggukor gger,^l

eine bbeix a.

^k**13:12** Yisu ddei yilsi mel dder Yisu dax mae yuex su mel nael Merhhexr ddei goxr gga cirza-hanga mel ho bei ho saexl dax; Yisu dax mae nr yuex su mel nael ho bei ho nr saexl a.

^l**13:15** Yirsaexlyal Sul 6:9-10 leil vaexr dae.

¹⁶ Nael nia ngo bei dae mel leil mia, ngo bbeix dae mel leil bbejjiur a, Arbosobo nia leil seir lol a. ¹⁷ Ngo nia leil yarzi bbeix gger: halleix xiezi nei nixmox seir su ca cirke a lei nia mia mel mia niazzir, nael mia nr wo; nia bbejjiur mel bbejjiur niazzir, nael bbejjiur nr wo.

¹⁸ Yel nia bir dae a silmo xiu biar dae eil ddei leil noni nia. ¹⁹ Luzzi leil xiu deix dae mel nael dder ca mel Merhhexr ddei goxr ddei leil biar dae ddar mel no lei noni wo nr xie, yarzi nix neix Sardaxl te lei a yaa nixmox zzar ji dae ddar mel su si a. ²⁰ Nilhar woxrke legelbbe zza ggie xiu deix dae mel nael dder ca mel Arbosobo ddei ddar mel noni dil a, yarzi ggese, ²¹ nael nixmox zzar ji nr ver, cirleixr a ddarzzi. Yaa Arbosobo ddei ddar mel leil ddarzzi a, azo lerler nr seir pex dae nei ca mel yaa leil bixr a dder zeixleixr ddar-nr-zzi a. ²² Alcur cili gga xiu ji wo mel nael dder ca mel Arbosobo ddei ddar mel noni ho a, giedae yaa nixixl ddei arsae goxr nia zoxrzixr, halae zzirbae meixr a, yaa Arbosobo leil ddarzzi su yarzi hhel ca loxr nr var. Hherdder yarsaer niar nr var yarzwei mel sael a nga. ²³ Micir seir ggie xiu ji dae mel nael dder ca mel Arbosobo ddei ddar mel no lei noni wo xie, yaa Arbosobo leil ddarzzi su yarzi hhel ca loxr a. Hherdder loxlmoxr zzei mel loxlmoxr saer yarzi niar miur mel sael a nga a; cirxiu peix niar teixl lei lei zza, qiuxlcei peix niar teixl lei lei zza, socei peix niar teixl lei lei zza.”

Bir Dae A Korma Ddei Leil Biar

²⁴ Yisu yoxl yaa leil bir dae a biar gger a bbeix: “Merhhexr ddei goxr ddei mel dder ca ar ddei a silmo naxrcixl mel mi gga xiu ji dae sael a nga.

²⁵ Nael ca mel yixrmeixljjiiu dae car, yar leil vuxryixr su mel lei a, korma mel so mel dax xiu ji dax gger a, ssi du si a. ²⁶ So mel ner vaer a ne biu zi ci a korma mel leil i teixl lei ddo a. ²⁷ Mi seirpor ddei leil wor mu gger su mel yar leil biex lei a bbeix: ‘Seirpor, ni mi gga xiu ji dae mel doxl silmo naxrcixl mel a nga zzarmar? Arsae korma lei ner teixl lei a leir?’

²⁸ Seirpor ddei ddarkoxl a bbeix: ‘Eil ddei mel ngo leil vuxryixr su mel bei a.’ Wor mu gger su mel bbeix: ‘Nguva korma mel moxr pixl gger ssa ssa?’

²⁹ Seirpor ddei bbeix: ‘Nr ssa a. Algaxl nia korma mel leil moxr a, so mel leil jiujiu zix teixl dax gger lalnga. ³⁰ Loxlmoxr se zi nr ci seir mel, yaa leil cirgo a ner dae lol. Se zi ci a, ngo se su mel leil miardal a, hoba korma mel moxr teixl a neixl gex du lei a, cu pixl ssi nia; so saer mel lar se du lei a, loxlmoxr ji ggie dol ji.’ ”

Bir Dae A Varsil Nei Miljiazi Leil Biar

³¹ Yisu yoxlyoxl yaa leil bir dae a biar gger a bbeix: “Merhhexr ddei goxr ddei mel dder varpei sil ar taex lesel. Capor ar ddei a vei si a armael ddei mi gga xiu ji dae. ³² Varpei sil eil taex varsil mel gga ye zzir taex nga bbeixarnar, nael vaer du lei a mel bir ciryoxr-hanga var leil vaer leixl, yarzzei vaervaer ar zzei loxr a. Ngax mel lei yarcaxlleixr mel leil cide bei.”

³³ Yisu zeixleixr yaa leil bir dae a biar gger a bbeix: “Merhhexr ddei goxr ddei mel miljiazi lesel. Ssormaer ar ddei a vei si a some cirke gga^m miljiazi cirdoxr a ji lei aba bex maelmaerjjia faex du lei lol a.”

³⁴ Yisu mel cassor-worssor dax ddar ha biar mel dder bir dae a biar lalnga; nr nga a mel dder yaa dax azo lei nr biar. ³⁵ Yar eine bei a halleix xiezi bbeix goxr mel dder yarzi loxr a. Arbosobo Ddei Sul ber leil xiezi bbeix:

“Ngo mel bir dae a ddar biar nia;
merlo-milo bei beil cirdae dder
ca mel nr saexl hal mel biar teixl lei nia,”ⁿ

^m13:33 *some cirke gga* Hal mel mel 21 zi zza.

ⁿ13:35 Sipi Sul 78:2 leil vaexr dae.

eine bbeix a.

³⁶ Giedae Yisu ca hal ke dax nr hher, ake ddir a. Yar dax mae dae ca mel ddir lei a, yar dax bbeix: “Ni bir dae a mi gga korma mel leil biar dae ddei azo yilsi a ngua leil arleixr bbeix gger la!”

³⁷ Yisu yaa leil ddarkoxl a bbeix: “Silmo naxrcixl xiu su ddei mel dder Ca Ddei Ssor ddei nga a. ³⁸ Mi mel nael dder mer woxrke cirmaex-hanga nga a. Silmo naxrcixl mel nael Merhhexr ddei goxr gga ca mel nga a;^o korma mel nael nixmox hazzi neix su te dax bei mae su mel nga a.

³⁹ Korma xiu ji gger su mel nael dder ca leil vuxryixr su neir zzirmar te nga a. Loxlmoxr se zi ci a mel dder nixixl ddei maelele goxr ci a. Loxlmoxr se su mel nael dder tisir mel nga a. ⁴⁰ Nixixl ddei maelele goxr ci a mel, nixmox neix su mel mel dder korma mel sael a moxr teixl lei a adoxl bbiu ggie cu ji gger nia. ⁴¹ Hherdder Ca Ddei Ssor ddei yar ddei tisir mel leil miardal a, ca mel leil zuixl bei ssi lol su nei nr seir bei ssi lol su mel leil yar ddei goxr ddei gga ggaxr teixl gger lol nia; ⁴² halae yaa leil adoxl bbiu ggie piar ji gger nia. Yaa halmaex hher dae a ser ddei giexrgiexlgiexr kexl gex dae a aenge nia. ⁴³ Halcar ci a, nixmox seir su ca mel Merhhexr Arbbor ddei goxr gga mel, bbobbolbbo merni sael a bbo nia. Nia zabbar seilseir a noni dae nia.”

Bir Dae A Zzaegu Naxrcixlcixl Mel Leil Biar

⁴⁴ Yisu halae bbeix: “Merhhexr ddei goxr ddei mel dder zzaegu naxrcixlcixl mel mi gga giexlhex ji dae sael a nga. Ca mia a dder bbe gex du lei a, ggegge-sese a yar armael ddei cirza-hanga vur pixl a, mi eil bbae leil vae lei.”

^o**13:38** *Silmo naxrcixl mel nael Merhhexr ddei goxr gga ca mel nga a*
Yaa mel Arbosobo ddei goxr gga ca mel nga a. Yaa Yisu leil ddarzzi.

⁴⁵ Yisu yoxl bbeix: “Merhhexr ddei goxr ddei mel yoxl vaexleixr bei su ar ddei a helvirsæer naxrcixl zo sæel a nga. ⁴⁶ Yar helvirsæer yarzi sæel naxrcixl taex leil zo wo a dder, yar ddei cirza-hanga vur pixl a helvirsæer hal taex leil vae.”^p

Bir Dae A Ngol Bel Ddei Leil Biar

⁴⁷ Yisu zeixleixr bir dae a bbeix: “Merhhexr ddei goxr ddei mel yoxl ngol bel ddei neixvi gga ddar ji dae a cirza-hanga ngol mel leil bel sæel a nga. ⁴⁸ Bel ddei bbi ho a, ngol bel su mel dder bel ddei neixvi qier leil gga deix lei; yel cux dae a, ngol seirseir mel næel ggux teixl lei a ngol ji ggie ji, nr seir mel næel piar pixl. ⁴⁹ Nixixl ddei mæelele goxr ci a lei eil mel sæel a nga nia. Hane ci a tisir mel ddux lei a, nixmox seir su nei nixmox neix su mel leil bbe kae gger nia. ⁵⁰ Yel nr seir mel leil næel adoxl bbiu ggie piar ji gger a; yaa halmaex hher dae a, ser ddei giexrgiexlgiexr kexl gex dae a aenge nia.”

⁵¹ Giedæe Yisu biex a bbeix: “Ddar maelmaerjjia nia noni wo wo a?” Yaa ddarkoxl a bbeix: “Nguæa noni wo a,” eine bbeix a. ⁵² Yar yoxl bbeix: “Ha Arbosobo ddei sulsæexlsu mel, Merhhexr ddei goxr gga ddir a mel dder ake seirpor ddei zzaegu dol ji ggie zzaegu naxrcixlcixl yarsixl yarli mel lei vei teixl lei sæel a nga.”

Naxrsælexl Su Mel Yisu Leil I Zei

⁵³ Yisu bir dae a biar dae ddar eil mel biar jjia a dder halmaex nr hher a. ⁵⁴ Yar yar mermi jjixr ci a, Yoxrtaexl su mel Arbosobo ddei sulzzaggie hher dae a ca leil mul gger. Ca mel lei murgur a bbeix: “Yil! Ca eil ddei arseir yar leil eine olno-ddu lol a leir? Arsæe einezeixl ddo leir?” ⁵⁵ Yar

^p**13:46** Ca mel Merhhexr ddei goxr ddei mel bir nixixl goxr ddei leil zoxlyoxl eine zzir nia. Yaa Merhhexr ddei goxr gga ddir niæzzir a mel, cirza-hanga piar pixl vixr nia.

doxl nr nga xi zi su ddei ssor a zzarmar? Yarma doxl Marlixlyal a zzarmar? Yar nimar mel doxl Yargel, Yuexi, Ximexr, Yoxrdaxl a zzarmar? ⁵⁶Yar nimo mel lei doxl niul dax eilmaex hher dae lalnga zzarmar? Nael yar bbesur eil mel arddol zza si lei suax a?” eine bbeix. ⁵⁷Yaa dder yar leil i nr du ddar-nr-zzi.

Yel Yisu yaa leil bbeix: “Xiezi mel leil mel yaa armael ddei mermi, armael ake gga ca mel yaa leil i zei.” ⁵⁸Ca mel Yisu leil ddar-nr-zzi a yar dder halmaex gga ddoddomo hal mel cirke nr bei a.

14

Sexlsir Gger Su Yuehal Si

¹Halcar a, Jialixllixl mermi ddei vaervaerpor Silixl⁹ mel Yisu arsae lerler bei, eil mel leil bbejjiur a ² dder, yar woxrke ca mel dax bbeix: “Ca eil ddei mel sexlsir gger su Yuehal a. Yar si ho a, gol du xixl lei a. Yel yar ddoddomo eil mel bei bbesur zza arddeir a.”

³⁻⁴Eine xilmeir leil halleix Silixl mel yar nimar Feilixl maerssor Siloxrdir leil su si lei a yar maerssor bei lol a, Yuehal mel yar leil bbeix: “Ni mel yar leil ni maerssor bei lol nr sir.” Eine bbeix a Siloxrdir leil de dae a. Yel Silixl te dder Yuehal leil ssu du lei a, cageggie ge ji dae a. ⁵Silixl halae yar leil seixl niazzir, nael cassor-worssor mel mel Yuehal leil xiezi ar ddei a i mal gger a, yar dder ca mel dax gexr a seixl nr bel.

⁶Nael Silixl leil xiu teixl lei nixixl goxr gger hal cir ni, Siloxrdir ddei ssormaer ddox mel seivi mel leil huade tiuxl gger a, Silixl yarzisael ggese. ⁷Yel Silixl dder ddar bbeix har zaxr a bbeix, ssormaer eil ddox azo li

⁹**14:1** *Jialixllixl mermi ddei vaervaerpor Silixl* Jialixllixl mermi ddei vaervaerpor Silixl te mel Martaexl Sul 2 leil biar dae Silixl hal ddei nr nga. Hal ddei mel yarbbor a.

zzorbbeixlei yar leil gger nia. ⁸ Eilboxl ssormaer yarma te mel yar leil co a, yar dder bbeix: “Ni Yuehal ddei oldde taex paxrzi gga ji dae a, vei si la a, ngo leil gger la.” Eine bbeix a, ⁹ Silixl zzirmar dder yarzi bei sol. Ca mel meixsaer qier leil zzae ssormaer ddox dax yar azo li lei yar leil gger bbeix har goxr a, yel yar bbeix dae mel sael a yar leil gger lalnga a. ¹⁰ Yel ca mel leil miardal a, cageggie ssi a Yuehal leil oldde taexl a. ¹¹ Yel oldde taex paxrzi ddei leil deix dae a ssormaer ddox leil gger a. Ssormaer ddox nael yarma leil gger a. ¹² Giedae Yuehal dax mae dae su ca mel dder yar ddei ggecir ddei giexlhex gger a. Yoxl eil mel Yisu leil bbeix gger ssi.

Yisu Ca Ngordu Leil Zzor Bbox Lol

¹³ Yisu noni ho a dder yar cuaxr ddei leil ddeix a mipaerbbae gga ssi a. Nael ca cir a yar halmaex ssi a bbejjiur a dder zzi gga ddux a, jjiumo ssi mal a yar dax mae ssi. ¹⁴ Yisu cuaxr gga ddux lei a ca seirseil a ar ke leil mia a, yaa leil zoxlnixr a no su ca mel leil ggukor gger.

¹⁵ Hal cir ni mercixl jjur a, yar dax mae dae ca mel yar dax lei a bbeix: “Eilmaex mel mipaerbbae a nga, lae lei lae dae ho a. Ni ca mel leil ssi lol; yaa leil kax mel gga armael ddei armael zzorlabox vae lel ssi lol hor.”

¹⁶ Nael Yisu bbeix: “Yaa ssi nr ssa, nia yaa leil zzorlabox gger ssi.”

¹⁷ Yaa ddarkoxl a bbeix: “Ngu a eilmaex aba ngor pir nei ngol nnel lar zza naer.”

¹⁸ Yisu bbeix: “Ngo leil vei gel gger la,” eine bbeix a. ¹⁹ Yel dder ca mel leil miardal a silbbarbbae mel leil cux dae lol a, aba ngor pir nei ngol nnel vei dae a, merlabbor i dae a, Arbosobo leil nawo. Yoxl aba ddei ngaxl kae a, yar dax mae dae ca mel leil zzi gger; yaa yoxl ca mel leil zzi gger. ²⁰ Ca maelmaerjjia lei zzor bbox a. Yoxl nirzwei dae mel bellerzzi ceinir taex gga se ji bbi a. ²¹ Zzor su ca mel ssormaer nei anix leil nr suax lei, capor lillil a dder ngordu sael zza.

Yisu Neixvi Teixlleil Ssi Dae

²² Eine goxr ho a qie, Yisu dder yar dax mae dae ca mel leil zul a cuaxr ddei leil deix a neixvi hal bbu leil gger zaxr dae lol. Yar nael halmaex hher dae a ca mel leil jjixr lol. ²³ Ca mel ssi ho a, yar dder cirmuzil a wordabbor ddeix a, Arbosobo dax ddar biar ssi. Eilmerxixl ci a lei, yar lar halmaex hher dae; ²⁴ cuaxr jiaxl nael ssi vimir ho a. Si piar pox a dder bolaxl ddaexr du lei a cuaxr ddei lei le ha dae a. ²⁵ Giedae soxiu-baxlyixl ci a, Yisu mel neixvi teixlleil ssi gel a yar dax mae dae ca mel dax ssi mal. ²⁶ Yel yaa yar leil neixvi teixlleil ssi gel lei ggie mia a qie, nixmox zzar ssurssulssur gexr a dder, “Caxiu lei a” bbaexl, eine ae du lei a.

²⁷ Nael Yisu jiuurjiu-maemae yaa leil bbeix: “Nia nixmox vaervaer arla bei dae lalssa. Ngo a nga. Nia gexr nr ssa!” eine bbeix a.

²⁸ Birdaexr bbeix: “Seirpor, yarzi ni nga bbaexl, ngo leil miardal a ajjix teixlleil ni dax halmaex ssi mal lol la.”

²⁹ Yisu bbeix: “Ni lei ddo a.”

Eine bbeix a, Birdaexr dder cuaxr ddei leil zei a, ajjix teixlleil Yisu dax ssi gel. ³⁰ Nael ajjix teixlleil mel mersi yarzisael jia a, yar gexr a. Yar leil dder ddei zei si niazzi dae a, yar ae dae a bbeix: “Seirpor, ngo leil jiuxl la.”

³¹ Yisu dder nialngasael leixrhher bbor cei teixl a yar leil gga gex dae a bbeix: “Ngo leil lalal a ddarzzi su eil ddei ni! Arsaenga a ddarzzi gax-nr-zi?”

³² Yar bbeix teixl a, yaa cuaxr ddei leil ddeix a, mersi ddei dder jia nor a. ³³ Yel cuaxr gga ca mel lei Yisu leil cizixl gger dae a bbeix zae gger a bbeix: “Ni yarzi Arbosobo ddei ssor a bbe!”

³⁴ Giedae yaa neixvi ddei leil gger ho a, Gexrnixrsalexl mermi ssi ci a. ³⁵ Halmaex gga ca mel Yisu leil i teixl lei a qie, zaza-lili biar jiax jjia a, ca no su maelmaerjjia leil lei hier si lei lol. ³⁶ Yaa Yisu leil yar ddei pia zi

ddei leil arleixr ta lol la qiuxr, yel ta wo su ca mel no ddei dder kor a.

15

Ca Leil Seibeix Lol Nei Sei-nr-beix Lol Ddei Leil Biar

¹ Giedae Farlixsaexl ca nei Arbosobo ddei sulsaxelsu mel, Yiluxlsaler zzi gga cirdae a Yisu dax lei a bbeix: ² “Ni dax mae dae ca mel arsaе zzo zzor xilmeir leil leixrhher nr cir? Yaa arsaenga a halleix niul leil guaxr su camar bbeix dae leiddur mel dax bei nr mae dae leir?”

³ Yisu yaa leil ddarkoxl a bbeix: “Nia arsaenga a porpor ddei leiddur mel dax bei mae, nael Arbosobo miardal dae mel dax bei nr mae?”

⁴ Arbosobo bbeix: ‘Nia armael arbbor ama leil i du nia, perniar nia. Ha arseir armael arbbor ama leil hie vuxryixr a mel yar leil bei zil gger nia’ eine bbeix a. ⁵ Nael nia zzael bbeix ha arseir arbbor ama leil bbeix: ‘Ngo nia leil ggerlabox mel Arbosobo leil gger ho a’ bbaexl eine bbeix a dder, ⁶ yar yarbbor yarma leil per-nr-niar lei cexr. Nia eine bei a mel, nia ddei leiddur mel dax bei mae arnar, Arbosobo ddei ddar mel bei pixl gger a.

⁷ Ca seir bei laexl su eil mel nia! Xiezi Yirsaexlyal bbeix zaxr goxr a nia leil bbeix dae ddar mel cirdoxr lei bbeix nr cox. Yar bbeix:

⁸ ‘Ca eil mel meir gga bbeix dae a zzae ngo leil i du,
nixmox zzar zzae ngo leil i ze.

⁹ Yaa mul gger dae mel mel ca miardal dae mel a nga,
yel yaa ngo leil zi a lei baexr zi lalnga.’ ”^s

¹⁰ Yisu ca mel leil ae si lei a bbeix: “Nia noni nia, saexl nia. ¹¹ Ha meir gga ddir mel mel ca leil sei-nr-beix nga lol nr var, nael meir gga ddux lei

^s15:9 Yirsaexlyal Sul 29:13 leil vaexr dae.

mel mel ca leil sei-nr-beix nga lol var.”

¹² Giedae Yisu dax mae dae ca mel lei a yar dax bbeix: “Farlixsaexl ca mel ddar eil mel noni ho a peixl-nr-fuxr, ni saexl saexl?”

¹³ Yisu ddarkoxl a bbeix: “Ha ngo ddei Merhhexr Arbbor dae nr nga yarzzei mel, yarji jiujiu zix teixl lei nia. ¹⁴ Nia yaa dax naer nr ddo. Yaa mia nr xie lei halae mia nr xie su leil jjiumo hier. Mia nr xie su mel zzi leil jjiumo hier a mel, nnel jjia lei bbeddur gga de ji var.”^t

¹⁵ Birdaexr Yisu leil bbeix: “Ni bir dae a bbeix dae ddei azo yilsi a ngua leil biar gger la.”

¹⁶ Yisu bbeix: “Nia eilleix ci a lei halae nr saexl a ngo? ¹⁷ Ha meir gga ddir mel mel xilbe gga ddir ci a, sir teixl lalnga zzarmar? ¹⁸ Nael meir gga ddux lei mel mel nixmox ga gga ddux lei, eil mel saelnei ca leil sei-nr-beix nga lol var.”^u ¹⁹ Nixmox zzar ddux lei mel mel dder ca seixl, kerjiar, capor ssormaer nrbba nrbba bei, zzaegu ker, ca leil fur, bbeix vuxryixr, yarzi gexrddo xiar dae eil mel nga a. ²⁰ Eil zzu mel dder ca leil sei-nr-beix nga lol var, nael zzo zzor xilmeir leil leixrhher nr cir lalnga mel ca leil sei-nr-beix nga lol nr var.”

Jianaxr Su Ssormaer Yisu Leil Ddarzzi

²¹ Yisu halmaex nr hher a, Tuiloxr zzi nei Siduixl zzi dax naer ggje halmaex gga ssi ci a. ²² Yel halmaex goxr dae Jianaxr su ssormaer ar ddei lei a, ae dae a bbeix: “Seirpor, Daxlweixl ddei Ssor,^v ngo leil

^t**15:14** Mia nr xie su ca mel mel dder Yisu leil ddar-nr-zzi su mel nga a.

^u**15:18** Meir gga ddir a zzorlabox mel mel ca leil nr seir lol nr var. Nael meir gga ddux lei ddar mel mel ca leil nr seir lol var.

^v**15:22** *Daxlweixl ddei Ssor* Yisu mel Daxlweixl ddei ssor nr nga; yar giedae ca ar nga. Halcar ca cirmelmel a zzir dae a Yisu mel Zidu, yel yaa dder Yisu leil “Daxlweixl ddei Ssor” eine bbeix arddeir a.

zoxlnixr la; ngo ssormaer ddox leil neir xiex a, yar yarzi sol zeixl.”

²³ Nael Yisu zzael yar leil cir qier lei ddar-nr-koxl. Yar dax mae dae ca mel dder yar dax ssi naer lei a yar leil qiuxr a bbeix: “Ssormaer eil ddei niul giedae ae mae doxr dae, ni yar leil ssi lol hor!”

²⁴ Yisu bbeix: “Ngo leil miardal teixl lei a mel, Yirsaexllixl goxrjia gga ya ssi pixl dae sael a ca hal mel leil zo lei lol arddeir a.”^w

²⁵ Ssormaer hal ddei dder Yisu dax lei a cizixl gger dae a bbeix: “Seirpor, ngo leil beijjiu la!”

²⁶ Yisu bir dae a yar leil ddarkoxl a bbeix: “Aniux ddei zzorddu mel anol leil piar zol a mel nr seir.”^x

²⁷ Ssormaer ddei ddarkoxl a bbeix: “Seirpor, nga a. Nael anol mel lei yaa seirpor zaezir leil pixl zeil lei milmil-meme mel zzor,” eine bbeix a.

²⁸ Yel Yisu dder bbeix: “Ni einezeixl ddarzzi a, ni xiar dae mel sael a nga lol ddo a!” Halcar cirdae yar ssormaer ddox dder kor a.

Yisu Ca Cirke Leil No Ggukor Gger

²⁹ Yisu yoxl halmaex lei nr hher; Jialixllixl mermi neixvi qier leil jjixr a. Yar worga leil ddeix a cux dae. ³⁰ Ca seirseil ar cir a yar dax halmaex lei a. Yaa pirdael dae, mia nr xie, noddexr dae, ddar te nr var nei kebal no su ca cirke leil Yisu dax hier mal lei a, yar dder yaa leil ggukor gger a.

³¹ Ca mel pirdael dae mel ssi var, mia nr xie mel mia xie; noddexr dae mel kor, ddar te nr var mel ddar te var eil zzu mia a yarzisael murgur. Yaa dder Yirsaexllixl goxrjia ddei Arbosobo leil bbeix zae gger.

Yisu Ca Lidu Leil Zzor Bbox Lol

^w**15:24** Ca eil mel yarzi ssi pixl nr nga; yaa Arbosobo dax hormolsael bei nr mae.

^x**15:26** Yisu bir dae a bbeix dae “aniux” ddei yilsi mel dder Yoxrtaexl su ca mel nga a. “Anol” ddei yilsi nael Yoxrtaexl su nr nga ca mel nga a.

³² Yisu yar dax mae dae ca mel leil ae si lei a bbeix: “Ca eil mel ngo dax cirgo a so ni hher ho a, zzorlabox nr zza a, ngo yaa leil zoxlnixr. Ngo yaa leil zzo meixr dae a ssi lol nia-nr-zzir, algaxl yaa jjiuno car a gga ssi wor-nr-ni a.”

³³ Yar dax mae dae ca mel bbeix: “Niul mipaerbbae eil ddei gga arddol ca einezeixl ar ke zzor bbox meirne aba zza bbeixleir?”

³⁴ Yisu bbeix: “Nia aba hormo pir zza?” Yaa ddarkoxl a bbeix: “Aba sir pir nei ngol nnel sael a zza,” eine bbeix a.

³⁵ Yar dder ca mel leil miardal a middur leil cux dae lol, ³⁶ yar aba sir pir nei ngol nnel sael vei du lei a, Arbosobo leil nawo ho a, aba mel ngaxl kae a yar dax mae dae ca mel leil zzi gger, yaa yoxl ca mel leil zzi gger. ³⁷ Ca maelmaerjia lei zzor bbox a. Yoxl nirzzei dae mel bellerzzi sir taex gga se ji bbi a. ³⁸ Zzor su ca mel ssormaer nei anix leil hhe nr dax, capor lillil a dder lidu zza. ³⁹ Giedae Yisu ca mel leil ssi lol ho a dder cuaxr leil ddeix a Marjiada mermi ssi ci a.

16

Ca Mel Yisu Leil Qiuxr A Ddoddomo Bei Lol

¹ Farlixsaexl ca nei Sardugie ca mel Yisu leil sixr i lei a, yar leil qiuxr a Arbosobo lar bei var ddoddomo ar ddei bei a yaa leil i lol.^y

² Nael Yisu ddarkoxl a bbeix: “Mercixl merzzeni a, nia dder bbeix: ‘Arggeni almer zae var.’ ³ Eilneixrnehe nia dder bbeix: ‘Merzzeni dae nei zi neix dae, eilni mersi jia var, almer lei var’, eine bbeix. Nia merlabbor i a dder almer lei var lei nr var saexl, nael eilleix ngo bei dae mel leil zzael nr saexl. ⁴ Nia ca eil coxr mel yarzi nix neix, Arbosobo leil ddarzzi nr

^y**16:1** Yaa Yisu mel Zidu a ddar-nr-zzi, yel Yisu leil murgurgurmo ddoddomo bei a, yaa leil i lol, yel yar yarzi Zidu nga nga bbe i.

yuex, ngo ddoddomo ar ddei bei a, nia leil i lol eine qiuxr. Nael Arbosobo xiezi Yuenaxr leil arsae lerler nga lol eil ddei leil cuxrteixl a mel, zeixleixr lei nia leil azo i lol ddu nr zza.”^z Yisu bbeix jjia a dder yaa dax nr hher, ssi du si a.

Farlixsaexl Ca Nei Sardugie Ca Ddei Miljiazi

⁵ Giedae Yisu dax mae dae ca mel neixvi hal bbu leil gger ci ho a, aba vei hol-nr-cir a. ⁶ Yisu yaa leil bbeix: “Nia Farlixsaexl ca nei Sardugie ca mel ddei miljiazi mel leil fadae nia,” eine bbeix a.

⁷ Yaa dder zzicarzzi dax biar a bbeix: “Giel arsae niul aba vei hol-nr-cir a, yar niul leil eine bbeix arddeir a zzar?” ⁸ Nael Yisu yaa azo biar dae saexl a dder bbeix: “Ngo leil lalal a ddarzzi su eil mel nia! Arsaenga a aba vei hol-nr-cir a zzicarzzi dax zzibbe?” ⁹ Nia halae nr saexl a neir. Holbbaexl ngo aba ngor pir ddei ca ngordu leil zzor bbox lol a, nirzzei dae mel bellerzzi hormo taex gga ggux ji bbi eil mel nia hol-nr-cir a ngo? ¹⁰ Halae aba sir pir ddei ca lidu leil zzor bbox lol a, yoxl nirzzei dae mel bellerzzi hormo taex gga se ji bbi a, nia hol-nr-cir a ngo? ¹¹ Ngo nia leil ‘Farlixsaexl ca nei Sardugie ca mel ddei miljiazi mel leil fadae nia,’ bbaexl eine bbeix a mel, aba ddei leil bbeix nr nga. Nia arsae halae nr saexl leir?” ¹² Yar dax mae dae ca mel eilcar saelnei yar yaa leil aba ddei miljiazi mel leil fadae nia bbeix nr nga a nei, Farlixsaexl ca nei Sardugie ca mel mul gger dae mel leil fadae nia bbeix arddeir a saexl.

Birdaexr Yisu Leil Zidu A Ssexl

^z**16:4** Arbosobo Yuenaxr leil ngol xilbe gga nr ni sael hher ji lol ho a, yoxl ddux jjixr lei lol. Eil ddei mel dder Arbosobo ddoddomo bei dae ddei nga a. Yisu si ho a, Arbosobo yoxl eil ddei sael a ddoddomo bei a, yel ca mel leil Yisu mel dder Zidu a saexl lol nia. Yuenaxr Sul ber leil Yuenaxr leil biar dae. Martaexl Sul 27 nei 28 leil Yisu leil biar dae.

¹³ Yisu Kaersarlixlyal-Feilixlber zzi gga ssi ci a, yar dax mae dae ca mel leil biex a bbeix: “Ca mel Ca Ddei Ssor arseir a bbeix dae?”

¹⁴ Yaa ddarkoxl a bbeix: “Cirmelmel a nael bbeix sexlsir gger su Yuehal, cirmelmel a nael bbeix Yirlixlyal bbeixsael Yilixlmir, halae cirmelmel a nael bbeix kebal xiezi ar ddei a,” eine biar dae.

¹⁵ Yisu bbeix: “Nia bbeix ngo arseir a neil?”

¹⁶ Ximexr Birdaexr ddarkoxl a bbeix: “Ni mel Zidu^a a; cirse-cirsil lei gol dae Arbosobo ddei Ssor ddei nga a.”

¹⁷ Yisu bbeix: “Yuenaxr ddei ssor Ximexr, eil ddei mel ca ni leil saexl lol nr nga, ngo ddei merlabbor hher dae Arbbor ni leil saexl lol arddeir a. Arbosobo ni leil seir lol a. ¹⁸ Ngo halae ni leil bbeix gger: Ni mel Birdaexr,^b hherdder legelbbe taex nga a. Ngo ngo ddei jiaxlhuixl ddei legelbbe eil taex leil zi nia.^c Ca si ho a hher ggie alddur peixl lei ngo leil ddarzzi su cir leil deil leixl gger nr xie.^d ¹⁹ Ngo Merhhexr ddei goxr ddei zzuxci ni leil gger nia. Ha ni middurbbor hher dae car a neixl gex dae

^a**16:16** *Zidu* Zidu mel dder Arbosobo tiur har dae ca leil jiuxlsu ddei nga a.

^b**16:18** *Birdaexr* Xilaxl ddar Birdaexr ddei yilsi mel dder legelbbe.

^c**16:18** *Ngo ngo ddei jiaxlhuixl ddei legelbbe eil taex leil zi nia.* Yisu ddei yilsi mel dder Birdaexr Yisu mel Zidu a eine ssexl a halae kebal ca mel leil bbeix gger a, ca mel leil Yisu arseir a saexl lol, yar leil ddarzzi lol. Yisu leil ddarzzi du lei beil ca hal cir mel Sirtuxrxixrzuaxl Sul 2 leil biar dae.

^d**16:18** *Ca si ho a hher ggie alddur peixl lei ngo leil ddarzzi su cir a leil deil leixl gger nr xie* Ca cirmelmel a zzir dae a “Ca si ho a hher ggie alddur peixl” yilsi mel dder bbeix “neir zzirmar te ddei quexrlxl.” Eine nga a, ddar eil qier ddei yilsi mel dder bbeix neir zzirmar te Yisu leil ddarzzi su cir leil deil leixl gger nr xie.

mel mel, merlabbor lei neixl gex. Ha ni middurbbor piur kae mel mel, merlabbor lei piur kae.”^e ²⁰ Yel Yisu dder yar dax mae dae ca mel leil miardal a, yar mel dder Zidu a ca mel leil bbeix nr gger lol.

Yisu Armael Si Nia Bbeix Zaxr

²¹ Hane zzezze mel, Yisu dder yar dax mae dae ca mel leil zabbar seirseir a biar gger du lei a. Yar mel Yiluxlsaler zzi gga ssi nia, ca leil guaxr su camar mel, Arbosobo leil zi su vaervaerpor mel nei Arbosobo ddei sulsaxlsu mel yar leil goxrsol-goxrnaxr cirke goxr lol nia, yoxl bei zil gger nia, nael so ni cir ni gol du xixl lei nia.

²² Birdaexr dder yar leil gga gex dae a hexr du lei a bbeix: “Seirpor, eine nga nr var! Eil mel arsaebeilei ni oldde leil ddeix nr var.”

²³ Yisu za xixl lei a yar leil bbeix: “Sardaxl, ni ssal dae! Ni mel ca mel xiar dae ddei dax a bei mae, Arbosobo xiar dae ddei dax bei nr mae, yel ni mel dder ngo leil baxl guirle gger su ddei nga a.”

²⁴⁻²⁵ Yisu yoxl yar dax mae dae ca mel leil bbeix: “Ha armael ddei olga ddei leil jiuxl niazzir su ca mel, arsaebeilei armael ddei olga ddei pixl var, nael ngo leil olga pixl gger yuex su ca mel arsaebeilei olga zza var. Yel arseir ngo dax mae lei a mel dder armael ddei cirza-hanga piar pixl vixr nia, armael ddei sixrxixljiaxl ddei bber dae a eine mae lei nia.”^f ²⁶ Ca mel

^e**16:19** Ca cirmelmel a zzir dae a ddar eil qier ddei yilsi mel dder bbeix:

1) Ha ni middurbbor nr bei lol mel mel, Arbosobo lei nr bei lol. Ha ni middurbbor bei lol mel mel, Arbosobo lei bei lol. 2) Ha ni middurbbor ssoxr-nr-suxl mel mel Arbosobo lei ssoxr-nr-suxl. Ha ni middurbbor ssoxrsuxl mel mel, Arbosobo lei ssoxrsuxl. Yuehal Sul 20:23 leil biar dae. 3) Ha ni arseir leil ddir lol a mel, Arbosobo lei ddir lol. Ha ni arseir leil nr ddir lol a mel, Arbosobo lei nr ddir lol.

^f**16:24-25** Ddar eil qier ddei yilsi mel dder bbeix: Armael leil weix a gol

mer woxrke cirza-hanga maelmaerjjia li wo a zzorbbeixlei, nael olga pixl a mel, yar dax azo guaxrzoxr seir bbeixleir? Ca mel azo sser a cirse-cirsil olga ddei bo xixl lei cexr bbeixleir? ²⁷ Ca Ddei Ssor mel yarbbor sael a yarzi ddo yarzi quexrlixl zza jjixr lei nia; yar ddei tisir mel lei yar dax cirgo a jjixr lei nia. Hane ci a, yar mel ca mel bei dae mel dax zox dae a yaa leil ser lei nia. ²⁸ Ngo nia leil yarzi bbeix gger, niul dax eilmaex ngier dae ca ar mel a nr si seir dder Ca Ddei Ssor zzirmar bei lei ggje mia var.”

17

Yisu Cirgge-circir Lei Bbobbolbbo

¹ Qiuxl ni goxr ho a, Yisu mel Yargel, Yuehal yaa nr hieni leil nei Birdaexr leil hier dae a worgamo leil ddeix a. ² Yisu leil i dae a halleix le-nr-sel, yaa meixsaer qier leil qiaxrmeix ddei merni sael a bbo, pia mel lei bbo du lei einezeixl piu. ³ Cirleixr a dder Yisu dax mae dae ca mel Moxrxi nei Yirlixlyal⁹ Yisu dax ddar biar dae mia a.

⁴ Birdaexr dder Yisu leil bbeix: “Seirpor, niul eilmaex hher dae a yarzi seir. Ni ddarkoxl arddeirnga a, ngo eilmaex xigex soler daxr: cir ddei a nael ni leil daxr gger, cir ddei a nael Moxrxi leil daxr gger, cir ddei a nael Yirlixlyal leil daxr gger.”

dae su ca mel olga ddei pixl var, hherdder dixlyuxl gga ssi nia, nael armael leil weix a gol dae nr nga, Yisu leil weix a gol dae su ca mel cirse-cirsil lei olga zza var, hherdder Merhhexr ddei goxr gga ssi nia.

⁹**17:3** *Moxrxi nei Yirlixlyal* Moxrxi nei Yirlixlyal mel Yisu leil nr xiu seir halleix tortor dder Yoxrtaexl su ddei xiezi a. Yaa nr zza ho a. Semixljil Sul 34:5-6 nei Zzirmar Sul Vaexr Maele Ber 2:11 leil biar dae. Yel yaa Yisu dax ddar biar dae a, Yisu dax mae dae su mel yarzi murgur.

⁵ Yar ddar bbeix dae car a, zico bbobbolbbo ar co a yaa leil jiul gex dae a.^h Zico gga qiurte ar ddei bbeix teixl lei a bbeix: “Eil ddei mel ngo perniar dae Ssorzil-ssorya ddei nga a. Yar bei dae mel ngo dax yarzi nixloxdda, ngo yarzi ggese. Nia yar ddei ddar no nia.”

⁶ Yar dax mae dae ca mel bbejjiur a, gexr zildu a middur ddei leil puxr gex dae a. ⁷ Yisu yaa dax lei naer lei a yaa leil ta a bbeix: “Ha du la, gexr nr ssa,” eine bbeix a. ⁸ Yaa i du lei a qie, Yisu lar halmaex hher dae ggje mia a.

⁹ Yaa wordabbor zeijjixr lei car, Yisu yar dax mae dae ca mel leil miardal a bbeix: “Ca Ddei Ssor si a yoxl gol du xixl lei eine nr nga seir xilmeir leil mel, nia nia meixcir mia mel ca leil biar gger nr ddo.”

¹⁰ Yar dax mae dae ca mel dder Yisu leil biex a bbeix: “Arsaenga a Arbosobo ddei sulsaexlsu mel bbeix xiezi Yirlixlyal Zidu xilmeir leil lei zaxr nia eine bbeix arddeir a leir?”

¹¹ Yisu ddarkoxl a bbeix: “Yirlixlyal mel hoba lei nia, halae cirza-hanga bei har zaxr lei nia. ¹² Nael ngo nia leil bbeix gger, Yirlixlyal lei ho a; ca mel zzael yar leil nr saexl, halae yar leil arsae bei niazzir arsae bei. Yel yaa Ca Ddei Ssor leil ggux ci nia.” ¹³ Yar dax mae dae ca mel eilcar saelnei Yisu biar dae eil ddei mel dder sexlsir gger su Yuehal leil biar arddeir a saexl.ⁱ

Yisu Neir Xiex Dae Caporssor Ddox Leil Ggukor Gger

^h**17:5** Moxrxi wordabbor deix car a, Arbosobo mel zico gga hher dae a, ca mel dax ddar biar. Cu'aezixr Sul 24:15-18 leil biar dae. Arbosobo zico gga hher dae a, Yirsaexllixl su ca mel leil yar leil eine mia lol Cu'aezixr Sul 13:21-22; 16:10; 19:9; 34:5; 40:34-38; Lixlweixljil Sul 16:2; halae Mixrsuxljil Sul 9:15-22; 11:25 leil biar dae.

ⁱ**17:13** Luxljia Sul 1:11-17 leil biar dae.

¹⁴ Giedae yaa ca mel dax jjixr ci car, capor ar ddei a Yisu dax lei a, yar xilmeir cizixl gger dae a bbeix: ¹⁵ “Seirpor, ngo ssor ddox leil arleixr zoxlnixr la. Yar caerfo a, yarzi goxr sol, zoxlzoxl a ajjix gga nei adoxl gga de zeï doxr. ¹⁶ Ngo yar leil ni dax mae dae ca mel dax hier mal goxr a. Nael yaa yar leil ggukor gger nr xie,” eine bbeix a.

¹⁷ Yisu bbeix: “Eil aer! Nia eilleix ca eil coxr mel Arbosobo leil zzae ddar-nr-zzi, nr seir mel zzae hazzi bei meixr. Ngo nia dax eilmaex arddolcar hher ci nia leir? Arddolcar sser ci nia leir? Anix ddox leil ngo dax eilmaex hier mal lei,” eine bbeix a. ¹⁸ Yel Yisu neir te leil hie a, neir te dder ddux lei a. Hane zzeze anix ddox dder kor gaxzi a.

¹⁹ Ca nr zza car, Yisu dax mae dae ca mel Yisu leil biex lei a bbeix: “Ngu aarsaenga a neir te lei ggaxr teixl lei nr xie?”

²⁰ Yisu yaa leil ddarkoxl a bbeix: “Nia ngo leil lalal a cirdoxr ddarzzi a nga arddeir a naer! Ngo nia leil yarzi bbeix gger, nia ngo leil varpei sil taex leilei sael a ardoxr ddarzzi a mel, nia dder worga eil ga leil bbeix: ‘Ni eilbbaer a halbbaer ba mal,’ eine bbeix zzorbbeixlei, yar ba mal a. Halae azo lei nia bei nr cexr ar jji nr zza. ²¹ [Neir eil yoxr dax bbeix ci a nael, nia Arbosobo dax ddar biar nei nrzzor-nrdda bei a saelnei nia ggaxr teixl lei xie.”^j

²² Yaa Jialixllixl mermi cirgo a hher dae car, Yisu yaa leil bbeix: “Ca Ddei Ssor lei a mel, si yar leil ca mel leixrga gga jia ji gger nia. ²³ Yaa yar leil bei zil gger nia, nael so ni cir ni yar gol du xixl lei nia,” eine bbeix a. Yaa dder yarzi sael cix.

Arbosobo Ddei Xi Ddei Suix Per Se

^j**17:21** *Neir eil yoxr dax bbeix ci a nael, nia Arbosobo dax ddar biar nei nrzzor-nrdda bei saelnei nia ggaxr teixl lei xie Arbosobo Ddei Sul cirberber gga ddar eil qier nr zza.*

²⁴ Giedae yaa Jiabaernoxt kax gga ssi ci a, Arbosobo leil zi ggie xi gga ddei suixsesu mel Birdaexr leil biex lei a bbeix: “Nia ddei sulmulu suix sax sax?”^k

²⁵ Birdaexr ddarkoxl a bbeix: “Sax mar.” Yar xi gga ddir a, Yisu yar leil hoba biex a bbeix: “Ximexr, middurbbor zzirmar mel, suix se a arseir dax se? Armael ddei ssor dax se bbeixsael si dax se?” Ni zzir dae a arsaesael nga?

²⁶ Yar ddarkoxl a bbeix: “Si dax se.”

Yisu bbeix: “Eine nga a ssor mel doxl suix sax nr ssa a lo. ²⁷ Nael niul yaa dax de nr ssa, yel ni neixvi qier leil ngol diuxl ssi a, ngol diuxl du lei beil ddei vei du lei; yar meir ddei maxr kae a, ni zzirbae ar taex mia var. Ni dder vei si a, niul nnel ddei suix per bei, yaa leil jia gger ddo a.”

18

Merhhexr Gga Arseir Vaer Zzir

¹ Halcar, Yisu dax mae dae su ca mel yar leil biex lei a bbeix: “Merhhexr ddei goxr gga arseir vaer zzir a?”

² Yisu dder aniuksor ar ddox ae gel lei a, yaa dax hher dae lol a ³ bbeix: “Ngo nia leil yarzi bbeix gger: Nia aniuks mel sael a eine loxr xixl a saelnei Merhhexr ddei goxr gga ddir cexr. ⁴ Yel ha arseir aniuks eil ddox sael a nr col a mel, yar dder Merhhexr ddei goxr gga vaer zzir ddei nga a.

⁵ Ha arseir ngo leil weix a aniuks ar ddox leil hexl a mel dder ngo leil hexl. ⁶ Ha arseir ngo leil ddarzzi su ca yelye ar ddei leil zuixl bei lol a mel

^k**17:24** Yoxrtaexl su capor mel mel ha nrzei koxl loxr ho a mel dder Arbosobo ddei xi ddei suix per sax nia. Cir koxl ar boxl sax nia, nr ni ddei worper sax nia. Cu'aezixr Sul 30:13-16 leil biar dae.

dder, yar leihher ddei leil nger ar ddei toxl gex gger a, neixvi neixlneixl gga niul ji gger lalssa. Eine nga a mel bir yar ngo leil ddarzzi su ca yelye ddei leil zuixl bei ssi lol leil seir.

⁷ Ca leil bei cox lol su mel zza var, yel mer woxrke cassor-worssor mel zoxr a! Ca leil bei cox lol su ca hal te lei zoxr a! ⁸ Ha ni ddei leixrhher ar bbor bbeixsael qihher ar bbor a, ni leil zuixl bei ssi lol arddeirnga a mel dder, taexl teixl lei a piar pixl gger. Ni leixrhher ar bbor bbeixsael qihher ar bbor nganiul a cirse-cirsil olga zza a mel, bir qihher leixrhher nr bbor jjia niar dae a cirse-cirsil adoxl bbiu dae ddei gga piar ji gger leil lei seir leixl. ⁹ Ha ni ddei meixddur ar bbor a ni leil zuixl bei ssi lol a mel dder, giexl teixl lei a, piar pixl gger. Ni meixddur cir bbor a niar dae a cirse-cirsil olga zza a mel, bir meixddur nr bbor jjia niar dae a, dixlyuxl gga adoxl bbiu dae ddei gga piar ji gger leil lei seir leixl.”^l

Bir Dae A Ya Pixl Ddei Leil Biar

¹⁰ “Nia ngo leil ddarzzi su ca yelye eil mel leil lei i ze i nr ddo lo. Ngo nia leil bbeix gger: yaa leil beijjiu su tisir mel merlabbor hher dae a, ngo ddei Merhhexr Arbbor leil mia ddo. ¹¹ [Ca Ddei Ssor lei a mel, ssi pixl dae ca hherdder zuixl bei su mel leil jiuxl lei arddeir a.]”^m

¹² Yisu yoxl bir dae a bbeix: “Ca ar ddei a ya cirxiuler zza, nael ar ddei ssi pixl a, nia zzir dae a yar arsae bei neil? Holbbaexl yar hal geceigeler leil worga leil hher dae lol a, ssi pixl dae hal ddei leil nr zo ssi a ngo?

¹³ Ngo nia leil yarzi bbeix gger, yar zo wo arddeirnga a, yar yarzisael ggese, bir ssi nr pixl geceigeler zza leil lei ggese leixl giel! ¹⁴ Nia

^l**18:9** Yisu ddei yils mel dder ca leil zuixl bei ssi lol var hal mel dax naer lei naer nr ddo.

^m**18:11** *Ca Ddei Ssor lei a mel, ssi pixl dae ca hherdder zuixl bei su mel leil jiuxl lei arddeir a. Arbosobo Ddei Sul cirberber gga eil qier nr zza.*

Merlabbor hher dae Arbbor lei ca eil ddei sael a nga, yar ca yelye eil mel gga cir ddei leil lei ssi pixl lol nr yuex, yel nia ca yelye eil mel leil i zeil nr ddo.”

Arzzi-Nimar Bei Cox A Arsae Bei Nia

¹⁵ Yisu yoxl bbeix: “Ni ddei arzzi-nimarⁿ ni leil de dae arddeirnga a, ni dder nia nnel a hher dae car a leil jiux dae a, yar bei cox dae mel yar leil bbeix teixl gger lei nia. Yar ni ddei ddar mel leil noni arddeirnga a, nia nnel dder tor xixl a. ¹⁶ Yar ni ddei ddar mel leil no-nr-ni arddeirnga a, ni dder ca cir nnel sael hier si. Eine nga a mel, ni bbeix dae ddar cirqier-hanga leil lei ca nr soler noni gger su zza a. ¹⁷ Nael yar halae yaa ddei ddar mel leil noni nr yuex arddeirnga a, ni dder jiaxlhuixl gga ca mel leil bbeix gger ddo a. Yar halae yaa ddei ddar mel leil lei noni nr yuex arddeirnga a, ni dder yar leil Arbosobo leil ddar-nr-zzi su nei suixsesu ca mel sael a i mal gger.

¹⁸ Ngo nia leil yarzi bbeix gger: Ha nia middurbbor neixl gex mel mel, Arbosobo merlabbor lei neixl gex. Ha nia middurbbor piur kae mel mel, Arbosobo merlabbor lei piur kae.^{o 19-20} Ngo yoxl nia leil yarzi bbeix gger: ca nr soler a, ngo leil koxl dae a, cirgo a Arbosobo dax ddar biar a, ngo dder yaa dax hher dax dae. Yel nia ca mel gga nnel sael a nixmox zzar ciryoxr a xiar dae a mel, Merhhexr Arbbor dax azo qiuxr lei, yar nia leil nia qiuxr dae mel gger nia.”

Bir Dae A Ca Leil Ssoxr-nr-suxl Ddei Leil Biar

^{n18:15} *Ni ddei arzzi-nimar* Ni ddei arzzi-nimar bbeix a mel, armael ddei arzzi-nimar galga mel leil lei bbeix, halae yoxl Yisu leil ddarzzi su mel leil lei bbeix.

^{o18:18} Ddar eil qier arddolyox yilsi zza Martaexl Sul 16:19 leil i ssi cexr.

²¹ Halcar a, Birdaexr Yisu leil biex lei a bbeix: “Seirpor, ngo ddei arzzi-nimar ngo leil de dae a, ngo yar leil hormo boxl ssoxrsuxl nia? Sir boxl loxr loxr a?”

²² Yisu bbeix: “Ngo ni leil bbeix gger, sir boxl nr nga a nei, sircei boxl eine sir boxl nga nia.

²³ Merhhexr ddei goxr ddei mel dder zzirmar ar ddei a yar ddei wormusu mel dax zzei suax sael a nga.^p ²⁴ Suax beil car, ca mel yar dax piu qiuxldumeixr taex^q ca dae ca ar ddei leil yar dax hier mal lei a.

²⁵ Nael ca eil ddei mel yar leil koxl gger du nr xie, yel zzirmar ddei dder miardal a, yar nei yar maerssor, anix, halae yar hazza lei vur pixl a, yar leil koxl gger lol.

²⁶ Wormusu hal ddei dder cizixl gger dae a, middur ddei leil puxr gex dae a bbeix: ‘Seirpor, ngo leil arleixr piur la seir, arddolcar a, ngo maelmaerjia lei ni leil koxl gger jjia,’ eine bbeix a. ²⁷ Wormusu hal ddei ddei seirpor ddei dder yar leil zoxlnixr a, yar leil piur a. Halae yar dax zzei ca dae mel lei koxl nr gger lol a.

²⁸ Nael wormusu hal ddei ddux lei a, yar dax piu cirxiu pir^s ca dae yar wor mu carbeix ar ddei leil mia a. Yel dder ca hal ddei leil ssu gex dae a, leibbei ddei leil zox gex dae a bbeix: ‘Ni ngo dax zzei ca dae mel ngo leil

^p**18:23** Bir dae a bbeix dae zzirmar hal ddei nael Arbosobo leil bbeix. Zzirmar ddei wormusu hal ddei nael cassor-worssor mel leil bbeix. Zzirmar ddei wormusu ddei yar dax zzei ca dae hal mel nael ca mel zuixl bei a Arbosobo leil dir dae hal mel leil bbeix.

^q**18:24** *qiuxldu-meixr taex* Xilaxl ddar bbeix: “Cirmeixr talixrdexr.” Talixrdexr cir ddei mel piu qiuxldu a; yel maelmaer a mel piu qiuxldumeixr (60,000,000) taex zza a.

^s**18:28** *piu cirxiu pir* Eil ddei mel dder wormusu mel cirxiu ni ddei worper nga a.

koxl gger nia, ' eine bbeix a.

²⁹Yel yar wor mu carbeix ddei dder cizixl gger ze i a, yar leil qiuxr a bbeix: 'Ngo leil nr ni sael piur la seir lar, arddolcar a, ngo ni leil koxl gger jjia, ' eine bbeix a.

³⁰Nael yar nr ddo, halae ca hal ddei leil cageggie ge ji gger a; hherdder yar dax zzei ca dae mel koxl gger jjia zzeze ci. ³¹Yar carbeix mel mia a, i nr goxr zildu a dder, eil mel seirpor ddei leil bbeix gger jjixr a.

³²Yel yaa seirpor ddei dder yar leil ae si lei a bbeix: 'Yarzi duxr wormusu eil te ni! Ni ngo leil qiuxr doxr a, ngo dder ni ngo dax zzei ca dae mel lei koxl nr gger lol a. ³³Holbbaexl ni, ni carbeix ddei leil ngo ni leil zoxlnixr mel sael a, zoxlnixr nr ddo a ngo?' ³⁴Yel seirpor ddei sirzzi zildu a, yar leil cageggie ca leil ggu su mel leil jia gger a; hherdder yar seirpor dax zzei ca dae mel koxl gger jjia zzeze ci."

³⁵Yisu bir dae a biar dae ddei biar teixl ho a yoxl bbeix: "Nia cirddeir-hanga lei nixmox zzar nia ddei arzzi-nimar mel leil ssoxr-nr-suxl arddeirnga a, ngo ddei Merhhexr Arbbor lei nia leil ssoxr-nr-suxl."

19

Maerssor Leil Nr Li Biar

¹Yisu ddar eil mel bbeix jjia a dder Jialixllixl mermi nr hher. Yuedaxl lazzarmo hal bbu leil ssi gel a Yoxrtaexl mermi ssi ci a. ²Ca seirseil ar cir a yar dax mae dae a, yar halmaex gga no su ca mel leil ggukor gger a.

³Farlixlsaexl ca mel Yisu leil sixr i lei a bbeix: "Maerssor ddei arsae lerler nga a, capor mel yar leil nr li bei ddo ddo?"

⁴⁻⁵Yisu ddarkoxl a bbeix: "Arbosobo merlo-milo bei halleix 'Capor

ssormaer bei a.^t ‘Capor mel maerssor bbeix a dder yar armael arbor ama dax bbe kae a, armael maerssor dax cirgo a hher nia. Eine nga a mel capor maerssor mel ca nnel a bbeixarnar, cir ddei sael a loxr ho a.’^u Holbbaexl nia Arbosobo ddei ddar mel zza nr goxr a ngo? ⁶ Eine nga a, capor maerssor mel ca nnel nr nga a nei, cir ddei a loxr ho sael a nga a. Yel Arbosobo daxrhoxr gger dae mel mel, ca mel bbe kae gger nr ddo.”

⁷ Farlixsaexl ca mel biex a bbeix: “Halmel, Moxrxi^v arsaenga a miardal a bbeix, maerssor ddei leil nr li sul ar zul gger a dder, yar leil nr li bei ddo eine bbeix?”

⁸ Yisu bbeix: “Moxrxi nia leil maerssor leil nr li lei ddo eine bei ddo bbeix a mel, nia nixmox taex gex a nga arnar a. Nael Arbosobo ca bei beil halleix mel eine nr nga. ⁹ Ngo nia leil bbeix gger: armael maerssor ker-nr-jiar lei, capor ddei mel yar leil nr li, kebal maerssor bbeix box. Eine bei a mel capor eil ddei dder kerjiar a.”^w

¹⁰ Yar dax mae dae ca mel Yisu dax bbeix: “Capor maerssor mel eine nga a mel, halmel jiexr-nr-hui a gielgiel seir a.”

¹¹ Yisu yaa leil ddarkoxl a bbeix: “Eil mel mel arseir lei bei ci ddo nr nga; Arbosobo arseir leil bei lol a saelnei arseir bei ci ddo. ¹² Ca cirmelmel a nael xiu teixl lei a dder ssormaer dax naer nr var, cirmelmel a nael si yaa leil ssormaer dax naer nr cexr lol, halae cirmelmel a nael Arbosobo leil weix a ssormaer dax naer nr yuex. Arseir bei ci xie mel yar bei ddo.”

¹³ Halcar, ca ar mel a anix mel Yisu dax hier mal lei a, Yisu leil gie a,

^t**19:4-5** Cuaxlsixljil Sul 1:27 leil vaexr dae.

^u**19:4-5** Cuaxlsixljil Sul 1:27 leil vaexr dae.

^v**19:7** *Moxrxi* Moxrxi mel Yoxrtaexl su ddei porpor yarzi middux ar ddei a. Cu'aezixr Sul, Semixljil Sul leil yar leil biar dae.

^w**19:9** Arbosobo Ddei Sul cirberber leil a bbeix: “Yar capor yar leil nr li ho ssormaer eil ddei leil bbeix su capor hal ddei lei kerjiar a.”

aniux mel leil ta gex dae a, Arbosobo dax ddar biar gger lol, nael yar dax mae dae ca mel yaa leil hie. ¹⁴ Yisu bbeix: “Merhhexr ddei goxr gga ca mel dder aniux eil mel sael a nga, yel aniux mel leil ngo dax eilmaex lei lol, yaa leil tor bbiur nr gex dae.” ¹⁵ Yisu leixrhher ddei yaa leil ta gex dae a, Arbosobo dax ddar biar gger ho a dder halmaex nr hher a.

Be Su Caleixlssor Ar Ddei A Olga Zza Doxr Dae Niazzir

¹⁶ Eine ar boxl a ca ar ddei a, Yisu dax lei a bbeix: “Sulmulu, ngo arddolyox seirseir bei a saelnei cirse-cirsil olga zza doxr dae var?”

¹⁷ Yisu ddarkoxl a bbeix: “Ni arsaenga a ngo leil arddolyox seirseir bei nia biex? Arbosobo lar seir. Ni olga zza doxr dae niazzir arddeirnga a mel, ni dder Arbosobo miardal dae mel bei mae dae nia.”

¹⁸ Yar biex a bbeix: “Miardal dae arddol mel?” Yisu bbeix: “Ca seixl nr ddo, kerjia nr ddo, zzaegu ker nr ddo, caserggie ddar jiar te nr ddo;

¹⁹ halae niabbor niama leil perniar nia, i du nia, armael leil perniar sael a si leil perniar nia.”

²⁰ Caleixlssor hal ddei ddarkoxl a bbeix: “Miardal dae eil mel maelmaerjia ngo bei mae a; halae azo bei dax nia seir?”

²¹ Yisu bbeix: “Ni seirceix-seirmaer ca bei niazzir arddeirnga a mel, ni dder ni ddei cirza-hanga vur pixl nia, casolssor leil bbe gger nia, ngo dax mae lei nia. Eine nga a mel, ni cirza-hanga seirseir mel dder merhhexr dax zza dae var.”

²² Nael caleixlssor hal ddei mel yarzi be, yel yar ddar eil mel noni ho a, gge-nr-se dae a ssi du si a.

²³ Yisu yar dax mae dae ca mel leil bbeix: “Ngo nia leil yarzi bbeix gger: be su ca mel Merhhexr ddei goxr gga ddir a mel yarzi ddir sol naer!

²⁴ Yoxl bbeix, yaa Merhhexr ddei goxr gga ddir a mel, bir loxltoxr hhexr nolba gga gger leil lei bei sol leixl!”

²⁵ Yar dax mae dae ca mel ddar eil mel noni ho a dder, yarzi sael

murgur a bbeix: “Armor! Halmel, arseir leil saelnei jiuxl wo ddo?”^x

²⁶ Yisu yaa leil i dae a bbeix: “Eil ddei mel, ca bei ci nr xie, nael Arbosobo azo lei bei ci xie.”

²⁷ Birdaexr dder yar leil bbeix: “Ni ardae i, ngua cirza-hanga lei piar dol dae a, ni dax mae lei a. Arddolcar a ngua azo li wo ddo?”

²⁸ Yisu bbeix: “Ngo nia leil yarzi bbeix gger: Ca Ddei Ssor yarzi ddo yarzi quexrlixl zza zzirmar bei lei a, yar zzirmar baxrde taex leil cux dae car a, nia ngo dax mae su ca mel lei baxrde ceinir taex leil cux dae a, Yirsaexllixl su ca ceinir cuxr leil ser nia. ²⁹ Ha ngo leil ddarzzi a, armael ddei xi, arzzi-nimar, arzzi-nimo, arbbor ama halae aniux dax cirgo a nr hher, mi mel lei nr li su ca mel, yaa zza mel ddei cirxiu peix meirne zza nia, halae cirse-cirsil lei gol dae nia. ³⁰ Nael eilleix ollele hher dae ca mel arddolcar a maelele hher nia, maelele hher dae ca mel nael ollele hher nia,” eine bbeix a.

20

Bir Dae A Puxrto Dae Ggie Miar Bei Ddei Leil Biar

¹ Yisu yoxl bbeix: “Merhhexr ddei goxr ddei mel dder puxrto mi gga ca seirpor ddei wormusu zo sael a nga. Yar eilneixrnehe merteir a ca ar mel zo si lei a, yar ddei puxrto dae ggie miar bei lei lol. ² Yar wormusu mel dax cir ni yaa leil piu ar pir gger bbeix har dae a dder, yaa leil puxrto dae ggie miar bei ssi lol a.^y

³ Eilneixrnehe 9:00 sael ci a, yar zziul gga halae xia dae ca ngier ggie

^x**19:25** Halcar Yoxrtaexl su ca mel zzir dae a cabesu mel Merhhexr ddei goxr gga ddir a mel bixr casolssor mel leil ddir so. Yaa zzir dae a, cabesu mel lei ddir nr cexr arddeirnga a, kebal ca mel gielgiel ddir nr cexr.

^y**20:2** Halcar mel cir ni ddei worper hherdder piu ar pir.

mia a ⁴ dder, yaa leil bbeix: ‘Nia lei puxrto dae ggie miar bei ssi, nia leil gger mibbe mel ngo nia leil gger nia.’ ⁵ Eine bbeix a, yaa dder puxrto dae ggie miar bei ssi a. Giedae eilnirggu 12:00 nei 3:00 sael ci a, yar yoxl ddux a, ca ar mel ngier ggie mia a, yaa leil lei xilmeir hal mel sael a puxrto dae ggie miar bei ssi lol a. ⁶ Mercixl jiur a, 5:00 sael ci a, yar ddux a zalbbaer halae ca ar mel ngier dae seir mia a dder, yaa leil bbeix: ‘Nia arsaenga a eilni cir ni azo lei nr bei ngier doxr dae?’

⁷ Nael yaa ddarkoxl a bbeix: ‘Nguia leil zo lei su ca nr zza a nga arddeir a.’

Yar dder yaa leil bbeix: ‘Halmel nia lei puxrto dae ggie miar bei ssi.’

⁸ Neixmar jiur a, puxrto dae ggie seirpor ddei dder wormusu mel leil guaxr su ddei leil bbeix: ‘Wormusu mel leil ae si la a, yaa leil worper gger; bei lei maelele ddei cirdae a bei lei beil ddei zzezze gger, eine bei.’

⁹ Mercixl jiur a, 5:00 sael zo si lei wormusu hal mel lei a, yaa cirddeir-hanga lei piu ar pir vei wo a. ¹⁰ Zo si lei beil wormusu mel lei lei a, yaa mel zzir dae a yaa bir kebal ca mel leil li wo miur ddo. Nael yaa lei ca cir ddei piu cir pir a vei wo. ¹¹ Yaa vei wo ho a dder puxrto dae ggie seirpor ddei leil bota a bbeix: ¹² ‘Nguia cirni-lorbba yarzi sulku, lexl doxr dae, giedae maelele lei mel mel cirleixr a bei,^z ni halae yaa leil nguia dax ciryoxr a nga lol a neir!’

¹³ Seirpor ddei yaa ca mel gga ar ddei leil ddarkoxl a bbeix: ‘Ggocar, ngo ni leil cirdoxr lei nga-nr-niul lol, niul doxl zzi dax cir ni piu cir pir bbeix har dae zzarmar?’ ¹⁴ Ni ddei meirne ddei vei dae a, ssi ddo a. Ngo giedae maelele lei ca mel leil ni dax ciryoxr a gger a mel, ngo gger yuex a nga arnar a. ¹⁵ Holbbaexl ngo ddei zzirbae mel arsae sser ngo lo-nr-zza a ngo? Ngo ca seir mu a ni dder nixnox a ngo?’ ”^a

^z20:12 *cirleixr a bei* Yaa yil goxl xiarsixr lar bei.

^a20:15 Puxrto mi gga ca seirpor ddei nael hherdder Yisu nga a;

¹⁶ Yisu bir dae a biar dae ddei biar jjia a, yoxlyoxl bbeix: “Ollele hher dae ca mel mel maelele hher nia; maelele hher dae ca mel mel ollele hher nia.”

Yisu Si Nia Bbeix Zaxr

¹⁷ Yisu Yiluxlsaler zzi gga ssi car, jjiumo car a gga, yar dax mae dae ca ceinirmo leil cir piar hier mal a yaa leil bbeix: ¹⁸ “Nia i dae ddo a! Niul Yiluxlsaler zzi gga ssi a, Ca Ddei Ssor leil mel Arbosobo leil zi su vaervaerpor mel leil nei Arbosobo ddei sulsaxlsu mel leil jia gger nia; yaa yar leil si nia zuixl dixl gger nia; ¹⁹ halae yoxl yar leil Yoxrtaexl su nr nga ca mel leil jia gger nia. Ca eil mel yar leil vaessi, lorddu sser a yar lei deil, yar leil sixrzixljiaxl ddei leil diexr ngexl gger, nael so ni cir ni yar gol du xixl lei nia.”

Ca Leil Visser

²⁰ Xibirtaexl ddei maerssor mel, yar ssor nrmel dax cirgo a, Yisu leil i lei a, yar xilmeir cizixl gger dae a, yar leil miar ar jji qiuxr.

²¹ Yel Yisu bbeix: “Ni azo li niazzir dae?”

Yar ddarkoxl a bbeix: “Ni zzirmar bei car, ngo ddei ssor nrmel leil ni ddei goxr ddei gga, ni vael piar a gga ar ddei, yo piar a gga ar ddei cux dae lol la.”

²² Yisu ddarkoxl a bbeix: “Nia azo qiuxr dae mel nia nr saexl. Ngo solzeixl ddu mel nia solzeixl teixl lei xie xie?”

Yaa bbeix: “Nguua solzeixl teixl lei xie.”

²³ Yisu bbeix: “Ngo solzeixl nia mel nia lei solzeixl nia, nael arseir ngo vael piar a bbeixsael yo piar a cux mel, ngo lo-nr-zza. Ngabbor arseir

wormusu mel nael Yisu leil ddarzzi su mel nga a. Seirpor wormusu leil worper gger halcar nael hherdder Yisu ca mel leil ser hal cir ni nga a. Worper nael hherdder cirse-cirsil zza dae olga ddei nga a.

leil bei har zaxr gger dae a mel dder arseir leil a gger.”

²⁴ Yisu dax mae dae hal ceimo mel dder eil mel leil bbejjiur ho a dder, yaa nr hieni leil yarzisael sirzzi. ²⁵ Yisu yaa leil ae si lei a bbeix: “Nia lei saexl, Arbosobo leil nr saexl su ca mel ddei vaervaerpor mel mel ca leil guaxr meixr yarzi middarzza. ²⁶ Nael nia mel eine bei nr ddo. Nia ca mel gga arseir vaer niazzir a mel, yar dder ca leil visser su bei nia. ²⁷ Arseir vaer zzir ddei bei niazzir a mel, yar dder nia ddei zebol bei nia.

²⁸ Hherdder Ca Ddei Ssor ddei bei dae mel sael a nga. Yar lei a mel ca mel yar leil visser lol nr nga a nei, yar ca mel leil visser lei arddeir a. Yar mel yar ddei olga ddei nr li a, cassor-worssor leil jiuxl a.”

Meix Nr Mia Ca Nnel Leil Ggukor Gger

²⁹ Giedae Yisu nei yar dax mae dae su ca mel Yilixlge zzi gga ddux lei car, ca seirseil ar ke a Yisu dax mae ssi a. ³⁰ Jjiumo qier leil mia nr xie ca nnel cux dae, yaa Yisu ssi gel lei dae bbeix ggie bbejjiur a dder worcixl-worni ae dae a bbeix: “Seirpor, Daxlweixl giedae ca, ngua leil arleixr zoxlnixr la!”

³¹ Ca mel zzael yaa leil hie a, yaa leil nr ae lol. Nael yaa gielgiel worcixl-worni ae dae a bbeix: “Seirpor, Daxlweixl giedae ca, ngua leil arleixr zoxlnixr la bbeix naer!”

³² Yel Yisu dder ngier dae a, yaa leil ae gel lei a bbeix: “Nia ngo leil nia leil azo bei gger lol niazzir?”

³³ Yaa bbeix: “Seirpor, ngua mia xie niazzir.”

³⁴ Eine bbeix a, Yisu dder yaa leil zoxlnixr a, yaa meixddur ddei leil arleixr ta a, yaa saexl loci a qie mia xie a. Yel dder Yisu dax mae a.

21

Yisu Yiluxlsaler Zzi Gga Ddir

¹ Yisu nei yar dax mae dae ca mel Yiluxlsaler zzi gga ssi ci jiur a, Saercor worga ga leil Boxfaxrcixr kax ddei gga ssi ci car, Yisu dder yar dax mae dae ca nnel leil miardal a ² bbeix: “Nia deixrgoxr kax hal ddei gga ssi ci a qie, neixl gex dae tarlodaex ar ddei mia ddo, halae tarlodaexssor ar ddox hher dax dae, nia pe kae a ngo dax eilmaex gga si la. ³ Ca nia leil arsae lerler bbeix arddeirnga a, nia dder bbeix: ‘Seirpor yaa leil sser zoxr.’ Eine bbeix a, ca hal ddei dder nialngasael nia leil gga si lei lol var.”

⁴ Eine nga a mel dder xiezi bbeix goxr mel yarzi loxr a: xiezi bbeix

⁵ “Nia Xi'a zzi gga ssormaer ddei leil bbeix gger nia:

‘Ni i dae la ddo a.

Ni ddei zzirmar ddei cirdoxr lei nr col tarlodaexssor zzaer dae a, ni dax eilmaex lei,’ ”^b

eine bbeix a.

⁶ Yisu dax mae dae ca mel dder yar miardal dae mel sael a bei ssi a.

⁷ Yaa tarlodaex ddei leil nei tarlodaexssor ddox leil gga si lei a, armael ddei teixlsibbor pia xiux sser a, tarlodaexssor zzoxxrbbeix ddei leil nal gex gger a, Yisu dder zzaer deix a. ⁸ Ca seirseil ar ke a lei armael ddei teixlsibbor pia xiux sser a, jjiimo zex gga kar dae, halae ca ar mel a sixpeixl mel taexl zeil lei a, jjiimo zex gga kar dae. ⁹ Xilmeir ssi su, giedae ssi su ca mel lei ae dae a bbeix:

“Hexrsaxlnaxl!^c Daxlweixl ddei giedae ca^d leil bbeix zae gger nia!^e

^b21:5 Sarjialixlyal Sul 9:9 leil vaexr dae.

^c21:9 *Hexrsaxlnaxl!* Hexrsaxlnaxl ddei yilsil mel dder ngua leil jiuxl la.

^d21:9 *Daxlweixl ddei giedae ca* Xilaxl ddar bbeix “Daxlweixl ddei ssor.”

Seirpor yar miardal si lei su hal ddei leil seir lol nia!^f
Hexrsaxlnaxl! Mu zzir ggie hher dae Arbosobo leil bbeix zae gger
nia!”^g

¹⁰ Yisu Yiluxlsaler zzi gga ddir car, zzi gga ca maelmaerjjia lei zzer du lei a. Ca mel biex a bbeix: “Ca eil ddei arseir a leir?”

¹¹ Ca mel ddarkoxl a bbeix: “Yar mel Jialixllixl mermi Naxrsalexl kax gga su Yisu ddei nga a. Yar xiezi ar ddei a.”

Yisu Arbosobo Ddei Xi Gga Ca Mel Leil Ggaxr Pixl Gger

¹² Yisu Yiluxlsaler zzi gga ssi ci a, Arbosobo ddei xi zzaexggu gga ddir a.^h Yel vaexleixr bei su maelmaerjjia leil ggaxr teixl gger a; halae zzirbae bo su mel ddei zaezir nei dderbel vur su mel ddei baxrde mel bbax pox gger a.ⁱ ¹³ Yoxl yaa leil bbeix: “Arbosobo Ddei Sul ber leil vaexr dae a Arbosobo bbeix:

^e**21:9** *Daxlweixl ddei giedae ca leil bbeix zae gger nia!* Ca eil mel eine bbeix a mel dder yaa Yisu mel Zidu a ssexl a.

^f**21:9** *Seirpor yar miardal si lei su hal ddei leil seir lol nia!* Miardal si lei su hal ddei mel dder ca leil jiuxlsu. Yar leil Zidu nei Mirsaexlyal bbeix. Yar mel dder Seirpor ddei mi ddei leil koxl dae a lei su ddei nga a.

^g**21:9** Sipi Sul 118:25-26 leil vaexr dae.

^h**21:12** Yisu Arbosobo ddei xi giex maelleil zzaexggu gga hher dae. Eilmaex mel Yoxrtaexl su nr nga ca mel Arbosobo leil bbeix zae gger halae yar dax ddar biar cexr. Nael Yoxrtaexl su mel eilmaex gga vaexleixr bei ggie ar maex bei mal gger a.

ⁱ**21:12** Sarjialixlyal Sul 14:21, Yilixlmir Sul 26:1-15, Hexrxi'a Sul 9:15-16, Marlazi Sul 3:1-5 leil biar dae.

‘Ngo ddei xi mel, ngo dax ddar biar ggie a;’^j
nael nia ‘zzaexpor cide ar ddei’ bei mal gger a.”^k

¹⁴ Jianiar hal cir ni Arbosobo ddei xi gga hher dae mia nr xie nei pirdael dae ca mel Yisu dax lei a, Yisu yaa leil ggukor gger a. ¹⁵ Yel Arbosobo leil zi su vaervaerpor nei Arbosobo ddei sulsaxlsu mel, Yisu murgurgurmo bei dae eil mel leil mia, yoxl aniuksor mel Arbosobo leil zi ggie xi gga “Hexrsaxlnaxl! Daxlweixl giedae ca leil bbeix zae gger nia,” eine bbeix ggie bbejjiur a dder, sirzzi zildu a.

¹⁶ Yel Yisu leil bbeix: “Yaa azo bbeix dae ni bbe-nr-jjiur zzar?”
Yisu ddarkoxl a bbeix: “Bbejjiur a mar. Arbosobo Ddei Sul ber leil bbeix:

‘Aniuksor nei aniuks bexlelte hal mel lei ni leil bbeix zae gger nia,’^l
eine bbeix a.

Eil mel nia zza goxr a zzarmar?”

¹⁷ Yel Yisu dder yaa dax nr hher, zzi gga ddux a Boxrdaxlnixr kax gga ssi a, halmaex xixl dae a.

Vuxrhuagol Sixzzei Zzei Hie Zzu

¹⁸ Giedae cirnehe, yaa Yiluxlsaler zzi gga jjixr lei car, Yisu zzo meixr a.
¹⁹ Yar jjiumo qier leil vuxrhuagol ar zzei mia a dder, ssi naer a saer zo, nael azo lei zo nr wo, seixlpeixl lar nga. Yel dder sixzzei zzei leil bbeix: “Eine zzezze ni cirse-cirsil lei saer niar nr var a!” Eine bbeix a,

^j**21:13** Yirsaexlyal Sul 56:7 leil vaexr dae.

^k**21:13** Yilixlmir Sul 7:11 leil vaexr dae.

^l**21:16** Sipi Sul 8:2 leil vaexr dae.

vuxrhuagol zzei cirleixr a dder hie zzu a.^m

²⁰Yar dax mae dae ca mel mia a, yarzisael murgur a bbeix:

“Vuxrhuagol zzei arsaenga a cirleixr a dder hie zzu arddeir a leir?”

²¹Yisu yaa leil ddarkoxl a bbeix: “Ngo nia leil yarzi bbeix gger, nia ngo leil ddarzzi gaxzi arddeirnga a, ngo vuxrhuagol zzei leil bei dae mel nia bei var. Halae yoxl worga eil ga leil bbeix: ‘Ni eilmaex gga ba pixl a neixvi gga piar ji,’ eine bbeix dder eine nga var. ²²Nia Arbosobo dax ddar biar a, azo qiuxr zzorbbeixlei, ddarzzi a mel dder li wo ddo.”

Arseir Yisu Leil Ddo Lol

²³Yisu Arbosobo ddei xi ddei zzaexggu gga ddir ci a, ca leil mul gger dae car, Arbosobo leil zi su vaervaerpor mel nei ca leil guaxr su camar mel yar leil biex lei a bbeix: “Ni azo quexrlixl koxl dae a eil zzu bei neil? Arseir ni leil einezeixl ddo lol leir?”

²⁴Yisu yaa leil ddarkoxl a bbeix: “Ngo xilmeir nia leil ddar ar qier biex. Nia ngo leil ddarkoxl arddeirnga a, ngo dder ngo azo quexrlixl koxl dae a eil zzu bei nia leil bbeix gger. ²⁵Sexlsir gger su Yuehal ddei ca leil sexlsir gger a mel arseir leil koxl dae a bei? Merhhexr Arbosobo leil koxl dae a bei bbeixsael ca leil koxl dae a bei neil?”

Yaa dder zzicarzzi dax zzibbe a bbeix: “Niul arsae ddarkoxl nia? Niul bbeix: ‘Merhhexr Arbosobo leil koxl dae,’ eine bbeix arddeirnga a, yar dder bbeix: ‘Halmel nia arsaenga a Yuehal leil ddar-nr-zzi?’ eine bbeix var. ²⁶Cassor-worssor lei Yuehal mel xiezi ar ddei a zzir dae, yel niul bbeix: ‘Yuehal ca leil koxl dae lalnga,’ eine bbeix arddeirnga a, niul yoxl

^m**21:19** Ca cirmelmel zzir dae a vuxrhuagol bbaexl Yoxrtaexl su ddei vaervaerpor mel leil bbeix. Yoxrtaexl su ddei vaervaerpor mel armael leil lar guaxr, kebal su ca mel leil nr guaxr a, Arbosobo sirzzi. Eil ddei Yilixlmir Sul 8:4-13 leil biar dae.

cassor-worssor mel dax gexrddo.”ⁿ

²⁷ Yel yaa dder Yisu leil ddarkoxl a bbeix: “Ngua nr saexl.”

Yisu lei yaa leil bbeix: “Halmel ngo lei arseir leil koxl dae a eil mel bei, nia leil bbeix nr gger.”

Bir Dae A Ssor Nrnleil Leil Biar

²⁸ Yisu yoxl bir dae a Arbosobo leil zi su vaervaerpor mel leil nei ca leil guaxr su camar mel leil bbeix: “Ca ar ddei a ssor nrnel zza. Yar ssor vaervaer ddei leil bbeix: ‘Albor, ni eilni puxrto dae ggie miar bei si la.’

²⁹ Yar ddarkoxl a bbeix: ‘Ngo nr ssi,’ nael giedae yar xiarbei a dder ssi a.

³⁰ Yar yoxl ssor yelye ddei leil lei eine bbeix a. Ssor yelye ddei yarbbor leil ‘Ngo ssi,’ eine ddarkoxl a; nael yar ssi zzael nr ssi.

³¹⁻³² Nia zzir dae a ssor eil nrnel arddol ddei sael yarbbor miardal dae mel bei ssi?”

Yaa ddarkoxl a bbeix: “Ssor vaervaer ddei.”

Yisu bbeix: “Ngo nia leil yarzi bbeix gger, nia mel Yuehal nia dax lei a, nia leil arsae ca seir mu nia bbeix gger a lei nia ddar-nr-zzi, nael suixsesu nei ggecir vurllesu mel yar leil ddarzzi a. Nia yaa ddarzzi dae mia a lei nixmox zzar halae huixr-nr-soxr, yar leil ddar-nr-zzi. Yel suixsesu nei ggecir vurllesu mel nia xilmeir leil Arbosobo ddei goxr ddei gga ddir nia.”

Bir Dae A Mi Ba Paxr Su Mel Leil Biar

³³ Yisu yaa leil bbeix: “Nia zeixleixr bir dae a biar dae ar ddei noni. Ca

ⁿ**21:26** Cassor-worssor mel zzir dae a Yuehal Arbosobo leil koxl dae a ca leil sexlsir gger. Yel yaa Arbosobo leil zi su vaervaerpor mel nei ca leil guaxr su camar mel Yuehal mel ca leil koxl dae a sexlsir gger lalnga eine bbejjiur arddeirnga a, cassor-worssor mel yaa leil vuxryixr var.

seirpor ar ddei a, puxrto dae ggie^o ar ddei zza. Zaza-lili lei weixrqiaxr weixr du lei a, nalzzar puxrto zziibaer nixl ggie bbeddur ar ddei giexl dol dae, puxrto su ggie xi mumumo ar giex zi dae a, si leil ba gger a. Yar nael kebal mermi ssi a. ³⁴ Giedae puxrto mi zi ci a, yar, yar leil miar bei gger su mel leil zi a, puxrto dae ggie ba su mel dax ssi lol a, saer mel vei ssi lol. ³⁵ Nael ca hal mel yar leil miar bei gger su mel leil ssu gex dae a, cir ddei leil a nael deil, cir ddei leil a nael seixl zil gger, halae cir ddei leil a nael legelbbe zax zil gger a. ³⁶ Seirpor ddei yoxl kebal yar leil miar bei gger su mel leil zi teixl a. Ca eil mel bir xilmeir leil lei miur. Nael puxrto dae ggie ba su mel halae yaa leil xilmeir hal mel sael a bei a. ³⁷ Giedae seirpor ddei bbeix: ‘Ca hal mel ngo ssor ddei leil i du var.’ Yar dder yar ssor ddei leil miardal teixl a.

³⁸ Nael puxrto dae ggie ba su mel zzae yar ssor leil mia a dder zzicarzzi dax bbeix: ‘Ca eil ddei mel puxrto dae ggie seirpor ddei cirza-hanga li mibbe su ddei a. Lei. Niul yar leil seixl zil gger a, yar ddei cirza-hanga li wo ddo a.’ ³⁹ Yaa dder yar leil ssu du lei a, puxrto dae ggie maelleil dder teixl gger a, seixl zil gger a.

⁴⁰ Hane nga a, puxrto dae ggie seirpor ddei lei car, ca hal mel leil arsae bei var neil?”

⁴¹ Yaa ddarkoxl a bbeix: “Yarzi gexrddo bei su ca hal mel leil seixl zil gger, halae puxrto dae ggie eil ddei ba per gger zi ci a, gger leilei kebal ca hal mel leil ba box gger nia.”^p

^o**21:33** *puxrto dae ggie* Yirsaexlyal Sul 5:1-7 leil lei puxrto dae ggie ddei leil biar.

^p**21:41** Bir dae biar a dae eil ddei gga puxrto dae ggie ddei seirpor ddei nael Arbosobo a. Puxrto dae ggie ba su yarzi gexrddo ca hal mel nael Arbosobo ddei ddar no-nr-ni Yirsaexllixl su ca mel nga a. Puxrto mel nael yaa Arbosobo leil weix a seirseir bei mibbe hal mel nga a. Seirpor

⁴² Yisu bbeix: “Arbosobo Ddei Sul ber leil vaexr dae a bbeix:

‘Sixrjiuxr xiax su ca mel piar pixl gger legelbbe hal taex^q mel,
xie giexrluxl gga sixrjiuxr leil zoxlyoxl zzir legelbbe taex loxr ho a.
Seirpor bei dae eil mel niul meixddur gga i dae a yarzi murgur,^s
eine bbeix a.

Holbbaexl ddar eil mel nia zza nr goxr a ngo?

⁴³ Nia ngo leil ddarzzi nr yuex a, yel ngo nia leil bbeix gger, Arbosobo nia leil yar ddei goxr gga nr ddir lol, Arbosobo ddei ddar no su mel leil ddir lol nia. ⁴⁴ Arseir legelbbe hal taex leil de deix dae a mel, arseir dder cingge-circir lei meme-laxllaxl loxr nia, legelbbe hal taex arseir leil de deix dae a mel, arseir leil zax xiaxr gger nia.”

⁴⁵ Arbosobo leil zi su vaervaerpor mel nei Farlixlsaexl ca mel bir dae a bbeix dae eil mel noni ho a dder, yaa leil bbeix dae saexl a. ⁴⁶ Yel yaa Yisu leil ssu du lei niazzir, nael ca mel mel Yisu mel xiezi ar ddei a zzir dae, yaa ca mel leil gexr a, ssu nr bel.

22

Bir Dae A Ggie Baxl Ddei Leil Biar

leil visser su mel nael xiezi mel nga a. Seirpor ddei ssor nael Yisu nga a. Ba box gger nia bbeix dae ca hal mel nael Arbosobo ddei ddar noni yuex su mel nga a.

^q**21:42** *legelbbe hal taex* Legelbbe eil taex mel dder Yisu nga a. Yirfuxrsor Sul 2:19-22 leil i ssi. Legelbbe piar pixl gger su ca mel dder Yisu leil ddar-nr-zzi su nga a.

^s**21:42** Sipi Sul 118:22-23 leil vaexr dae.

¹ Yisu yoxl bir dae a yaa leil bbeix: ² “Merhhexr ddei goxr ddei mel dder zzirmar ar ddei a, yar ssor ddei leil ggje baxl gger sael a nga. ³ Yel yar, yar leil visser su mel leil zi a, yar qie dae ca mel leil zzorci-ddami zzor lei ddo a bbeix gger ssi lol, nael ca mel zzael lei nr yuex.

⁴ Zzirmar ddei yoxl kebal yar leil visser su ar mel leil zi a bbeix: ‘Nia seivi mel leil ngo sei hha har dae ho a; niurbol nei zzeir paxlpaxl lei seixl har ho a; cirza-hanga lei bei har ho a; nia zzorci-ddami zzor lei ddo a; eine bbeix gger ssi.’

⁵ Nael ca hal mel halae armael bei armael zze, no lei no-nr-ni ssi du si a. Cir ddei a nael mi dax ssi, cir ddei a nael vaexleixr bei ssi. ⁶ Kebal ca mel nael yar leil visser su mel leil ssu gex dae a, yaa leil ggu, yaa leil seixl zil gger a. ⁷ Yel zzirmar ddei dder sirzzi zildu a, meixr mel leil zi teixl a, caseixlsu hal mel leil bei zil gger ssi lol, halae yaa hher dae zzi ddei cu pixl gger lol.

⁸ Yoxl yar leil visser su mel leil bbeix: ‘Sei doxl hha har ho a; nael xilmeir qie dae ca mel lei nr piar. ⁹ Yel nia zzijiul gga jjiucaxl mel dax ssi a, ha nia dax zzi ca mel leil dder qie si la a, ngo dax cirgo a zzorci-ddami zzor lei lol.’ ¹⁰ Yaa dder ddux a; jjiumo car gga ssi ci a, ha yaa dax zzi ca mel dder seirseir nr seir lei qie si lei a. Yel sei hha dae mel leil seivi cux bbi a.

¹¹ Nael zzirmar ddei seivi mel leil i lei a, ca ar ddei a mel pia naxrcixlcixl nr veixr dae ggje mia a. ¹² Yel yar leil bbeix: ‘Ggocar, ni eilmaex lei a mel arsae pia naxrcixlcixl nr veixr leir?’ Ca hal ddei yar leil cir qier lei ddarkoxl teixl lei nr xie.

¹³ Zzirmar ddei dder yar leil visser su ca mel leil bbeix: ‘Ca eil ddei leil qihher, leixrhher neixl gex du la a, zalbbaer neixmar ggje^t piar teixl gger

^t**22:13** *neixmar ggje* “Neixmar ggje” bbeix a mel dixlyuxl leil bbeix arddeir a.

ssi. Yar zalbbaer hher dae a, ser ddei giexrgiexlgiexr kexl gex dae a aenge nia.’ ”

¹⁴ Yisu bir dae a bbeix dae ddei bbeix teixl a yoxl bbeix: “Qie dae ca nael miur, tiur lal ca zzael nganiul.”^u

Loxrmarm Goxrjia Zzirmar Leil Suix Sax Gger

¹⁵ Yisu bbeix jjia a Farlixlsaexl ca mel dder ddux a, zzicarzzi dax Yisu ddar bbeix dae mel leil zox dae a, yar leil arsae ke nia zzubbe ssi. ¹⁶ Yel dder yaa dax mae dae ca mel leil zi a Silixl vaervaerpor dax mae dae ca mel dax^v cirgo a Yisu leil i ssi lol a bbeix: “Sulmulsu, ngua saexl, ni ca nr fur lei. Ca mel arsae xiar dae zzorbbeixlei, ni Arbosobo ddei ddarzi mel ca leil mul gger. ¹⁷ Ngua leil bbeix gger la, ni zzir dae a, niul Loxrmarm goxrjia ddei zzirmar^w leil suix sax gger a hoxr hoxr?”^x

^u**22:14** Bir dae a biar dae eil ddei zzirmar nael Arbosobo a. Zzirmar ddei ssor nael Yisu a. Zzirmar leil visser su nael xiezi a. Qie beil seivi hal mel nael Yisu leil ddar-nr-zzi Yirsaexllixl su mel a. Giedae jjiumo car gga qie si lei hal mel nael Yisu leil ddarzzi yuex su mel a. Seivi mu lei su ca mel veixr dae piar mel nael yaa ca mu a arsae lerler bei dae hal mel nga a. Yisu leil koxl dae su mel pia naxrcixl veixr. Armael leil koxl dae su mel pia naxrcixl nr veixr.

^v**22:16** *Silixl vaervaerpor dax mae dae ca mel dax* Silixl vaervaerpor dax mae dae ca eil mel Yoxrtaexl su. Yaa zzir dae a Yoxrtaexl su mel Loxrmarm goxrjia leil suix sax gger mibbe. Farlixlsaexl su ca mel nael zzir dae a sax gger mi-nr-bbe.

^w**22:17** *Loxrmarm goxrjia ddei zzirmar* Xilaxl ddar bbeix “Kaersaxl” eine bbeix. Yilsi mel dder zzirmar.

^x**22:17** Farlixlsaexl su mel Loxrmarm goxrjia su ca mel leil li-nr-zoxr. Silixl vaervaerpor dax mae dae ca mel nael Loxrmarm goxrjia su mel leil

¹⁸ Yisu yaa nixmox taex yarzi neix i teixl lei a dder bbeix: “Ca seir bei laexl su eil mel nia! Arsaenga a ngo leil sixr i?” ¹⁹ Nia suix sax dae zzirbae mel ar pir vei si lei a, ngo leil i lol.” Yel yaa dder yar leil piu ar pir vei gger si lei a. ²⁰ Yisu bbeix: “Zzirbae taex leil niar dae mi ddei arseir ddei mi a; oldde taex arseir ddei oldde a?”

²¹ Yaa ddarkoxl a bbeix: “Loxrmr goxrjia zzirmr ddei ddei a.” Yisu bbeix: “Halmel Loxrmr goxrjia zzirmr ddei zzaegu mel yar leil koxl gger nia; Arbosobo ddei zzaegu mel nael Arbosobo leil koxl gger nia.”

²² Yaa ddar eil mel noni ho a dder yarzi murgur, yel yar dax nr hher, ssi du si a.

Ca Si A Gol Du Xixl Lei Ddei Leil Biar

²³ Sardugie ca mel ca si ho a, gol du xixl lei ddar-nr-zzi, yel jianiar hal cir ni, yaa Yisu leil biex lei a bbeix: ²⁴ “Sulmulu, Moxrxi bbeix: ‘Ca ar ddei a anix lei nr zza seir dder si a, yel yar maerssor lar nga arddeirnga a, yar nimar dder yarlor leil bbeix a yar maerssor bei lol a, yargo leil ssormine hier gger nia.’ ”^y ²⁵ Yaa dder bir dae a Yisu dax bbeix: “Ngua dax eilmaex arzzi-nimar sir hieni ar hhexr zza. Vaervaer ddei mel maerssor bbeix wo ho a, anix lei nr zza dder si a. Yel yar maerssor ddei yar nimar mel leil piar dol gger dae a. ²⁶ Yar nimar leixleix ddei yarlor leil bbeix a, anix nr zza seir dder si a. Bbaexbbaex ddei cirdae a, sir hieni jjia lei yarlor leil bbeix a, anix nr zza si a. ²⁷ Maelele ci a ssormaer hal ddei lei si a. ²⁸ Ngua ni leil arleixr biex, yar mel arzzi-nimar sirler jjia leil

lizoxr. Yel Farlixlsaexl su zzir dae a Yoxrtaexl su Loxrmr goxrjia su mel leil suix sax gger nr ssa. Silixl dax mae dae ca mel nael Loxrmr goxrjia su mel leil suix sax gger yuex. Yel yaa nr cir cirgo a biex lei a mel, Yisu leil sixr i lei arddeir a.

^y**22:24** Semixljil Sul 25:5-6 leil vaexr dae.

lei fu gger goxr a. Nael si ho a, gol du xixl lei nixixl hal cir ni ci a, yar arddol ddei ddei maerssor a neil?”

²⁹ Yisu yaa leil ddarkoxl a bbeix: “Nia mel Arbosobo Ddei Sul ber leil noni wo nr xie, halae Arbosobo arsaesael ddo lei nia nr saexl, yel nia eine bbeix a mel nr hoxr. ³⁰ Ca mel si ho a gol du xixl lei car a mel, maerssor bbeix su lei nr zza, ssormaer fu su lei nr zza, yaa dder tisir mel lesel. ³¹ Ca si ho a, gol du xixl lei ddei leil bbeix ci a mel, Arbosobo yar ddei sul ber leil nia leil bbeix gger dae, holbbaexl nia zza nr goxr a ngo?”

³² Arbosobo bbeix: ‘Ngo mel Yalboxrlahar ddei Arbosobo a; Yirsar ddei Arbosobo a; Yargel ddei Arbosobo a.’^z Yilsi ddei mel dder bbeix: Arbosobo mel gol dae ca mel ddei Arbosobo a; ca sima mel ddei Arbosobo nr nga.”^a

³³ Yel ca mel Yisu mul gger dae eil mel noni ho a, yarzi murgur.

Miardal Dae Vaer Zzir Ddei

³⁴ Giedae Farlixsaexl ca mel Yisu Sardugie ca mel leil bbeixddu lei nr zza bbeix mal gger a bbejjiur a, Farlixsaexl ca mel dder cirgo a hher pex du lei a. ³⁵ Yaa ca mel gga Moxrxi vaexr dae Lixlfaxr saexl su ar ddei a, Yisu leil sixr i lei a dder yar leil biex a bbeix: ³⁶ “Sulmulu, Moxrxi vaexr dae Lixlfaxr leil miardal dae mel gga arddol ddei zoxlyoxl zzir a neil?”

³⁷ Yisu ddarkoxl a bbeix: “ ‘Ni nixmox cirtaex-lorbba, xiu cirddeir-lorbba, ca cirddeir-lorbba ni ddei Seirpor Arbosobo leil perniar nia.’ ³⁸ Eil ddei mel dder miardal dae mel gga zoxlyoxl zzir ddei nga a.

³⁹ Zeixleixr lei zoxlyoxlyoxl ar ddei zza hherdder ‘Ni armael leil perniar

^z22:32 Cu'aezixr Sul 3:6 leil vaexr dae.

^a22:32 Yisu eine bbeix a mel, Sardugie su ca mel leil saexl lol Yalboxrlahar, Yirsar, nei Yargel si ho a bbeixarnar, yaa gol du xixl lei a.

mel sael a si leil perniar nia.’^b ⁴⁰ Moxrxi vaexr dae Lixlfaxr nei xiezi mul gger dae maelmaerjia lei Arbosobo miardal dae eil nr tiuxr mul gger arddeir a.”

Zidu Mel Arseir Ddei Ssor

⁴¹ Yel Farlixsaexl ca mel cirgo a hher dae car, Yisu yaa leil biex a bbeix:

⁴² “Nia zzir dae a Zidu arseir a? Yar arseir ssor a neil?”

Yaa ddarkoxl a bbeix: “Daxlweixl ddei ssor a.”

⁴³ Yisu bbeix: “Halmel, Arbosobo ddei Xiu ddei Daxlweixl dax hher dax dae car, Daxlweixl arsaenga a Zidu leil Seirpor ae a bbeix:

⁴⁴ ‘Seirpor Arbosobo ngo ddei Seirpor leil bbeix:^c

ni ngo yo piar a gga cux dae a ngo leil xia dae,
ngo ni leil vuxryixr su mel leil deil leixl gger,

ni qihher woxrke jjiux ji dae sael a nga lol hane zzeze ci.’^d

⁴⁵ Daxlweixl lei Zidu leil Seirpor ae dae mel, yar arsaee Daxlweixl ddei ssor nga var bbeixleir?” ⁴⁶ Yaa yar leil ddarkoxl teixl lei xie su ar ddei nr zza. Hal cir ni zzeze, arseir lei yar leil azo lei biex nr bel a.

23

Yisu Arbosobo Ddei Sulsaxlsu Nei Farlixsaexl Su Ca Mel Leil Bota

¹ Giedae, Yisu cassor-worssor mel leil nei yar dax mae dae ca mel leil

² bbeix: “Arbosobo ddei sulsaxlsu mel nei Farlixsaexl ca mel Moxrxi

^b22:39 Lixlweixljil Sul 19:18 leil vaexr dae.

^c22:44 Xilmeir bbaer bbeix dae Seirpor ddei mel Arbosobo a;
giedaebbaer bbeix dae Seirpor ddei mel Zidu a.

^d22:44 Sipi Sul 110:1 leil vaexr dae.

sael a ca leil Lixlifaxr mul gger, ³ yel ha yaa mul gger dae mel dder nia zabbar seirseir a bei nia. Nael yaa mel bbeix dae arnar, bei ci nr xie, yel nia yaa dax bei mae dae nr ddo. ⁴ Yaa ca mel leil bil lei bil du nr ddo daxr ddei bil dae lol, nael armael zzael leixrni ddei lei ha bbaeyo.^e

⁵ Yaa bei dae maelmaerjia ca leil i lol lalnga, yel yaa Arbosobo ddei ddar mel jilabox ddei lei bei vaer dax gger,^f pia qier ddei leil diux dae mel naexr si dax gger,^g ⁶ yaa ggiessor-ggiene leil ca vaer zzir ddei cux ggie cux meixr; Yoxrtaexl su mel Arbosobo ddei sulzzaggie gga lei ca yarzi zoxlyoxl ddei cux ggie cux meixr. ⁷ Yoxl zzijiul gga ca mel yaa dax zzi a, yaa leil zzasoso dae biex a, ‘Labir’^h ae loxia.

⁸ Nael nia sulmulstu cir ddei lar zza, nia maelmaer lei arzzi-nimar a nga, yel nia ca mel leil nia leil ‘Labir’ ae lol nr ddo. ⁹ Merhhexr Arbbor mel cir ddei a zza, yel nia ca mel leil ‘arbbor’ ae nr ddo. ¹⁰ Nia ddei sulmulstu ddei mel Zidu nga a. Yel ca mel leil nia leil ‘sulmulstu’ ae lol nr ddo. ¹¹ Nia ca mel gga arseir vaer niazzir a mel, arseir dder nia leil visser su bei nia. ¹² Ha armael zzir dae a yarzi vaer ca hal mel, Arbosobo yaa leil yelye loxr lol; armael zzir dae a yarzi ye ca hal mel, Arbosobo yaa leil vaervaer

^e**23:4** Farlixlsaexl su nei Arbosobo ddei sulsaexlsu mel ca mel leil ddoddo-nrddo yarzi miur leiddur mel dax bei mae dae lol, nael yaa ca mel leil cirdoxr lei bei-nr-jjiu.

^f**23:5** *Arbosobo ddei ddar mel jilabox ddei lei bei vaer dax gger* Yaa Arbosobo ddei ddar mel jilabox ddei ardoxr vaer lol, oldde taex leil ddexr gex dae a ca mel leil mia lol. Eine nga a, ca mel leil yaa yarzi seir zzir lol a.

^g**23:5** *pia qier ddei leil diux dae mel naexr si dax gger* Yoxrtaexl su mel Arbosobo ddei ddar noni niazzir a, diux dae eil mel pia xiux leil diux zeil lei dae lol. Mixrsuxljil Sul 15:38 nei Semixljil Sul 22:12 leil biar dae.

^h**23:7** *Labir* “Labir” ddei yilsi mel dder yarzi middux vaervaerpor.

loxr lol.

¹³ Arbosobo ddei sulsaxlsu nei Farlixlsaexl su ca mel, Arbosobo nia leil serpaxl nia! Ca seir bei laexl su eil mel nia! Nia armael Arbosobo ddei ddar no-nr-ni, si noni niazzir, nael nia yaa leil bbiur gex dae. Nia eine bei a mel, ca mel meixsaer qier leil merhhexr alddur peixl ggabil du gger lei a, nia armael lei Merhhexr ddei goxr nr ddir, halae ca mel leil lei nr ddir lol sael a nga. ¹⁴ [Arbosobo ddei sulsaxlsu nei Farlixlsaexl su ca mel, Arbosobo nia leil serpaxl nia! Ca seir bei laexl su eil mel nia! Nia maermocir mel ddei cirza-hanga lei giexl si. Giexl si ho a yoxl Arbosobo dax ddar seirseil a arcixl biar laexl, yel nia leil yarzi larhor faxr nia.]ⁱ

¹⁵ Arbosobo ddei sulsaxlsu nei Farlixlsaexl su ca mel, Arbosobo nia leil serpaxl nia! Ca seir bei laexl su eil mel nia! Nia mer woxrke ssi jiax a nia dax bei mae su ca zo ssi. Yaa nia dax bei mae su loxr ho a, nia dder yaa leil bir nia leil gexrddo loxr lol hherdder neir zzirmar dax bei mae ssi lol.

¹⁶ Meixdae su vaervaerpor mel, Arbosobo nia leil serpaxl nia! Nia bbeix: 'ha Arbosobo leil zi ggie xi giex leil dor dae a bei bel bbeix a mel, azo lei nr suax; nael ha Arbosobo leil zi ggie xi giex sae bei teixl lei mel leil dor dae a bei bel bbeix a mel, yar dder arsaebeilei zabbar seirseir a bei nia.'

¹⁷ Meixdae su ca medeil eil mel nia! Sae bei teixl lei mel zoxlyoxl zzir bbeixsael Arbosobo leil zi ggie xi giex zoxlyoxl zzir neil? Arbosobo leil zi ggie xi giex seirceix-seirmaer a saelnei sae bei teixl lei mel zoxlyoxl arddeir a zzarmar? ¹⁸ Nia yoxl bbeix: 'Ha Arbosobo leil zi ggie ddei leil dor dae a bei bel bbeix a mel azo lei nr suax; nael ha Arbosobo leil zi ggie deix dae zilabox mel leil dor dae a bei bel bbeix a mel, arsaebeilei zabbar seirseir a bei nia.'¹⁹ Meixdae su eil mel nia! Arbosobo leil zilabox mel zoxlyoxl zzir bbeixsael zi ggie ddei zoxlyoxl zzir neil? Arbosobo leil zi ggie ddei seirceix-seirmaer a saelnei zilabox mel zoxlyoxl zzarmar?

ⁱ**23:14** Arbosobo Ddei Sul vaexr beil mel gga ddar eil qier nr zza.

²⁰Yel ca mel Arbosobo leil zi ggie ddei leil dor dae a bei bel bbeix a mel dder zi ggie nei zi ggie dol dae cirza-hanga mel leil dor dae a bei bel bbeix a. ²¹Ca mel Arbosobo leil zi ggie xi giex leil dor dae a bei bel bbeix a mel dder xi giex leil nei xi gga hher dae Arbosobo leil dor dae a bei bel bbeix a. ²²Ca mel merlabbor dor dae a bei bel bbeix a mel dder Arbosobo cux ggie baxrde taex leil nei baxrde taex leil cux dae Arbosobo leil dor dae a bei bel bbeix a.

²³Arbosobo ddei sulsaxlsu nei Farlixlsaexl su ca mel, Arbosobo nia leil serpaxl nia! Ca seir bei laexl su eil mel nia! Nia mel belho, yixsaevar, caxiuvar mel cei fel gga Arbosobo leil ar fel gger, nael nixmox bbaehhex, ca leil zoxlnixr, Arbosobo leil ddarzzi eil mel zzael nia nr bei. Lixlfaxr leil yarzi zoxlyoxl eil mel mel nia bei nia, halae cei fel gga Arbosobo leil ar fel gger hal mel lei bei holcir dae nia. ²⁴Meixdae su vaervaerpor eil mel nia! Nia azo lerler dda a, yasae sael a hal mel zzael pir teixl gger, loxltoxr sael a hal mel zzael ixl ji.^j

²⁵Arbosobo ddei sulsaxlsu nei Farlixlsaexl su ca mel, Arbosobo nia leil serpaxl nia! Ca seir bei laexl su eil mel nia! Nia mel eine i dae a zzae yarzi seir, nixmox zzar zzae yarzi meixneixl, armael leil guaxr ssei nr xie. Hherdder baxlaxr cir a lamaebbaer lar cir, lavulzzar nr cir sael a nga. ²⁶Meixdae su Farlixlsaexl ca eil mel nia, lavulzzar cir xia a mel lamaebbaer lei seibeix a zzarmar?^k

²⁷Arbosobo ddei sulsaxlsu nei Farlixlsaexl su ca mel, Arbosobo nia leil serpaxl nia! Ca seir bei laexl su eil mel nia! Nia mel lamaebbaer zzae

^j**23:24** Arbosobo ddei sulsaxlsu nei Farlixlsaexl su mel zoxl-nr-yoxl hal mel leil zzael yarzi guaxr meixr, nael zoxlyoxlyoxl hal mel zzael nr guaxr.

^k**23:26** Yilsu mel dder nixmox zzar seir xixl lei nia. Eine nga a mel ca seir loxr a; bei dae mel lei seir a.

zaelzae arla bei dae lixrbbaex mel sael a i zae, nalzzar zzae ca sima ddei hherggar nei cirza-hanga yarzi naex hal mel sael a nga. ²⁸ Nia lei ciryoxr a nga, ca mel meixsaer qier leil zzae nixmox seir, nixmox zzar zzae yarjjar nei yarzi gexrddo mel a xiar ji dae.

²⁹ Arbosobo ddei sulsaxlsu nei Farlixlsaexl su ca mel, Arbosobo nia leil serpaxl nia! Ca seir bei laexl su eil mel nia! Nia mel xiezi nei ca seir mel leil lixrbbaex bei box gger a bbeix: ³⁰ ‘Ngua, ngua porpor mel dax ca hal coxr nga arddeirnga a, yaa sael a xiezi mel leil seixl zil gger nr var.’

³¹ Eine bbeix a mel, nia armael lei nia mel dder xiezi mel leil seixl zi gger su ca mel ddei lilbol a cexrssexl a. ³² Nia, nia ddei porpor mel bei nr jjia yarzi sael gexrddo hal mel sael a bei ze si ddo a!

³³ Sae nei saessor yarzi duxr eil mel nia! Arbosobo ca leil serpaxl car, nia arsae pato ddo bbeixleir? Nia dixlyuxl gga ssi nia. ³⁴ Ngo xiezi nei bbesur zzazzamo ca mel leil halae Arbosobo ddei sulsaxlsu mel leil zi a nia dax lei lol. Cirmelmel leil a nael nia bei zil gger, sixrzixljiaxl leil diexr zil gger; cirmelmel leil a nael nia Yoxrtaexl su mel Arbosobo ddei sulzzaggie hher dae a, lorddu sser a deil, halae zzi eil ddei gga a hal ddei gga bixr mal gger. ³⁵ Yalboxr mi ca hal ddei leil seixl zil gger cirdae a, Balajia ddei ssor Sarjialixlyal mi hal ddei leil seixl zil gger zzezze, hherdder mer woxrke ca seir maelmaerjjia leil seixl zil gger zuixl eil mel mel nia oldde leil suax deix dae a.¹ Sarjialixlyal leil mel Arbosobo leil zzeir seixl zi ggie nei Arbosobo ddei xi agala gga nia yar leil seixl zil gger arddeir a. ³⁶ Ngo nia leil yarzi bbeix gger: zuixl eil zzu maelmaerjjia lei eilleix ca coxr oldde leil suax deix dae a.”

¹**23:35** Arbosobo Ddei Sul ber leil Moxrxi nei xiezi vaexr sul mel gga Yalboxr leil mel ca seixl zil gger beil ddei nga a; Sarjialixlyal leil nael seixl zil gger maelele ddei nga a. Cuaxlsixljil Sul 4:8 nei Lixldaexljil Sul Vaexr Maele Ber 24:20-22 leil biar dae.

Yisu Yiluxlsaler Zzi Gga Ca Mel Leil Cix Gger

³⁷ Yisu yoxl bbeix: “Yiluxlsaler zzi gga ca mel a! Yiluxlsaler zzi gga ca mel a! Nia xiezi mel leil seixl zil gger, legelbbe sser a, Arbosobo miardal si lei mel leil zax zil gger. Ngo hormo boxl nei nia ddei aniux mel leil ngo dax pahher lol niazzir, hherdder yixmodo mel yixssor mel leil yar ddoleixr woxrke pahher lol sael a nga, nael nia nr ddo. ³⁸ Nia i dae ddo a; nia ddei Yiluxlsaler zzi ddei ca lei nr zza nia leil dol gger dae du a. ³⁹ Ngo halae nia leil bbeix gger, nia eine cirdae a zeixleixr lei ngo leil mia nr ddo a; hherdder nia bbeix ‘Seirpor Arbosobo miardal si lei hal ddei leil seir lol nia,’ eine bbeix hal cir ni ci a saelnei mia ddo a.”^m

24

Yisu Ca Mel Leil Nixixl Maelele Ci A Arsaenga Var Bbeix Gger

¹ Yisu Arbosobo ddei xi zzaexggu gga ddux lei car, yar dax mae dae su ca mel Arbosobo ddei xi zzir yar leil dor gger a i lol. ² Yisu dder yaa leil bbeix: “Nia doxl nr nga Arbosobo ddei xi zzir leil mia a zzarmar? Nael ngo nia leil yarzi bbeix gger, arddolcar a, maelmaerjjia lei caexr pixl jjia nia; legelbbe cirtaex-hanga lei caexr zeil lei nia.”ⁿ

³ Giedae Yisu Saercor worga ga leil cux dae a, kebal ca nr zza car, yar dax mae dae su ca mel yar leil biex lei a bbeix: “Arddolcar eine nga var? Ni zeixleixr jjixr lei nei nixixl maelele ci a, ngua arsae saexl. Ngua leil bbeix gger la!”

⁴⁻⁵ Yisu yaa leil ddarkoxl a bbeix: “Hane ci a mel, ca cirke a ngo ddei mi ddei sser dae a lei a bbeix: ‘Ngo mel Zidu ddei nga a.’ Eine bbeix a ca

^m23:39 Sipi Sul 118:26 leil vaexr dae.

ⁿ24:2 Yisu si ho a, Loxrmar su ca mel Yiluxlsaler zzi ddei caexr pixl gger a; halae Arbosobo leil zi ggie xi ddei jiujiu caexr pixl gger a.

cirke leil fur. Yel nia fadae nia, nr nga a ca mel nia leil fur leilei. ⁶ Nia cirmaexmaex a nael zaxlddaexr dae, cirmaexmaex a nael zaxlddaexr du a eine bbejjiur a lei gexr nr ssa. Eil zzu mel ngo lei du xilmeir leil nga nia, nael eine nga ho a lei nixixl maelele ddei halae nr ci seir. ⁷ Ca mel eil cuxr lei hal cuxr dax zaxlddaexr nia, goxrjia eil goxr lei hal goxr dax zaxlddaexr nia, middurbbor zzarvul-zzarmae lei zzor du nr zza, mi lei nia. ⁸ Eil mel mel halae goxrsol-goxrnaxr du lei a nga seir; hherdder ssormaer aniu xiu a, no beil halcar sael a nga seir.

⁹ Hane ci a mel, nia ngo leil ddarzzi a, ca mel nia leil ke, nia leil seixl zil gger, halae Yoxrtaexl su nr nga ca mel lei nia leil vuxryixr. ¹⁰ Ca cirke a zeixleixr Arbosobo leil ddarzzi nr yuex; yaa zzicarzzi leil ke, zzicarzzi leil vuxryixr. ¹¹ Halae xiezi yarjia cirke ddux lei a, ca cirke leil fur. ¹² Ca cirke a mel ho bei ho Arbosobo ddei Lixlfaxr no-nr-ni a, yaa ca leil per-nr-niar a. ¹³ Nael sser gex doxr dae a Arbosobo leil ddarzzi ca hal mel leil mel jiuxl wo a. ¹⁴ Merhhexr ddei goxr leil biar dae ddar seirseir mel mer woxrke cirmaex-hanga lei biar jiax jjia a, mer woxrke ca circuxr-hanga leil bbejjiur lol. Eine nga ho a saelnei nixixl ddei maelele ci.”

¹⁵ “Xiezi Daxlyirlir bbeix goxr hal mel sael a nia cirza-hanga bei xi axr gger su yarzi vuxlsuxrddo hal te Arbosobo ddei xi seirceix-seirmaer hal giex gga ngier dae ggie mia car,^{o p} ¹⁶ Yoxrtaexl mermi hher dae ca mel

^o**24:15** *cirza-hanga bei xi axr gger su yarzi vuxlsuxrddo hal te Arbosobo ddei xi seirceix-seirmaer hal giex gga ngier dae ggie mia car* Ca eil te mel Arbosobo ddei xi seirceix-seirmaer hal giex gga ngier dae a yar mel Arbosobo nga a eine bbeix.

^p**24:15** Daxlyirlir Sul 9:27; 11:31; 12:11 leil biar dae. Arbosobo ddei xi seirceix-seirmaer hal giex mel Arbosobo leil zi ggie xi gga lavulzzar giex nga a.

mel worga leil pa deix nia; ¹⁷ xipaebbor^q hher dae ca mel lei ake ddir jjixr a zzaegu vei jjixr nr ddo; ¹⁸ mi gga hher dae ca mel lei ake pia vei jjixr nr ddo, eil mel mel nia saexl nia. ¹⁹ Nixixl hal cir ni ci a mel, aniuxniar su nei aniux baxrda su hal mel dder yarzi goxr sol! ²⁰ Nia Arbosobo leil qiuxr nia, yel nia pa car, zzixzi bbeixsael wornol nixixl ggur lol nr ddo.

²¹ Halcar ci a mel, cirza-hanga yarzi sael gexrddo zza var, mercoxl-micoxl beil halleix cirdae a eilleix zzezze lei hal mel sael a gexrddo zza nr seix; eine goxr ho a zeixleixr lei eil mel sael a zza nr var a. ^s ²² Yel nixixl hal mel nga-nr-niul arddeirnga a mel, ca hazza mel dder si lalnga. Nael Arbosobo mel yar tiur har dae ca mel leil weix a, nixixl hal mel nganiul lol var. ²³⁻²⁴ Hane ci a mel, Zidu yarjiar nei xiezi yarjiar mel lei ddux lei a, murgurgurmo nei ddoddomo bei a, ca mel leil fur. Yaa mel halae Arbosobo leil ddarzzi su ca mel leil jiujiu fur niazzir. Yel si nia leil bbeix: ‘Zidu ddei eilmaex hher dae’ bbeixsael ‘halmaex hher dae’, bbeix arddeirnga a lei, nia yaa leil ddarzzi nr ddo. Eine nga a mel yaa dder nia leil fur wo nr xie a. ²⁵ Ngo nia leil hoba bbeix gger zaxr ho a lo ngo! Yel nia fadae nia!

²⁶ Nael si nia leil bbeix: ‘Nia arleixr i lei, Zidu ddei mipaerbbae gga hher dae a’, bbaexl eine bbeix a lei, nia ddux nr ddo. Bbeixsael bbeix: ‘Nia arleixr i lei, Zidu ddei ake hher dae a’, bbaexl eine bbeix a lei nia ddarzzi nr ddo. ²⁷ Ca Ddei Ssor jjixr lei car a mel almer bbiexr a dofa piar a gga cirdae a xifa piar a gga bbo ci hal mel sael a nga. ²⁸ Yarsima arddolmaex zza dae mel, axneix mel lei dder arddolmaex hher dae a.”

²⁹ “Cirza-hanga lei yarzisael gexrddo nixixl hal mel goxr jixr ho a mel,

^q**24:17** *xipaebbor* Yoxrtaexl su ca mel ddei xipaebbor mel bbaelerler arddeir a. Yaa zoxlzoxl a lei nalbbor miar bei.

^s**24:21** Daxlyirlir Sul 12:1 leil lei biar dae.

merni taex dder neixmar a;
xiubbo taex lei nr bbo a;
gie mel lei de zeï lei a;
merlabbor hher dae mel lei le du lei nia.^t

³⁰ Yel dder merlabbor Ca Ddei Ssor jixr lei hoxltexr ddei leil mia ddo a; yel middurbbor hher dae ca circuxr-hanga lei cix a aenge nia. Yaa Ca Ddei Ssor ddei bbobbolbbo zico ddei leil zzi dae a, yarzi ddo lei ggie mia nia.^u ³¹ Yar tisir mel leil zi a, baerlae worcixl-worni mex du lei lol a, middurbbor cirmaex-hanga halae merlabbor eil piar a cirdae a, hal piar a zzeze yar tiur har dae ca mel leil ae pex du lei lol.”

³² “Nia vuxrhuagol zzei zzei leil bir dae a bbeix dae ar ddei zza wo ddo. Vuxrhuagol zzei yarniux niux teixl lei ggie mia a, nia dder gielcozi ci jiur a saexl. ³³ Eine nga a, nia ngo nia leil biar gger dae eil mel leil mia a dder Ca Ddei Ssor jixr lei zi ci jiur a saexl, hherdder alddur ggucirmi jixr ci dae sael a nga ho a. ³⁴ Ngo nia leil yarzi bbeix gger, ca eil coxr halae nr si seir cirza-hanga eil mel dder nga var a. ³⁵ Mer lei mier var, mi lei mier var, nael ngo ddei ddar mel mier nr var.”

³⁶ “Nixixl hal cir ni arddolcar a mel, arseir lei nr saexl, merlabbor hher dae tisir mel lei nr saexl, Arbosobo ddei Ssor ddei lei nr saexl, Arbor Arbosobo lar saexl. ³⁷ Ca Ddei Ssor lei car a mel, hherdder Noxryal mi ca hal ddei^v dax hal coxr sael a nga. ³⁸ Worpe-vilax xilmeir leil mel ca mel zzor lei zzor dae, dda lei dda dae, capor mel zzae bbeix dae, ssormaer mel leil zzae fu dae, hherdder Noxryal cuaxr gga ddir hal cir ni zzeze

^t**24:29** Yirsaexlyal Sul 13:10; 34:4 leil vaexr dae.

^u**24:30** Daxlyirlir Sul 7:13-14 leil lei biar dae.

^v**24:37** *Noxryal mi ca hal ddei* Cuaxlsixljil Sul 6:5-8:22 Noxryal leil biar dae.

lei eine. ³⁹ Nael momil-momaexrmo dder worpe-vilax a, ca maelmaerjjia leil lei pe teixl si a. Ca Ddei Ssor ddei jjixr lei car a lei eil mel sael a nga var. ⁴⁰ Halcar ci a mel, capor nnel a cirgo a mi gga hher dae, cir ddei leil a nael Arbosobo yar leil hier si a; cir ddei a nael halae hher dae seir.

⁴¹ Ssormaer nnel a cirgo a nger gga dae, cir ddei leil a nael dder Arbosobo yar leil hier si a; cir ddei a nael halae hher dae seir.

⁴² Nia mel nia Seirpor ddei arddol cir ni jjixr lei nr saexl, yel nia cirleixr nr nor yar leil xia dae nia. ⁴³ Nia holcir dae nia! Zzaexpor arddolcar zzaegu ker lei ca seirpor ddei saexl a mel, yar zucur dae var, zzaexpor leil ker lei lol nr var. ⁴⁴ Ca Ddei Ssor ddei mel nia xiar lei xiar nr ci halcar malmal jjixr lei, yel nia bei har zaxr dae nia.”

⁴⁵ “Seirpor leil visser su arddol ddei ddarzziddo, jilixr neil? Seirpor ca eil ddei leil yar ddei wormusu mel leil guaxr lol halae yaa leil zzorddu bbe gger lol. ⁴⁶ Seirpor ddei jjixr lei a, yar leil visser su ddei zabbar seilseir a miar bei dae ggje mia a, yar leil seir lol. ⁴⁷ Ngo nia leil yarzi bbeix gger, seirpor ddei yar leil yar ddei cirza-hanga guaxr dae lol nia. ⁴⁸ Nael nr seir wormusu hal ddei nixmox zzar, ‘Ngo seirpor ddei laelae sael jjixr lei’, eine xiar dae a, ⁴⁹ yel dder yar carbeix wormusu hal mel leil deil; halae zzipbaer ddayixrboxr mel dax cirgo a zzorzzor-ddadda eine bei. ⁵⁰ Seirpor ddei mel neixleixrsael yar xiar lei xiar nr ci hal cir ni malmal jjixr lei a ⁵¹ dder, yar leil yarzisael larhor faxr, yar leil ca seir bei laexl su hal mel dax ciryoxr a faxr. Yar dder ser ddei giexrgiexlgiexr kexl gex dae a, aenge nia.”

25

Bir Dae A Cirmusixl Carbeix Mel Leil Biar

¹ “Halcar ci a mel, Merhhexr ddei goxr ddei mel ssormaerleixlssor

ceimo a de ddei vei dae a, ddux a mixlyixrsixl^w ddei leil zi ssi sael a nga.

² Eil ceimo gga mel, ngorler a nael medeil, ngorler a nael jilixr.

³ Medeildeil hal mel mel de ddei vei dae arnar, ssuvi vei dax nr zaxr dae;

⁴ jilixrlixr mel nael de ddei vei dae, halae bbie gga ssuvi lei vei dax zaxr

dae. ⁵ Mixlyixrsixl ddei mel lae zildu a lei nr lei a, yel yaa yixrmeixldox dae a.

⁶ Giedae merxixl-soxiu sael ci a, ca mel ae dae a bbeix: ‘Mixlyixrsixl ddei lei a; nia ddux lei a, yar leil zi lei.’

⁷ Ssormaerleixlssor maelmaerjjia lei ha du lei a, yaa ddei de ddei arleixr

geso a, doxl du lei a. ⁸ Yel medeildeil mel jilixrlixr mel leil bbeix: ‘Ngua ddei de ddei bbiu gge niazzir dae a; ngua leil ssuvi ardoxr bbe gger la!’

⁹ Jilixrlixr mel ddarkoxl a bbeix: ‘Niul cirgo a sser a, nrba sser loxr nr ddo a. Bbeixsael nia ddei nia ssuvi vur ggie vae ssi lalssa a!’

¹⁰ Yel yaa vae ssi car, mixlyixrsixl ddei lei ci a. Bei har zaxr dae ssormaerleixlssor mel dder yar dax cirgo a xi gga ddir a, zzorci-ddami zzor ssi a. Alddur ddei dder ggabil du lei a.

¹¹ Giedae kebal ssormaerleixlssor mel lei arleixr loxr a dder jjixr lei a, bbeix: ‘Seirpor, seirpor, ngua leil alddur arleixr ggapu gger la seir!’

¹² Mixlyixrsixl ddei zzael yaa leil ddarkoxl a bbeix: ‘Ngo nia leil yarzi bbeix gger, nia arseir a ngo nr saexl.’ ”

¹³ Yisu bbeix jjia ho a, yaa leil bbeix: “Ca Ddei Ssor ddei jjixr lei nixixl hal cir ni arddolcar a mel nia nr saexl, yel nia ngo leil xia dae nia.”

Bir Dae A Wormusu Soler Leil Biar

¹⁴ “Merhhexr ddei goxr ddei mel yoxl ca ar ddei a kebal mermi ssi a, yar, yar ddei wormusu mel leil ae si lei a, yar ddei cirza-hanga lei yaa leil

^w**25:1** *mixlyixrsixl*/Mixlyixrsixl ddei mel dder Yisu nga a. Mixlyixrsixl ddei lei halcar a mel dder Yisu jjixr lei halcar a nga a.

guaxr dae lol sael a nga. ¹⁵ Yar, yaa armael bbesur ddei dax zox dae a yaa leil piu gger. Cir ddei leil a nael ngordu gger, cir ddei leil a nael nrdu gger, cir ddei leil a nael cirdu a gger, yel yar dder kebal mermi ssi a.^x

¹⁶ Ngordu vei wo wormusu ddei mel, vaexleixr bei ssi a; yel ngordu zo dax wo a. ¹⁷ Nrdu vei wo ddei lei nrdu zo dax wo a. ¹⁸ Nael cirdu vei wo ddei mel middur leil suddu ar su giexl a, seirpor ddei piu mel giexl kerzi gger a.

¹⁹ Giedae seirseil a argielggur goxr a, wormusu mel ddei seirpor ddei yaa dax piu suax jjixr lei a. ²⁰ Yel piu ngordu vei wo ddei yar zo dax wo ngordu ddei vei dae a, lei a bbeix: ‘Seirpor, ni arleixr i, ni ngo leil piu ngordu gger a, ngo yoxl ngordu zo dax wo a.’

²¹ Seirpor ddei bbeix: ‘Ni yarzi bei seir, ni mel nixmox seir, yoxl barver wormusu ar ddei a! Ni miar yelye mel leil lei barver a mel, ngo ni leil miar vaervaer cirke guaxr lol nia, ddir lei a, ni seirpor dax cirgo a ggese lei ddo a.’

²² Nrdu vei wo ddei lei lei a bbeix: ‘Seirpor, ni arleixr i, ni ngo leil piu nrdu gger a, ngo yoxl nrdu zo dax wo a.’

²³ Seirpor ddei bbeix: ‘Ni yarzi bei seir, ni lei nixmox seir, yoxl barver wormusu ar ddei a! Ni miar yelye mel leil lei barver a mel, ngo ni leil miar vaervaer cirke guaxr lol nia, ddir lei a, ni seirpor dax cirgo a ggese lei ddo a.’

²⁴ Cirdu vei wo ddei lei lei a bbeix: ‘Seirpor, ngo saexl, ni mel guaxr larhor ca ar ddei a. Ni dae nr ji ggie lei caer nia, xiu nr ji ggie lei se nia.

²⁵ Yel ngo gexr a, ni ddei piu mel middur gga kerzi gger a. Ni arleixr i, ni ddei piu mel eilmaex zza dae seir.’

^x**25:15** Ca eil ddei wormusu mel leil zzirbae yarzi miur gger. Yar cir ddei leil a nael 30,000 ni ddei worper gger; cir ddei leil a nael 12,000 ni ddei worper gger; cir ddei leil a nael 6000 ni ddei worper gger.

²⁶ Seirpor ddei ddarkoxl a bbeix: ‘Bbae zzae bbaeyo, yarzi cexr-nr-ddo wormusu eil te ni! Ni ngo dae nr ji ggie lei caer nia, xiu nr ji ggie lei se nia saexl a mel, ²⁷ ngo ddei piu mel zzirbae cuixr ggie cuixr ji gger nia a meir. Eine nga a mel, ngo jjixr lei a mel, lixlsixr jiujiu se cexr a.

²⁸⁻²⁹ Zza ho mel leil mel zeixleixr gger dax nia, yel yar leil zzeilixl-zzeilor zza lol; nr zza mel leil mel yar zza dae ddei jiujiu lei su si lei nia.^y Yel nia yar ddei cirdu ddei su si lei a, cirmeixr zza su ddei leil gger dax. ³⁰ Cexr-nr-ddo wormusu eil te leil nael zalbbaer neixmar ggiez^z piar teixl gger; yar zalbbaer hher dae a, ser ddei giexrgiexlgiexr kexl gex dae a aenge nia.’ ”

Cassor-worssor Mel Leil Faxr

³¹ “Ca Ddei Ssor ddei yarzi ddo yarzi quexrlixl zza zzirmar bei jjixr lei a yar ddei tisir maelmaerjjia yar dax cirgo a jjixr lei car, yar, yar cux ggie zzirmar baxrde hal taex leil cux dae nia. ³² Mer woxrke ca circuxr-hanga lei yar meixsaer qier leil hher dae a, yar yaa leil bbe kae gger nia, hherdder yaloxlmo mel acixl nei ya mel leil bbe kae gger sael a nga. ³³ Ya mel leil nael yo piar a gga hher dae lol, acixl mel leil nael vael piar a gga hher dae lol.^a

³⁴ Yel zzirmar ddei dder yo piar a gga hher dae mel leil bbeix: ‘Ngabbor

^y**25:28-29** Ddar eil qier ddei yilsi mel dder arseir Yisu leil zabbar seilseir a visser a mel yaa leil dder hanol gger, ho bei ho miur. Arseir Yisu leil visser nr yuex a mel yaa leil dder nr gger, yaa zza mel leil su xixl lei.

^z**25:30** *neixmar ggie* Yoxrtaexl su mel zoxlzoxl a neixmar ggie bbeix a mel, dixlyuxl ddei leil bbeix arddeir a.

^a**25:33** Eilmaex gga ya bbeix a mel Yisu leil ddarzzi su mel leil bbeix; acixl bbeix a mel Yisu leil ddar-nr-zzi su mel leil bbeix.

seir lol dae ca mel, nia Merhhexr ddei goxr ddei gga ddir lei ddo a. Merhhexr ddei goxr mel mer lei nr coxl seir, mi lei nr coxl seir dder nia leil bei har zaxr gger dae a. ³⁵ Nia mel ngo meixr car a, ngo leil zol; ngo sixl car a, ngo leil da; ngo simer-yarddei leil ssi za dae a, ngo leil nia dax hher lol; ³⁶ ngo veixrddu nr zza a, ngo leil veixrddu gger; ngo no a, ngo leil guaxr; ngo leil ge ji dae a, nia ngo leil i lei.'

³⁷ Nixmox seir su ca mel ddarkoxl a bbeix: 'Seirpor, ngua arddolcar ni meixr ggie mia a, ni leil zol; ni sixl ggie mia a, ni leil da a leir?' ³⁸ Ngua arddolcar a, ni simer-yarddei leil ssi za ggie mia a, ni leil ngua dax hher lol, bbeixsael ni veixrddu nr zza a, ni leil veixrddu gger a leir?' ³⁹ Yoxl arddolcar a, ni no ggie mia bbeixsael ni leil ge ji dae ggie mia a, ni leil i lei a leir?'

⁴⁰ Zzirmar ddei yaa leil ddarkoxl a bbeix: 'Ngo nia leil yarzi bbeix gger, nia ngo ddei arzzi-nimar^b ye zzir ar ddei leil eil mel bei gger a mel, hherdder ngo leil bei gger dae a.'

⁴¹ Zzirmar ddei yoxl vael piar a gga hher dae mel leil bbeix: 'Arbosobo nia leil faxr dae ca mel, ngo dax tor nr hher. Nia neir zzirmar nei neir mel leil bei har zaxr gger dae, cirse-cirsil lei adoxl bbiu zil nixixl nr zza, dixlyuxl ddei gga ddir ddo a!' ⁴² Nia mel ngo meixr car, ngo leil nr zol; ngo sixl car, ngo leil nr da; ⁴³ ngo simer-yarddei leil ssi za dae a, ngo leil nia dax nr hher lol; ngo veixrddu nr zza a, ngo leil veixrddu nr gger; ngo no bbeixsael ngo leil ge ji dae a lei, nia ngo leil nr guaxr.'

⁴⁴ Yaa dder ddarkoxl a bbeix: 'Seirpor, ngua arddolcar ni meixr, bbeixsael sixl, bbeixsael simer-yarddei leil ssi za dae, bbeixsael veixrddu nr zza, bbeixsael no, bbeixsael ge ji dae ggie mia a, ni leil bei-nr-jjiu a leir?'

^b**25:40** *ngo ddei arzzi-nimar* Yisu ddei arzzi-nimar mel hherdder yar leil ddarzzi su mel nga a.

⁴⁵ Zzirmar ddei yaa leil ddarkoxl a bbeix: ‘Ngo nia leil yarzi bbeix gger, nia ngo ddei arzzi-nimar ye zzir ar ddei leil eil mel bei nr gger a mel, hherdder ngo leil bei nr gger a.’

⁴⁶ Yel ca eil mel mel cirse-cirsil lei ca leil faxr ggje ssi nia, nixmox seir su ca mel nael cirse-cirsil gol dae nia.”

26

Yisu Leil Bei Zil Gger Nia Zzibbe

¹ Yisu ddar eil mel bbeix jjia ho a dder yar dax mae dae ca mel leil bbeix:
² “Nia lei saexl, zeixleixr nr ni goxr a dder Yuelyuel jiax nga a. Hane ci a, Ca Ddei Ssor ddei leil mel ca mel leil jia gger a, sixrzixljiaxl ddei leil diexr ngexl gger nia.”

³ Halcar, Arbosobo leil zi su vaervaerpor mel nei ca leil guaxr su camar mel dder Arbosobo leil zi su vaer zzir Gieyalfar mi hal ddei ake gga cirgo a hher dae a, ⁴ arsaе Yisu leil arjjiuljjiu arla ssu du lei a, bei zil gger nia zzibbe. ⁵ Nael bbeix: “Jiax ddei gga mel yar leil arsaе lei bei nr ddo, nr nga a, ca mel luaxl du lei lei,” eine bbeix a.

Nerxiuxiu Mel Yisu Leil Dox Deix Gger

⁶ Giedae Yisu Boxrdaxlnixr kax gga nopae goxr Ximexr mi ca hal ddei ake hher dae a, ⁷ ssormaer ar ddei a yol bbie ar taex gga naxrcixlcixlmo ssuvi nerxiuxiu ar bbie vei dae a, lei a. Yel Yisu zzo zzor dae car a leil jiux dae a, yar oldde ddei leil dox deix gger a.

⁸ Yisu dax mae dae su ca mel mia a dder sirzzi a bbeix: “Arsaenga a eine holpixl leir? ⁹ Nerxiuxiu eil bbie mel zzirbae seirseil a ar ke bo a, casolssor mel leil beijjiu cexr.”

¹⁰ Yisu yaa arsaе xiar dae i teixl lei a dder bbeix: “Nia arsaenga a ssormaer eil ddei leil bei sol lol? Yar ngo leil miar yarzi seir ar jji bei gger

a. ¹¹ Casolssor mel mel zoxlzoxl a nia dax hher dax dae, nael ngo mel nia dax hher nr doxr dae. ¹² Yar nerxiuxiu eil mel ngo leil dox deil gger a mel, ngo leil giexlhex du a bei har zaxr arddeir a. ^c ¹³ Ngo nia leil yarzi bbeix gger, ngo ddei ddar seirseir mel mer woxrke arddolmaex biar ci zzorbbexlei, ca mel mel ssormaer eil ddei bei dae eil mel biar nia, yel ca mel leil yar leil holcir dae lol.”

¹⁴ Halcar, Yisu miardal dae ca ceinirmo gga Jialuxl mermi su Yoxrdaxl mi hal ddei mel Arbosobo leil zi su vaervaerpor mel dax ssi a bbeix:

¹⁵ “Ngo Yisu leil nia leil jia gger a, nia ngo leil azo gger?” bbaexl eine bbeix. Yel yaa dder yar leil piu socei taex gger a. ^d ¹⁶ Hane cirdae a mel, yar mel dder Yisu leil yaa leil arsae jia gger nia xiar dae a.

Yuelyuel Jiax Goxr

¹⁷ Miljiazi ji nr goxr aba zzor jiax goxr beil cir ni, Yisu dax mae dae su ca mel yar leil biex lei a bbeix: “Ni ngua leil, ni leil arddolmaex Yuelyuel jiax goxr a zzorlabox bei har zaxr gger lol?”^e

¹⁸ Yisu ddarkoxl a bbeix: “Nia zzi gga ddir a, ca ar ddei dax ssi a, yar leil bbeix: ‘Sulmulsu bbeix: ngo ddei nixixl ddei ci jiur a. Ngo, ngo dax mae dae su ca mel dax cirgo a ni ake Yuelyuel jiax goxr nia,’ ” eine bbeix

^c**26:12** Yoxrtaexl su ca mel ca sima mel leil giexlhex a mel ggecir ddei leil nerxiuxiu mel mei deix gger eine bei zzawo.

^d**26:15** Piu socei taex ddei mel li xiubbo ddei worper nga a. Eil ddei mel zebol ar ddei vae wo ddo a.

^e**26:17** Cu'aezixr Sul 12:1-20 halae Lixlweixljil Sul 23:5-8 leil mel Cuxrjiaxl jiax nei Yuelyuel jiax goxr a arsae lerler nga biar dae. Cuxrjiaxl jiax goxr a mel heixl ni goxr. Hal heixl ni gga mel, Yoxrtaexl su mel miljiazi ji nr goxr aba zzor. Goxr beil hal cir ni mel, yaa Yuelyuel jiax lei goxr.

nia. ¹⁹ Yel yar dax mae dae su ca mel dder yar miardal dae mel sael a bei a, Yuelyuel jiax goxr a zzorlabox bei har zaxr ssi a.

²⁰ Eilmerxixl ci a, Yisu mel yar miardal dae ca ceinirmo dax cirgo a zzo zzor. ²¹ Yaa zzor dae car, Yisu bbeix: “Ngo nia leil yarzi bbeix gger, nia ca mel gga ngo leil vurllel su ar ddei zza.”

²² Yar dax mae dae su ca mel dder yarzi sael zzasol a, cirddeir-cirddeir yar leil biex a bbeix: “Seirpor, ngo nr nga piar a mar.”

²³ Yisu ddarkoxl a bbeix: “Ngo dax cirgo a ddorbax gga aba xiel lel su ddei ngo leil vurllel var. ²⁴ Ca Ddei Ssor mel arsaebeilei Arbosobo Ddei Sul ber leil vaexr dae mel sael a si nia,^f nael yar leil vurllel su ca ddei dder zoxr a! Ca eil ddei leil xiu nr teixl lei arddeirnga a, halae seir.”

²⁵ Giedae Yisu leil vurllel su Yoxrdaxl ddei biex a bbeix: “Labir,^g ngo nr nga piar a mar?” Yisu bbeix: “Hherdder ni nga a.”

²⁶ Yaa zzo zzor dae car a, Yisu aba ar pir vei du lei a, Arbosobo leil nawo ho a, ngaxl kae a yar dax mae dae ca mel leil zzi gger a bbeix: “Eil ddei mel ngo ddei ggecir ddei nga a. Nia vei dae a zzor.”

²⁷ Yoxl beizi ddei vei du lei a, Arbosobo leil nawo ho a, yaa leil zzi gger a bbeix: “Nia dda ddo a. ²⁸ Puxrto zzi bbaer eil ddei mel ngo ddei sirnilni ddei nga a. Sirnilni eil ddei mel ca cirke leil weix a ddux nia, yel yaa ddei zuixl mel leil ssoxrsuxl lol. Eil ddei mel dder Arbosobo bbeix har zaxr dae ddei nga a.^h ²⁹ Nael ngo nia leil bbeix gger eilni cirdae a, ngo zeixleixr lei nia dax cirgo a puxrto zzi bbaer nr dda a. Hherdder ngo nia dax cirgo a Ngabbor ddei goxr ddei gga puxrto zzi bbaer yarsixl ddei dda, hal cir ni ci a sael dda.”

^f**26:24** Sipi Sul 22 nei 118 halae Yirsaexlyal Sul 53 leil Yisu arsaе si mel leil biar dae.

^g**26:25** *Labir* Labir ddei yilsi mel dder sulmulu.

^h**26:28** Xiboxrlaexr Sul 9:11-28; 10:10 leil biar dae.

³⁰ Yaa caxlgo caxl ho a dder, ddux a, Saercor worga leil ssi a.

Yisu Birdaexr Yar Leil Nr Ssexl Bbeix Zaxr

³¹ Giedae Yisu yaa dax bbeix: “Eilmei nia maelmaerjjia ngo leil pa du si var. Arbosobo Ddei Sul ber leil vaexr dae a Arbosobo bbeix:

‘Ngo yaloxlmo ddei leil deil a,
ya mel dder ssi bbeir jjia a,ⁱ

eine bbeix a.

³² Nael ngo gol du xixl lei ho a, ngo nia xilmeir leil Jialixllixl mermi ssi nia.”

³³ Birdaexr bbeix: “Arseir lei ni leil pa du si zzorbbeixlei, ngo cirse-cirsil lei ni leil pa nr var.”

³⁴ Yel Yisu yar leil bbeix: “Ngo ni leil yarzi bbeix gger, eilmei yixpe bbe xilmeir leil, ni ngo leil nr ssexl so boxl bei var.”

³⁵ Birdaexr ddarkoxl a bbeix: “Ngo ni dax cirgo a si nia zzorbbeixlei, ni leil nr ssexl bei nr var.” Kibal Yisu dax mae dae su ca hal mel lei eine bbeix a.

Kelsimarnixr Halmaex Hher Dae A Arbosobo Dax Ddar Biar

³⁶ Giedae Yisu nei yar dax mae dae su ca mel Kelsimarnixr mi halmaex ssi a, yar yaa leil bbeix: “Nia eilmaex cux dae a ngo leil xia dae, ngo halbbaer Arbosobo dax ddar biar ssi,” bbaexl eine bbeix a. ³⁷ Yel dder Birdaexr nei Xibirtaexl ddei ssor nnel leil hier dax si a. Yar nixmox zzar yarzi zzasol, cix zildu a ³⁸ dder yaa dax bbeix: “Ngo nixmox zzar zzasol zildu a, si niazzir dae a. Nia eilmaex hher dae a, ngo dax cirgo zucur dae nia.”

ⁱ26:31 Sarjialixlyal Sul 13:7 leil vaexr dae.

³⁹ Yar dder yaa xilmeir lalal sael ardoxr ssi teixl a, middur ddei leil puxr gex dae a, Arbosobo dax ddar biar a bbeix: “Arbbor, ni bei cexr arddeirnga a, ngo leil yarzisael goxr sol eil mel tor nr goxr lol, nael ni dax zox lalssa, ngo dax zox nr ssa.”

⁴⁰ Yar biar teixl a, yar dax mae dae su ca hal soler dax jjixr ci a, yaa yixrmeixljjiu dae mia a. Yel yar dder Birdaexr leil bbeix: “Nia ngo dax cirgo a zucur dae a Arbosobo dax ddar arleixr biar lei nr ddo a ngo?”

⁴¹ Nia zucur dae a, Arbosobo dax ddar biar nia, yel nia leil sixr i var mel pex dae car a, zuixl nr bei ssi lol. Nr nga a, nia ddei xiu ddei Arbosobo dax ddar biar niazzir dae lei, nael nia ggecir ddei bei wor-nr-ni a.”

⁴² Yisu yoxl nr boxl ddei Arbosobo dax ddar biar ssi a bbeix: “Arbbor, yarzi goxr sol eil mel ngo arsaebeilei goxr nia arddeirnga a, ni xiar dae mel sael a nga lol ddo a.”

⁴³ Biar teixl ho a, yar yoxl yar dax mae dae ca mel dax jjixr ci a. Nael yaa mel yixrmeixlzzir zildu a meixddur ddei lei pu du lei nr xie a. ⁴⁴ Yisu yoxl yaa dax nr hher ssi a. Yar so boxl ddei Arbosobo dax ddar biar ssi, ddar biar dae mel mel xilmeir dax ciryoxr a nga.

⁴⁵ Biar teixl a, yel yar yoxl yaa dax jjixr ci a, yaa leil bbeix: “Eilcar a, nia halae yixrmeixljjiu dae a, wornol doxr dae a ngo? Nixixl ddei ci a. Nia i dae la ddo a. Ca Ddei Ssor leil mel zuixl zza ca mel leixrga gga vur ji gger du a. ⁴⁶ Ha du la, niul ssi du a! Nia i ddo a; ngo leil vurler su ddei lei a.”

Yisu Leil Ssu Gex Du Lei

⁴⁷ Yisu ddar biar dae car a malmal, yar miardal dae ca ceinirmo gga Yoxrdaxl te lei a; halae altor nei zzargger vei dae ca seirseil a ar ke ca dae. Ca eil mel mel Arbosobo leil zi su vaervaerpor mel nei ca leil guaxr su camar mel miardal si lei arddeir a. ⁴⁸ Yisu leil vurler su Yoxrdaxl te yaa leil saexl lol a bbeix: “Ngo arseir leil jiuxl ssi mel, arseir dder Yisu

nga a; nia yar leil ssu du lei ddo.”⁴⁹ Yel Yoxrdaxl te dder Yisu dax ssi naer a bbeix: “Labir, ni zzasoso dae?” bbaexl biex a, yar leil jiuxl ssi.

⁵⁰ Yisu yar leil bbeix: “Ggocar, ni bei lei miar mel bei ddo a.” Eine bbeix a, yel ca hal zzu dder gger lei a, Yisu leil ssu gex du lei a.⁵¹ Halcar, Yisu dax mae dae ca ar ddei a mel altor baxr vei teixl lei a, Arbosobo leil zi su vaer zzir ddei leil visser su ar ddei leil ar pi taexl gger a, yel yar ddei nolba ar bbor taexl teixl gger a.

⁵² Yisu dder bbeix: “Altor baxr a altor xie gga vei ji xixl dae; ha altor sser su mel dder altor giedae si nia.⁵³ Ni zzir dae a ngo Ngabbor leil qiuxr a, eilcar a ngo leil tisir ceinir cir^j miardal zei gger lei lol nr cexr a ngo?”⁵⁴ Nael ngo Ngabbor leil qiuxr a tisir miardal zei gger lei lol arddeirnga a mel, Arbosobo Ddei Sul ber leil bbeix arsaebeilei hal mel sael a nga nia, bbeix dae mel yarzi loxr nr var.”

⁵⁵ Halcar, Yisu yoxl ca mel leil bbeix: “Nia altor nei zzargger vei dae a, ngo leil ssu lei a, nia ngo leil vaervaerpor leil dir su ar ddei i mal gger a ngo? Ngo cirni-cirni Arbosobo leil zi ggie xi zzaexggu gga hher dae a, ca leil mul gger dae a zzael nia ngo leil nr ssu.⁵⁶ Nael eil mel eine nga a mel, hherdder xiezi vaexr dae sul mel yarzi loxr a.” Halcar, yar dax mae dae ca maelmaerjia yar dax nr hher, pa du si a.

⁵⁷ Giedae Yisu leil ssu su mel yar leil Arbosobo leil zi su vaer zzir Gieyalfar mi ca hal ddei ake gga hier mal. Halcar a Arbosobo ddei sulsaxl su nei ca leil guaxr su camar mel lei cirgo a halmaex hher dae ho a.⁵⁸ Birdaexr nael vimirmir sael mae dae a, Arbosobo leil zi su vaer zzir ddei zzaexggu ddei gga mae ci a. Yel dder ddir a, meixr mel dax cirgo a cux a, arsaesael nga bbe i.

⁵⁹ Nael Arbosobo leil zi su vaervaerpor mel nei kebal Yoxrtaexl su ddei vaervaerpor maelmaerjia lei nga-nr-zi mel zo a, Yisu leil goxl, yel yar

^j**26:53** *ceinir cir* Ceinir cir mel dder tisir 36,000 cirdae a 72,000.

leil bei zil gger niazzir. ⁶⁰ Ca seirseil ar ke a nga-nr-zi mel bbeix a lei, Yisu arddolmaex bei nr hoxr zo teixl lei nr xie. Giedae ci a, ca nnel a lei a bbeix: ⁶¹ “Ca eil ddei bbeix: ‘Ngo Arbosobo ddei xi giex caexr pixl gger a, so ni dder zi du xixl lei xie,’ eine bbeix goxr a.”

⁶² Yel Arbosobo leil zi su vaer zzir ddei dder ngier du lei a, Yisu leil bbeix: “Ca mel ni leil eil mel goxl dae lei ni arsaenga a cir za lei ddar-nr-koxl leir?” ⁶³ Yisu zzael arjjiuljjiu a hher dae lalnga. Yel Arbosobo leil zi su vaer zzir ddei yar leil bbeix: “Ngo cirse-cirsil lei gol dae Arbosobo leil dor dae a, Arbosobo ddei mi ddei bbeix dae a, ni leil ngua leil bbeix gger lol, ni yarzi Arbosobo ddei Ssor Zidu ddei nga nga?”

⁶⁴ Yisu ddarkoxl a bbeix: “Nga a mar. Ni bbeix hoxr a. Ngo nia leil bbeix gger, arddolcar a, nia Ca Ddei Ssor yarzi ddo Arbosobo ddei yo piar gga cux dae a, zico ddei leil zzi dae a jjixr lei ggie mia nia.”

⁶⁵ Arbosobo leil zi su vaer zzir ddei dder pia xiux si xiaxr gger a bbeix: “Yar ddar vaer te a Arbosobo leil bbeix vuxryixr a. Niul zeixleixr lei arseir bbeix ggie noni nr ssa a. Eilcar a yar Arbosobo leil bbeix vuxryixr, nia lei bbejjiur a. ⁶⁶ Nia zzir dae a yar leil arsae bei nia?”

Yaa ddarkoxl a bbeix: “Yar si nia.”

⁶⁷ Yel yaa dder yar qiaxrmeix ddei leil zixlvixrpir deix gger, yoxl meixddur ddei leil bbe gger du lei a yar bborji ddei leil deil yar leil cur a bbeix: ⁶⁸ “Zidu, ni doxl xiezi ar ddei a zzarmar? Ngua leil bbeix gger la, ni leil deil su ddei arseir a?”

Birdaexr Yisu Leil Nr Ssexl

⁶⁹ Giedae Birdaexr mel lamaebbaer zzaexggu ddei gga cux dae, yel ca leil visser su ssormaer ar ddei a, yar dax lei a bbeix: “Ni lei Jialixllixl su ca Yisu dax cirgo a nga.”

⁷⁰ Birdaexr dder ca mel meixsaer qier leil cexr-nr-ssexl a bbeix: “Ni azo bbeix dae ngo nr saexl.”

⁷¹ Yel dder ddux a; yar ggucirmi ddux ci a, yoxl ca leil visser su ssormaer ar ddei a, yar leil mia a, ca mel dax bbeix: “Ca eil ddei lei Naxrsalexl su ca Yisu dax cirgo a nga.”

⁷² Birdaexr yoxl cexr-nr-ssexl, halae Arbosobo leil dor dae a bbeix: “Ngo ca hal ddei leil saexl lei nr saexl.”

⁷³ Hormo arleixr nr goxr seir, halmaex ngier dae ca mel lei a, Birdaexr leil bbeix: “Ni yarzi yar dax cirgo su a; ni ddei qiurte ddei leil lei noni teixl lei ddo.”

⁷⁴ Nael yar dder larhorhormo bbeix a bbeix: “Ca hal ddei leil ngo nr saexl, ngo baexr arddeirnga a, Arbosobo ngo leil faxr lol ddo.”

Halcar a malmal, yixpe bbe a. ⁷⁵ Birdaexr dder Yisu yar dax bbeix goxr ddar mel leil holcir du lei a. Yisu bbeix: “Yixpe bbe xilmeir leil, ni ngo leil nr ssexl so boxl bei var.” Yel yar mel zzasol zildu a ddux a, waerwaelwaer nge du lei a.

27

Yoxrdaxl Si A

¹ Merteir a, Arbosobo leil zi su vaervaerpor nei ca leil guaxr su camar maelmaerjia cirgo a hher dae a, Yisu leil bei zil gger nia zzubbe har a.

² Zzubbe teixl ho a, yaa dder Yisu leil neixl gex du lei a, Loxrmar su Yoxrtaexl mermi vaervaerpor bei dae Birlado dax gga mal gger.^k

³ Halcar, Yisu leil vurlelsu Yoxrdaxl ddei Yisu leil zuixl dixl gger ho a mia a dder waxlhuixr a. Yel piu socei taex ddei vei dae a, Arbosobo leil zi

^k27:2 Halcar Yoxrtaexl su ca mel ca leil bei zil gger quexrlixl nr zza; Loxrmar goxrjia su mel larnei bei zil gger quexrlixl zza. Yel Yoxrtaexl su ddei vaervaerpor mel Loxrmar goxrjia vaervaerpor Birlado leil Yisu leil bei zil gger lol nia.

su vaervaerpor nei ca leil guaxr su camar mel leil koxl gger a bbeix:

⁴ “Ngo zuixl nr zza ca ar ddei leil vurlel a mel ngo zuixl bei a!” Yaa yar leil ddarkoxl a bbeix:

“Nguax dax guaxr-nr-zoxr, ni armael oldde leil ddeix lol ddo a!”

⁵ Yoxrdaxl dder piu mel Arbosobo leil zi ggie xi zzaexggu gga piar dol gger a, ddux a, diux zil a.

⁶ Arbosobo leil zi su vaervaerpor mel dder piu mel ggux du lei a bbeix: “Piu eil mel mel olga vur per a; yel zzirbae ji ggie ji dax nr ddo.” ⁷ Yaa dder zzibbe a piu hal mel sser a, niljiux dax mi ar bbae vae a, kebal mermi su ca mel leil giexlhex. ⁸ Yel eilleix zzeze lei ca mel halae mi hal bbae leil “sirnini mi” ae. ⁹ Eil ddei eine nga a mel dder xiezi Yilixlmir bbeix goxr mel yarzi loxr a.

“Yirsaexllixl su ca mel capor ar ddei vae wo ddo per piu socei taex sser a,

¹⁰ niljiux dax mi ar bbae vae a.

Eil ddei mel dder Seirpor ngo leil miardal dae ddei dax zox dae.”¹¹

Birlado Yisu Leil Ser

¹¹ Yisu Birlado vaervaerpor ddei meixsaer qier leil ngier dae a, Birlado yar leil biex a bbeix:

“Ni Yoxrtaexl su ca ddei zzirmar a ngo?” Yisu ddarkoxl a bbeix: “Ni bbeix hoxr a.”

¹² Arbosobo leil zi su vaervaerpor nei ca leil guaxr su camar mel Yisu leil goxl dae car a, Yisu cir za lei ddar-nr-koxl. ¹³ Yel Birlado dder yar leil bbeix: “Yaa ni leil eine ar zzu goxl dae lei, ni bbe-nr-jjiur zzar?” ¹⁴ Yisu

¹**27:10** Sarjialixlyal Sul 11:12-13 leil nei Yilixlmir Sul 19:1-13 leil vaexr dae.

halae cir qier lei ddar-nr-koxl, yel Birlado vaervaerpor ddei lei yarzisael murgur.

¹⁵ Bbecir-bbekoxl Yuelyuel jiax ci a mel, Birlado mel ca mel qiuxr dae mel sael a yaa leil ge ji dae ca ar ddei piur gger, eine bei zzawo. ¹⁶ Halcar a mel ge ji dae ca yarzi middarzza ar ddei zza. Yar leil Balaba mi. ¹⁷ Yel ca mel cirgo a hher dae car, Birlado yaa leil biex a bbeix: “Nia ngo leil nia leil ca arddol ddei piur gger lol? Balaba leil bbeixsael Zidu ae dae Yisu ddei leil piur?” ¹⁸ Birlado mel yaa Yisu leil nixnox a, yar leil ssu si lei arddeir a saexl.

¹⁹ Birlado Yisu leil ser dae car, yar maerssor ddei ca leil zi si lei a bbeix: “Armei ngo Yisu leil yixrmeixka a, yarzi goxr sol seirseil ar ke goxr a; yel ca seir eil ddei leil arsae lei bei nr ddo,” eine bbeix a.

²⁰ Arbosobo leil zi su vaervaerpor nei ca leil guaxr su camar mel zzael ca mel leil co a, Balaba leil nael piur, Yisu leil nael bei zil gger qiuxr lol.

²¹ Birlado yoxl ca mel leil bbeix:

“Ca eil nnel nia ngo leil nia leil arddol ddei piur gger lol?” Yaa ddarkoxl a bbeix: “Balaba leil piur.”

²² Birlado bbeix: “Halmel, Zidu ae dae Yisu ddei leil ngo arsae bei neil?”

Yaa maelmaerjjia ae doxr dae a bbeix: “Yar leil sixrzixljiaxl leil diexr zil gger.”

²³ Birlado bbeix: “Arsaenga a? Yar azo bei nr sir bei a leir?”

Yaa gielgiel worcixl-worni ae dae a bbeix “Yar leil sixrzixljiaxl leil diexr zil gger!”

²⁴ Birlado dder zeixleixr bbeix a lei guaxr-nr-zoxr, doxgoxleixr yaa leil luaxl du lei lol lalnga mia a dder, ajjix vei si lei a ca mel meixsaer qier leil leixrhher cir a bbeix: “Ca seir eil ddei leil sirnilni ddux lol a mel ngo zuixl nr zza. Zuixl mel nia oldde leil ddeix lol ddo a!”

²⁵ Ca maelmaerjjia ddarkoxl a bbeix: “Ca eil ddei leil sirnilni ddux lol

zuixl mel ngua nei ngua lilbol lilmo oldde leil ddeix lol ddo a.”

²⁶ Yel Birlado dder Balaba leil yaa leil piur gger a. Yisu leil nael ca mel leil jia gger a, lorddu sser a ar pu deil gger a, sixrzixljiaxl leil diexr zil ssi lol.

Meixr Mel Yisu Leil Vaessi

²⁷ Birlado ddei meixr mel dder Yisu leil Birlado hher ggje hier dil a, meixr circir-lorbba leil halmaex ae pex si lei. ²⁸ Yaa Yisu leil yar ddei pia mel lixr teixl gger a, pia nilni darsisimo ar xiux veixr gex gger; ²⁹ yoxl alcur sser a oldde leil ddexrlabox ar ddei bei a, yar oldde taex leil ddexr gex gger; halae yar leixrhher yo bbor gga zzargger ar caex vei dae lol, yar xilmeir cizixl gger dae a, yar leil vaessi a bbeix: “Yoxrtaexl su ddei zzirmar, ni leil olga si lol nia!”^m ³⁰ Yoxlyoxl yar qiaxrmeix ddei leil zixlvixrpir deix gger, halae zzargger caex vei a yar oldde taex leil deil doxr. ³¹ Yaa yar leil bbeix vuxryixr teixl ho a dder, pia darsisi xiux lixr teixl gger a, yar ddei pia mel veixr gex xixl gger a. Yel yar leil hier teixl a sixrzixljiaxl leil diexr ngexl gger ssi.ⁿ

Yisu Leil Sixrzixljiaxl Leil Diexr Ngexl Gger

³² Yaa ddux lei car, Gurlixlnaexl zzi gga su ca ar ddei dax zzi a; yar leil Ximexr mi. Yel dder yar leil ddoddo-nrddo Yisu ddei sixrzixljiaxl ddei bber dae lol. ³³ Giedae yaa Gexrgexrta ae halmaex ssi ci a. Gexrgexrta ddei yilsi mel dder olggargex mermi. ³⁴ Meixr mel dder puxrto zzibbaer

^m**27:29** Halcar mel zzirmar mel mel pia naxrcixl darsisimo ar xiux veixr, oldde leil ddexrlabox yarzi naxrcixl ar ddei ddexr, zzargger ar caex sser a ca mel leil guaxr, yel meixr mel Yisu leil eine bei gger a mel yar leil vaessi a nga arddeir a.

ⁿ**27:31** Ddar eil mel mel Yirsaexlyal Sul 50 nei 53 halae Martaexl Sul 20 leil vaexr goxr a.

gga zi karmmermer ggiex ji dax gger a Yisu leil dda lol. Nael yar arleixr dda a, dda nr yuex.³⁵ Yel yaa yar leil sixrzixljiaxl leil diexr ngexl gger ho a, yoxl yar ddei pia mel bbe kae gger a nijiu³⁶ halae halmaex cux dae a, yar leil su dae.³⁷ Yisu diexr gex dae sixrzixljiaxl ddei ollele mel barpir ar co diexr ngexl gger a. Yel barpir co leil yar leil goxl dae zuixl mel vaexr deix dae a bbeix: “Eil ddei Mel Yoxrtaexl Su Ddei Zzirmar Yisu A.”

³⁸ Halcar, zzaexpor nnel leil lei Yisu dax cirgo a sixrzixljiaxl leil diexr zil gger; cir ddei leil a nael yar yo piar a gga diexr zil gger, cir ddei leil a nael yar vael piar a gga diexr zil gger.³⁹ Halmaex ssi gel su ca mel lei oldde taex veil dae a yar leil vaessi a bbeix:⁴⁰ “Ae! Ni doxl Arbosobo ddei xi giex caexr pixl gger, so ni dder zi du xixl lei xie bbeix goxr a; ni armael leil jiuxl ddo a! Ni Arbosobo ddei Ssor nga arddeirnga a, sixrzixljiaxl leil zei lei ddo a!”

⁴¹ Ciryoxr a nga, Arbosobo leil zi su vaervaerpor nei Arbosobo ddei sulsaxlsu halae ca leil guaxr su camar mel lei yar leil bbeix vuxryixr a bbeix:⁴² “Yar si leil jiuxl var arnar a, armael leil jiuxl nr var bbe! Yar doxl nr nga Yirsaexllixl su ca ddei zzirmar a zzarmar? Yar eilcar dder sixrzixljiaxl leil zei lei ddo a; yel ngua dder yar leil ddarzzi.⁴³ Yar ‘Ngo mel Arbosobo ddei Ssor a,’ bbaexl eine bbeix goxr a. Yel yar Arbosobo leil koxl dae, yar bei dae mel Arbosobo nixmox lodda arddeirnga a, Arbosobo eilcar dder yar leil jiuxl ddo a.”⁴⁴ Yar dax cirgo a sixrzixljiaxl leil diexr zil gger zzaexpor hal mel lei yar leil eil mel sael a bbeix vuxryixr.

⁴⁵ Eilnirggu 12:00° cirdae a 3:00 zzezze lei, merni taex leil neixmarmarmo jiul gex dae a cirmaex-hanga lei neixmar jjia a.

°27:45 12:00 Xilaxl ddar bbeix: “Luxr goxl xiarsixr ddei ci a.” Ddar eil qier ddei yilsi mel dder eilnirggu 12:00.

⁴⁶ Eilnirggü 3:00^p ci a, Yisu worcixl-worni ae dae a bbeix: “Yirloxryi, Yirloxryi, lamar sarbagexrdaxlnixr?” Yilsi mel dder bbeix: “Ngo ddei Arbosobo, ngo ddei Arbosobo, ni arsaenga a ngo leil nr guaxr?”^q

⁴⁷ Halbbaer ngier dae ca cirmelmel a bbejjiur a bbeix: “Yar xiezi Yirlixlyal leil ae dae a!”

⁴⁸ Yel ca mel gga ar ddei a, nialngasael beix gel a, hielmixr ar ddei vei a puxрто zzipbaer zeilzei arleixr niuxl a, zzargger caex leil neixl gex a, yar leil dda lol. ⁴⁹ Kebal ca mel nael bbeix: “Xia dae a, Yirlixlyal yar leil jiuxl jiuxl lei bbe arleixr i.”

⁵⁰ Giedae Yisu yoxl worcixl-worni ae dae a, seixl ddei dder ceix a.

⁵¹ Neixleixrsael, Arbosobo leil zi ggje xi gga lavulzzar mae giex gex dae co^s dder ggaxrsi cirdae a jiasi zzezze nr bbaexrlaexr si mal a; middur ddei lei le du lei a; legelbbe gextaextaex mel lei zexbbeixr a; ⁵² lixrbbaex mel lei zex pu a; Arbosobo leil ddarzzi su ca si ho cirke a lei gol du xixl lei a. ⁵³ Yisu gol du xixl lei ho a, yaa lixrbbaex doxlzi gga ddux lei a, Arbosobo ddei zzi hherdder Yiluxlsaler zzi gga ddir a; ca cirke leil mia lol.

⁵⁴ Meixr cirxiu guaxr su vaervaerpor nei yar dax cirgo a Yisu leil su dae meixr mel mi lei nei cirza-hanga eil mel mia a dder gexr zildu a bbeix: “Ca eil ddei yarzi Arbosobo ddei Ssor a bbe!”

⁵⁵ Ssormaer seirseil ar ke lei vimirmir ngier dae a, i dae. Yaa mel Jialixllixl mermi cirdae dder Yisu dax mae dae a, yar leil visser dae ar

^p**27:46 3:00** Xilaxl ddar bbeix: “Jiur goxl xiarsixr ddei ci a.” Ddar eil qier ddei yilsi mel dder eilnirggü 3:00.

^q**27:46** Ddar eil mel mel Sipi Sul 22 leil vaexr goxr a.

^s**27:51** *Arbosobo leil zi ggje xi gga lavulzzar mae giex gex dae co* Arbosobo leil zi ggje xi gga lavulzzar maeco leil Cu'aezixr Sul 26:31-35 leil biar dae.

mel a. ⁵⁶ Yaa ca mel gga mel Moxrdaxlla su Marlixlyal, yoxl Yargel nei Yuesaexl yarma Marlixlyal, halae Xibirtaexl ssor nnel ddei yarma lei ca dae.

Yisu Leil Giexlhex

⁵⁷ Mercixl car, Yallixlmartaexl zzi gga su Yuesaexl mi hal ddei lei a. Yar mel cabessor ar ddei a. Yar lei Yisu dax mae dae su ca ar ddei a. ⁵⁸ Yar Birlado dax ssi a, Yisu ddei ggecir ddei li ssi; yel Birlado dder ca leil miardal a Yisu ddei ggecir ddei vei ze lei a yar leil gger lol. ⁵⁹ Yuesaexl dder Yisu ddei ggecir ddei vei si lei a, zzir bei teixl lei mae seibeixbeix sser a ba gex du lei a. ⁶⁰ Yel yar armael ddei lixrbbaex doxli sixl gga dol ji dae. Lixrbbaex doxli eil ddei mel yar legelbbe cili gga giexl teixl lei arddeir a. Yar yoxl legelbbe vaervaer ar taex guir gel lei a lixrbbaex doxli ddei leil ddaexrcir gger a dder, jjixr a. ^{t 61} Moxrdaxlla su Marlixlyal nei kebal Marlixlyal yaa nnel qiaxrmeix ddei lixrbbaex ddei dax mal dae a, halmaex cux dae.

⁶² Giedae cir ni hherdder wornol nixixl cir ni^u Arbosobo leil zi su vaervaerpor mel nei Farlixsaexl ca mel cirter a Birlado dax ssi a bbeix: ⁶³ “Vaervaerpor, ngua holcir dae a, ca leil fur su hal ddei gol dae seir car a ‘Ngo si a, so ni cir ni gol du xixl lei nia,’ bbeix goxr a. ⁶⁴ Yel ni leil qie, ca leil miardal a lixrbbaex doxli ddei leil zabbar seilseir a su dae lol, hherdder so ni cir ni zzeze su ci. Nr nga a, yar dax mae dae su ca mel yar ggecir ddei ker si a, ca leil ‘Yar si ho a yoxl gol du xixl lei a,’ eine bbeix gger ssi lei. Eine nga a mel, arddolcar a yaa ca leil fur a mel, bir halleix yar ca leil fur leil lei larhor.”

^t27:60 Ddar eil mel mel Yirsaexlyal Sul 53:9 leil vaexr goxr.

^u27:62 *Giedae cir ni hherdder wornol nixixl cir ni* Hal cir ni mel xiqiluxr cir ni nga a; hherdder Yoxrtaexl su ddei wornol nixixl nga a.

⁶⁵ Birlado dder bbeix: “Nia meixr mel leil hier dae a ssi ddo a. Nia arsae guaxr var arsae guaxr a zabbar seirseir a su dae ddo a.” ⁶⁶ Yel yaa dder lixrbbaex doxli ddei leil ddux lei ddux nr cexr, ddir lei ddir nr cexr bei mal gger, halae meixr leil zabbar seirseir a su dae lol.

28

Yisu Gol Du Xixl Lei

¹ Wornol nixixl cir ni goxr jjia a, giedae cir ni jiajia merteir car,^v Moxrdaxlla su Marlixlyal nei kebal Marlixlyal yaa nnel cirgo a lixrbbaex doxli ddei leil i ssi.

² Nael middur ddei yarzi le larhor le du lei a. Seirpor ddei tisir merlabbor zeil lei a, lixrbbaex doxli ddei leil guir gex dae legelbbe taex va kae gger a. Yel halmaex cux deix dae. ³ Yar leil i dae a, almer bbiexr sael a bbo; pia ddei lei wor sael a piu. ⁴ Yel halmaex su su meixr mel mia a dder laexlaexllaex gexr mal a; giedae dder ca sima sael a loxr a.

⁵ Tisir ddei ssormaer hal nnel leil bbeix: “Nia gexr nr ssa! Nia sixrxixljiaxl leil diexr ngexl gger Yisu leil zo, ngo saexl. ⁶ Yar eilmaex nr hher dae a. Yar mel yar bbeix goxr mel sael a gol du xixl lei ho a. Nia i lar! Eilmaex mel dder Seirpor ggecir ddei dol ggie nga a. ⁷ Yel nia nialngasael yar dax mae dae su ca mel leil ‘Yar si a, yoxl gol du xixl lei ho a; halae yar nia xilmeir leil Jialixllixl mermi ssi, nia halmaex yar leil mia ddo,’ eine bbeix gger. Ngo nia leil ddar bbeix gger dae mel nia holcir dae nia.”

^v**28:1** *Wornol nixixl cir ni goxr jjia a, giedae cir ni jiajia merteir car*
Yoxrtaexl su ddei wornol nixixl cir ni mel xiqiluxr cir ni a. Yel Yisu gol du xixl lei cir ni mel xiqiti cir ni a. Nael Yisu gol du xixl lei ho cirdae mel Yisu leil ddarzzi su mel mel xiqiti cir ni wornol nixixl goxr.

⁸ Ssormaer mel dder lixrbbaex doxli ddei dax nr hher a; nialngasael jjixr a. Yaa gexr arnar a, halae yarzi ggese, yel beix xixl a, Yisu dax mae dae su ca mel leil bbeix gger jjixr. ⁹ Neixleixrsael, Yisu yaa dax zzi a, yaa leil bbeix: “Nia leil zzaso lol nia!” Yel yaa dder gger a, Yisu qihher ddei leil gga gex dae a, yar leil cizixl gger a bbeix zae gger. ¹⁰ Yisu dder yaa leil bbeix: “Nia gexr nr ssa! Nia ngo ddei arzzi-nimar mel leil bbeix gger ssi nia, yaa leil Jialixllixl mermi ssi lol, yaa halmaex ngo leil mia ddo.”

Yirsaexllixl Su Vaervaerpor Mel Ca Leil Fur

¹¹ Nael yaa ssi dae car, halmaex gga su su meixr nnel sael a zzi gga ddir a, arsae lerler nga eil mel Arbosobo leil zi su vaervaerpor mel leil bbeix gger jjixr. ¹² Arbosobo leil zi su vaervaerpor mel nei ca leil guaxr su camar mel dder cirgo a hher dae a, zzi dax zzibbe. Yel meixr mel leil piu seirseil ar ke gger a ¹³ bbeix: “Nia mel ca mel dax ‘Eilmerxixl ngua yixrmeixljjiu dae car, Yisu dax mae dae su ca mel, yar ggecir ddei ker si a,’ eine bbeix nia.” ¹⁴ Nael algaxl Birlado vaervaerpor ddei ddar eil mel bbejjiur arddeirnga a, ngua yar dax bbeix var, nia leil maxrfaxr zo nr var. ¹⁵ Meixr mel mel yaa dax piu vei wo a dder, yaa arsae miardal arsae bei a. Ddar eil zzu mel eilleix zzezze lei Yoxrtaexl su ca mel dax biar doxr dae seir.

Yisu Yar Dax Mae Dae Su Mel Leil Miardal Teixl

¹⁶ Giedae Yisu dax mae dae ca ceidilmo dder Jialixllixl mermi ssi a, Yisu yaa leil bbeix gger a ssi lol worga hal ga leil ssi ci a. ¹⁷ Yaa Yisu leil mia a dder yar leil cizixl gger a bbeix zae gger, nael halae cirmelmel a yar gol du xixl lei a ddarzzi gax-nr-zi. ¹⁸ Yisu dder gger lei a yaa leil bbeix: “Arbosobo merlabbor middurbbor quexrlixl maelmaerjgia lei ngo leil gger a. ¹⁹ Yel nia mer woxrke ca circuxr-hanga leil lei ngo dax mae dae su ca bei lol nia; halae Arbbor ddei mi, Ssor ddei mi, Arbosobo ddei Xiu ddei

mi bbeix dae a yaa leil sexlsir gger nia. ²⁰ Ha ngo nia leil miardal dae mel mel nia dder yaa leil mul gger a bei mae dae lol nia. Yel ngo dder nia dax hher dax doxr dae, hherdder nixixl ddei maelele zzeze ci.”